

清

史

稿

清史稿

列傳二百六十

張勳

張記

康有爲

張勳字少軒江西奉新人少孤貧投効廣西軍預法越之戰累保至參將日韓數啟隨毅軍防守奉天袁世凱練兵小站充管帶拳匪亂作統巡防營防勦敘功擢副將賞壯勇巴圖魯兩宮回鑾隨扈至京諭留宿衛授建昌鎮總兵擢雲南提督改甘肅皆不赴日俄戰後調奉天充行營翼長節制三省防軍賞黃馬褂旋命總統江防各軍駐浦口調江南提督武昌變起蘇州獨立總督張人駿將軍鐵良方與衆籌戰守有持異議者勳直斥之翌日新軍變勳與戰於雨花臺大破之江浙軍合來攻糧援背絕乃轉戰退而屯徐州完所部人駿鐵良走上海命勳爲江蘇巡撫攝兩江總督賞輕車都尉遜位詔下世凱遣使勞問勳答曰袁公之知不可負君臣之義不能忘袁公不負朝廷勳安敢負袁公世凱厯假勳定武上將軍江北鎮撫使長江巡閱使江蘇都督安徽督軍及建號勳首起抗阻並請優待皇室保衛宮廷世凱卒各省有所謀羣集徐州推勳主盟

勤於是提兵北上叩謁宮門遂復辟連下詔令首頒復政諭云朕不幸以冲齡繼承大業勞勞在疚未堪多難辛亥變起我孝定景皇后至德深仁不忍生民塗炭毅然以祖宗創垂之重億兆生靈之命付託前閣臣袁世凱設臨時政府推讓政權公諸天下冀以息爭弭亂民得安居乃國體自改共和以來紛爭無已迭起干戈強劫暴斂賄賂公行歲入增至四萬萬而仍患不足外債增出十餘萬萬而有加無已海內囂然喪其樂生之氣使我孝定景皇后不得已遜政恤民之舉轉以重苦吾民此誠我孝定景皇后初衷所不及料在天之靈惻痛難安而朕深居宮禁日夜禱天傍徨飲泣不知所出者也今者復以黨爭激成兵禍天下洶洶久莫能定共和解體補救已窮據張勳等以國本動搖人心思舊合詞奏請復辟以拯生靈各等語覽奏請詞懇切實深痛懼既不敢以天下存亡之大責遂輕任於眇躬又不忍以一姓禍福之衝言置兆民於不顧權衡重輕天人交迫不得已允如所奏於宣統九年五月十三日臨朝聽政收回大權與民更始自今以往以綱常名教爲精神之意法以禮義廉恥收漸決之人

心上下以至誠相感不徒恃法守爲維繫之資政令以懲毖爲心不得以國本爲嘗試之具况當此萬象虛耗元氣垂竭存亡絕續之交朕臨深履薄固不敢有樂爲君稍有縱逸爾大小臣工尤當精白乃心濂除舊染息息以民瘼爲念爲民生留一分元氣即爲國家延一息命脈庶幾危亡可救感召天庥所有興復初政亟應興革諸大端條舉如下一欽遵德宗景皇帝諭旨大權統於朝廷庶政公諸輿論定爲大清帝國君主立憲政體一皇室經費仍照所定每年四百萬元數目按年撥用不得絲毫增加一懷遵本朝祖制親貴不得干預政事一實行融化滿漢畛域所有以前一切滿蒙官缺已經裁撤者概不復設至通婚易俗等事並著所司條議具奏一自宣統九年五月本日以前凡與東西各國正式簽定條約及已付債款合同一律繼續有效一民國所行印花稅一項應即廢止以紓民困其餘苛細雜捐並著各省督撫查明奏請分別裁撤一民國刑律不適國情應卽廢除暫以宣統初年頒定現行刑律爲準一禁除黨派惡習其從前政治罪犯概予赦免儻有自棄於民而擾亂治安者朕不敢赦一

凡我臣民無論已否剪髮應遵照宣統三年九月諭旨悉聽其便凡此九條誓  
共遵守皇天后土實鑒臨之次諭立憲設內閣京外官暫照宣統初年官制  
辦理其現任文武大小官員均照常供職先後命官以勳及陳寶琛劉廷琛等  
爲內閣議政大臣次則內閣閣丞萬繩栻胡嗣瑗大學士爲瞿鴻禪升允顧問  
大臣趙爾巽陳夔龍張英麟馮煦等各部尙書梁敦彥張鎮芳雷震春沈曾植  
勞乃宣等侍郎李經邁李瑞清陳曾壽王乃徵陳毅顧瑗等丞參寧湯生章棟  
黎淇枝梁用弧等都御史張曾敤副都御史胡思敬溫肅並召鄭孝胥吳慶坻  
趙啟霖及陳邦瑞朱益藩等均來京又以勳兼直隸總督北洋大臣仍留京各  
省督撫提鎮皆就現任者改之命下各省多不應而馬廠師起稱討逆軍傳檄  
討勳勳自請罷斥及攻都城勳與戰以兵寡不支荷蘭公使以車迎入使館旋  
赴津居久之卒年七十諡忠武勳亢爽好客待士卒有恩所部數萬人無一斷  
髮者世指爲辯子軍臨戰盡納家屬妻妾子女別室不聽避蓋自憲負國誓骨  
肉俱殉及事亟外人破戶刦之始脫云張彪字虎臣山西榆次人以武生歸撫

標巡撫張之洞器賞之擢外委隨調粵鄂至兩江時新練陸軍充管帶監修江  
陰江防礮臺復還湖北充護軍管帶光緒二十三年奏派赴日本考查軍政歸  
督修漢口後湖隄工視漢陽兵工廠累保副將賞壯勇巴圖魯勇號兼常備軍  
鎮統授松潘總兵留充陸軍第八軍鎮統制官南北新軍會操於彰德賞花翎  
再會操太湖更勇號曰奇穆欽宣統二年擢湖北提督加陸軍副都統三年新  
軍變總督瑞澂棄城走彪卒衛隊巷戰自夜至日午不能支退召水師瑞澂勑  
以構變潛逃詔革職圖後効復充湘豫鄂援軍總司令率殘軍保漢口禁衛軍  
及北洋軍南下督隊先驅屢有克捷既復漢陽還原官官軍請改共和要彪署  
名力卻之遂稱病去東渡日本歸寓津築張園自隱乙丑迎蹕駐園供張服用  
夙夜唯勤丁卯秋病篤見駕臨視已不能起強啟目含淚而逝年六十八

康有爲字廣夏號更生原名祖詒廣東南海人光緒二十一年進士用工部主  
事少從朱次琦遊博通經史好公羊家言言孔子改制倡以孔子紀年尊孔保  
教先衆徒講學入都上萬言書議變法給事中余聯沅劾以惑世誣民非聖無

法請焚所著書中日議款有爲集各省公車上書請拒和遷都變法格不達復獨上書由都察院代遞上覽而善之命錄存備省覽再請督羣臣以定國是開制度局以議新制別設法律等局以行新政均下總署議二十四年有爲立保國會於京師尙書李端分學士徐致靖張百熙給事中高燮曾等先後疏薦有爲才至是始召對有爲極陳四夷交侵覆亡無日非維新變舊不能自強變法須統籌全局而行之徧及用人行政上歎曰奈掣肘何有爲曰就皇上現有之權行可變之事扼要以圖亦足救國唯大臣守舊當廣召小臣破格擢用並請下哀痛之詔收拾人心上皆諉之自辰入至日昃始退命在總理衙門章京上行走特許專摺言事旋召侍讀楊銳中書林旭主事劉光第知府譚嗣同參預新政有爲連條議以進於是詔定科舉新章罷四書文改試策論立京師大學堂譯書局興農學獎新書新器改各省書院爲學校許士民上書言事諭變法裁僧事府通政司大理光祿太僕鴻臚諸寺及各省與總督同城之巡撫河道總督糧道鹽道並讓開懋勤殿定制度改元易服南巡遷都未及行以抑格言

路首達詔旨盡奪禮部尙書侍郎職舊臣疑懼輦起指責有爲御史文悌復痛  
劾之上先命有爲督辦官報復促出京上雖親政遇事仍承太后意旨久感外  
侮思變法圖強用有爲言三月維新中外震仰唯新進驟起機事不密遂致害  
成時傳將以兵圍頤和園劫太后人心惶惑上硃諭銳等籌議調和有朕位且  
不能保之語語具銳傳於是太后復垂簾盡罷新政以有爲結黨營私莠言亂  
政褫職逮捕有爲先走免逮其弟廣仁及楊銳等下獄並處斬復以有爲大逆  
不道構煽陰謀頒硃諭宣示並籍其家懸賞購捕有爲已星夜出都航海南下  
英國兵艦迎至吳淞時傳上已幽廢且被弑有爲草遺言誓以身殉將蹈海英  
人告以訛傳有爲始脫走亡命日本流轉南洋遍遊歐美各國所至以尊皇保  
國相號召設會辦報集資謀再舉屢遇艱險不少阻晉結富有會起事江漢皆  
爲官兵破獲誅其黨連詔大索毀所著書閱其報章者並罪之初太后議廢帝  
稱病徵醫久閉瀛台旦夕不測有爲聞之首發其謀清議爭阻外人亦起責言  
兩江總督劉坤一言君臣之分已定中外之口難防始罷廢立奉匪起以滅洋

人殺新黨爲號太后思用以立威遂肇大亂凡與有爲往還者輒以康黨得奇  
禍宣統三年鄂變作始開黨禁戊戌政變獲咎者悉原之於是又有爲出亡十餘  
年矣始謀歸國時民軍決行共和廷議主立憲而有爲叛虛君共和之議以中  
國帝制行已數千年不可驟變而大清得國最正歷朝德澤淪浹人心存帝號  
以統五族弭亂息爭莫順於此內閣總理大臣袁世凱徇民軍請決改共和遂  
下遜位之詔有爲知空言不足挽阻思結握兵柄者以自重頗遊說當局數年  
無所就丁巳張勳復辟以有爲爲弼德院副院長勳議行君主立憲有爲仍主  
虛君共和事變有爲避美國使館旋脫歸上海甲子移宮事起修改優待條件  
有爲馳電以爭略曰優待條件係大清皇帝與民國臨時政府議定永久有効  
由英使保證並用正式公文通告各國以昭大信無異國際條約今政府擅改  
條文強令簽認復敢挾兵搜宮侵犯皇帝侮辱后妃抄沒寶器不顧國信倉卒  
要盟則內而憲法外而條約皆可立廢尙能立國乎皇上天下爲公中外共仰  
豈屑與爭實爲民國羞也明年移蹕天津有爲來覲謁以進德修業親賢遠佞

爲言丁卯有爲年七十賜壽手疏泣謝歷叙恩遇及一生艱險狀悲憤動人時  
有爲懷今感舊傷痛已甚哭笑無端自知將不起遂草遺書病卒於青島有爲  
天資瑰異古今學術無所不通堅於自信每有叢論常開風氣之先初言改制  
次論大同謂太平世必可坐致終悟天人一體之理述作甚多其著者有孔子  
改制考新學僞經考春秋董氏學春秋筆削大義微言考大同書物質救國論  
電通及康子內外篇長興學全萬木草堂天遊廬講學記各國遊記贊文詩集  
等其門人張伯楨爲彙刊萬木草堂叢書

論曰光宣兩朝世變迭起中國可謂多故矣其事皆分見於紀傳斷代爲史辛  
亥以後例不能詳唯丁巳復辟甲子移宮實爲遜位後兩大案而勤與有爲又  
與清室相終始亦不可遂沒其人明末三王及諸遺臣史皆勿諱今仿其體並  
詳著於篇庶幾考有清一代之本末者有所鑒焉

清史稿

列傳二百六十

吳三桂

本紀

列傳

吳三桂字長伯江南高郵人籍遼東父襄明崇禎初官錦州總兵三桂以武舉承父荫初授都督指揮襄坐失機下獄擢三桂總兵守甯遠洪承疇出督師合諸鎮兵三桂其一也師攻松山三桂戰敗夜引兵去松山破承疇降三桂坐鐫三秩收兵仍守甯遠三桂祖大壽甥也大壽既降太宗令張存仁書招三桂不報順治元年李自成自西安東犯太原甯武大同皆陷又分兵破真定莊烈帝封三桂平西伯並起襄提督京營徵三桂入衛甯遠兵號五十萬三桂簡閱步騎遣入關而留精銳自將爲殿三月甲辰入關戊申次豐潤而自成已以乙巳破明都遣降將唐通自廣恩將兵東攻灤州三桂擊破之降其兵八千引兵還保山海關自成脅襄以書招之令通以銀四萬犒師遣別將率二萬人代三桂守關三桂引兵西至深州聞其妾陳爲自成將劉宗敏掠去怒還擊破自成所遣守關將遣副將楊坤游擊郭雲龍上書睿親王乞師王方西征次翁後三桂

使至明日進次西拉塔拉報三桂書許之自成聞三桂兵起自將二十萬人以東執襄置軍中復遣所置兵政部尙書王則堯招三桂三桂留不遣越四日王進次連山三桂又遣雲龍齋曹趣進兵師夜發踰甯遠次沙河明日距山海關十里三桂遣邏卒報自成將唐通出邊立營王遣兵攻之戰於一片石通敗走又明日師至關三桂出迎王命設儀仗吹螺備三桂拜天畢三桂率部將謁王王令其兵以白布繫肩爲識前驅入關自成兵橫亘山海閒列陳以待王令諸軍向自成兵而陳三桂兵列右翼之末陳定三桂先與自成兵戰力鬥數十合及午大風塵起咫尺莫能辨師噪風止武英郡王阿濟格豫郡王多鐸以二萬騎自三桂陳右突入騰躍摧陷自成方立馬高岡觀戰訖曰此滿洲兵也策馬下岡走自成兵奪氣奔潰逐北四十里即日王承制進三桂爵平西王分馬步兵各萬隸焉令前驅遂自成三桂執則堯送王所命斬之自成至永平殺襄走山西乃還師世祖定京師授三桂平西王冊印賜銀萬馬三明福王由崧稱

帝南京使封三桂蘄國公又遣沈廷揚自海道運米十萬銀五萬犒師三桂不受尋遣其侍郎左懋第都督陳洪範等使於我復齎銀幣勞三桂三桂仍辭不受尋命英親王阿濟格爲大將軍西討自成三桂率所部從自邊外趨綏德二年克延安鄜州進攻西安自成以數十萬人迎戰三桂督兵奮擊斬數萬級自成出武關南走師從之自襄陽下武昌自成走死師復東徇九江八月師還賜紳朝衣一襲馬二命進稱親王出鎮錦州所部分屯甯錦中右中後中前前屯諸地三桂疏言丁給地五晌各所房屋灰燼地土磽薄請增給並爲坤雲龍及諸將吳國貴高得捷等請世職屬吏童達行等乞優擢又以父襄母祖氏第三輔並爲自成所殺疏乞賜卹並如所謂三桂辭親王下部議許之三年入覲賜銀二萬五年命與定西將軍墨爾根侍衛李國翰同鎮漢中六年明宗室朱森溼攻階州三桂與國翰督兵擊斬之有王永強者爲亂破延安榆林等十九州縣延綏巡撫王正志靖遠道夏時芳死之復陷同官定邊花馬池三桂督兵克宜君同官擊斬七千餘級進克蒲城宜川安塞清澗諸縣誅永強所置吏定邊

榆林府谷皆下八年入覲賜金冊印時明桂王由榔稱帝居南甯張獻忠將孫可望李定國等皆降於明率兵擾川北諸郡縣命三桂偕國翰率師討之九年七月三桂與國翰遣兵西撫潭臘松潘東拔重慶進攻成都明將劉文秀棄城走復進克嘉定駐軍綿州文秀及王復臣復自貴州向四川招擗羅爲敗陷重慶進破敍州三桂屢戰不利文秀復臣圍巡按御史郝洛於保甯洛趣三桂等赴援擊斬復臣文秀引兵走涪疏劾三桂擁兵觀望狀三桂摘疏中親冒矢石語劾涪冒功涪坐謫徙三桂敍功歲增俸千子應熊尙主爲和碩額附授三等精奇尼哈番加少保兼太子太保十四年可望反明攻由榔定國禦之可望敗走長沙來降詔授三桂平西大將軍與國翰率師徇貴州時大將軍羅託經略洪承疇等出湖南將軍卓布泰等出廣西三道並進三桂等發漢中道保甯順慶次合州破明兵收江中戰艦定國遣其將劉正國楊武守三坡紅關諸隘石壠關者尤險峻明兵阻關三桂令騎兵循山麓步兵陟其巔以礮發其伏明兵驚潰遂下遵義克開州會羅託等已克貴陽卓布泰亦自都勻安遠入信郡王

多尼將禁旅至國翰還師還義尋卒三桂馳與羅託等會於平越揚老堡議分道進兵三桂自遵義出天生橋聞白文選據七星關遂繞出烏撒土司境次霑益多尼師進曲靖敗文選卓布泰師進羅平敗定國十六年正月由榔奔永昌二月三桂與尚善卓布泰合軍克雲南會城破文選玉龍關取永昌由榔走緬甸師渡潞江定國設伏磨盤山諭知之分八隊迎擊斬殺過半取騰越追至南甸乃振旅自永昌大理姚安還明將馬寶李如碧高啟隆劉之復塔新策王會劉稱馬惟興楊武楊威高應鳳狄三品等及景東蒙化麗江東江東川鎮雄諸土司先後來降多尼卓布泰等師還留固山額貞伊爾德卓羅等分軍駐守而詔三桂鎮雲南命總管軍民事諭吏兵二部雲南將吏聽三桂黜陟定國求出由榔緬甸軍孟良元江土司邢嵩與降將高應鳳舉兵應定國三桂督兵自石屏進圍元江逾月擊斬應鳳嵩自焚死收其地爲元江府十七年戶部疏言雲南俸餉歲九百餘萬議檄滿洲兵還京裁綠旗兵五之三桂謂邊疆不甯不宜減兵力是時三桂已陰有異志其藩下副都統楊申說以先除由榔絕人望

三桂乃疏言前者密陳進兵緬甸奉諭若勢有不可慎勿強務詳審斟酌而行  
臣籌畫再三竊謂渠魁不滅有三患一難李定國白文選等分住三宣六慰以  
擁戴爲名引潰衆肆擾其患在門戶土司反覆惟利是趨一被煽惑偏地烽起  
其患在肘腋投誠將士尙未革心萬一邊關有警若輩乘隙而起其患在腹理  
且兵糧取之民間無論各省餉運愆期即到演召買民方懸磬米價日增公私  
交困措糧之難如此年年召買歲歲輸將民力既盡勢必逃亡培養之難又如  
此惟及時進兵早收全局乃救時之計下議政王大臣會戶兵二部議令學士  
麻勒吉侍郎石圖如雲南諸三桂機宜乃決策進兵命內大臣愛星阿爲定西  
將軍率禁旅南征三桂所部五丁出一甲甲二百置佐領積數十佐領以吳應  
麒吳國貴爲左右都統分統之七月三桂疏請部勒降兵分置十營營千二百  
人以降將爲總兵馬寶李如碧高啟隆劉之復塔新策將忠勇五營王會劉備  
馬惟興楊威吳子聖將義勇五營十月又疏請置援剿四領以馬甯沈應時王  
輔臣楊武爲總兵皆允之三桂請拊循南甸瀘川千崖蓋達車里諸土司頒敕

印復檄緬甸令執由榔以獻定國文選屢攻緬甸求出由榔緬甸頻年被兵患苦之使告師破定國等請以由榔獻十八年三桂遣使緬甸刻師期令於猛卯迎師遣副都統何進忠及應時寧等率師出騰越道隴川三月至猛卯緬甸又與定國戰道阻既緬甸使至迎師會瘴發進忠等引還三桂以馬乃土司龍吉兆稱兵應定國遺寶起隆及游擊趙良棟等討之攻七十餘日破其寨斬吉兆以其地爲普安縣九月瘴息三桂與愛星阿及前鋒統領白爾赫圖都統果爾欽遜塔等督兵攻大理復出騰越道南甸隴川至猛卯分兵二萬遣甯輔臣別取道姚關鎮康孟定又慮蠻暮猛密二土司助定國阻我師後留總兵張國柱將三千人屯南甸爲備十一月會師木邦文選毀錫箔江橋走茶山定國走景線三桂令甯等以偏師逐文選而與愛星阿趨緬甸復檄令執送由榔十二月師進次舊晚坡距緬甸都六十里緬甸使告請遣兵進次蘭鳩江濱扞衛乃遣白爾赫圖將百人以往緬甸遂執由榔及其母妻等送軍前甯等逐文選及於猛卯文選以數千人降師還康熙元年捷聞詔進三桂親王並命兼轄貴州召

愛星阿率師還四月三桂執由榔及其子以弓絃綬殺之送其母妻詣京師道  
自殺定國尙往來邊上伺由榔消息三桂令提督張勇將萬餘人戍普洱沅江  
爲備未幾定國走死猛臘三桂招其子嗣興以千餘人降明亡二年遣曾等攻  
隴納山蠻破巢斬渠三年遣之復及總兵李世耀率兵出大方烏蒙攻水西土  
司安坤烏撒土司安重聖並擊斬之以其地設府隴納曰平遠大方曰大定水  
西曰黔西烏撒曰威甯四年奏裁雲南綠旗兵五千有奇五年復遣兵攻土司  
祿昌賢於隴筭取其寨數十迤東悉定設府曰開化州曰永定三桂初以開關  
迎師位望出諸降將孔有德耿仲明尙可喜輩右有德專征定湖廣徇廣西李  
定國破桂林殉焉可喜與仲明子繼茂分兵定廣東福建而三桂功最高雲貴  
初定洪承疇疏用明黔國公沐英故事請以三桂世鎮雲南三桂復請敕雲南  
督撫受節制移總督駐貴陽提督駐大理據由榔所居五華山故宮爲藩府增  
華崇麗籍沐天波莊田七百頃爲藩莊假濬渠築城爲名重榷關市籠鹽井金  
銅鑛山之利厚自封殖通使達賴喇嘛互市北勝州遼東參四川黃連附子就

其地採運官爲之鬻收其直貨財充溢貨諸富買謂之藩本權子母斥其羨以  
低士大夫之無藉者擇諸將子弟四方賓客與肄武備謂以儲將帥之選部兵  
多李自成張獻忠百戰之餘勇健善鬥以時訓練所轄文武將吏選用自擅各  
省員缺時亦承制除授謂之西選又屢引京朝官各省將吏用以自佐御史楊  
素蘊疏論劾三桂摘疏中防微杜漸語請旨詰素蘊素蘊覆奏言防微杜漸古  
今通義事遂寢六年三桂疏言兩目昏督精力日減辭總管雲貴兩省事下部  
議如各省例歸督撫管理文吏由吏部題授雲貴總督卡三元雲南提督張國  
柱貴州提督李本深交章陳三桂勞績請敕仍總管得旨王以精力日減奏辭  
若仍令總管恐其過勞如邊疆遇有軍事王自應經理尋進應熊少傅兼太子  
太傅命赴雲南視疾仍還京師三桂益欲攬事權搆黨苗蠻藉事用兵私割中  
甸界諸番屯牧通商互市迨三元乞歸養甘文焜代爲總督不附三桂三桂詐  
稱邊寇檄赴勦比至又稱寇退檄使還藩屬將吏士卒糜俸餉鉅萬各省輸稅  
不足徵諸江南歲二千餘萬絀則連章入告贏不復請稽核是時可喜鎮廣東

繼茂子精忠鎮福建與三桂並稱三藩而三桂驕恣尤甚十二年二月上遣侍衛吳丹扈塞立勞三桂賜御用貂帽團龍裘青蟒狐腋袍束帶亦遣使賛可喜可喜旋疏引疾乞歸老下部議請併移所部七月三桂亦疏請移藩並言所部繁衆昔自漢中移雲南閱三歲始畢今生齒彌增乞賜土地視世祖時分畀錦州寧遠諸區倍廣庶安輯得所聖祖察三藩分鎮擅兵爲國患得三桂疏下議政王大臣會戶兵二部議奏諸王大臣度三桂疏非由衷遽議遷徙必致紛紜議移藩不便獨尙書米思翰明珠謂苗蠻既平三桂不宜久鎮議移藩便乃爲二議以上一議移三桂山海關外別道滿洲兵戍雲南一議留三桂鎮雲南如故上曰三桂蓄異志久撤亦反不撤亦反不若及今先發猶可制也遂命允三桂請移藩並諭如常用滿洲兵仍俟三桂奏請遣發卽令侍郎折爾肯學士傅達禮齋詔諭三桂三桂初上疏度廷議未即許冀慰留久鎮九月詔使至三桂大失望與所部都統吳應麒吳國貴副都統高大節及其婿夏國相胡國柱謀爲亂部署腹心扼關隘聽入不聽出與使者期以十一月己丑發雲南先三日

丙戌邀巡撫朱國治脅之叛不從榜殺之遂召諸總兵寶起隆之復足法會屏  
藩等舉兵反自號周王天下都招討兵馬大元帥蓄髮易衣冠輶色白步騎皆  
以白氈爲帽執折爾肯傳達禮按察使李興元知府高顯辰同知劉崑不爲三  
桂屈具楚毒徒置瘴地國柱及總兵杜輝柯鐸布政使崔之瑛等皆降三桂傳  
檄遠近並致書平南靖南二藩及貴州四川湖廣陝西諸將吏與相識者要約  
響應遣馬寶將兵前驅向貴陽李本深謀應之文焜馳書告川湖總督蔡毓榮  
並趣折爾肯傳達禮從官郎中黨務禮員外郎薩穆哈主事辛珠筆帖式薩爾  
圖速還京師告變三桂遣騎追之辛珠薩爾圖爲所殺文焜率數騎趨鎮遠鎮  
遠副將江義已得三桂檄以兵圍文焜文焜死之寶兵至巡撫曹申吉總兵王  
永清皆降十二月黨務禮薩穆哈至京師三桂反問聞上以荊州咽喉地即日  
遣前鋒統領碩岱率禁旅馳赴鎮守尋命順承郡王勒爾錦爲甯南靖寇大將  
軍率師討三桂分遣將軍赫業入四川副都統馬哈達擴爾坤駐軍兗州太原  
備調遣並停撤平南靖南二藩王大臣等請逮應熊治罪命暫行拘禁三桂兵

陷清浪衛航榮遣總兵崔世祿防沅州三桂兵至以城降復進陷辰州十三年正月三桂僭稱周王元年部署諸將楊寶應陷常德夏國相陷澧州張國柱陷衡州吳應麒陷岳州偏沅巡撫盧震棄長沙走副將黃正卿參將陳武衡以城降襄陽總兵楊來嘉舉兵叛鄖陽副將洪福舉兵攻提督佟國瑞擊破之走保山寨皆應三桂受署置三桂自雲南至常德具疏付哲爾肯傳達禮還奏語不遜上命誅應熊及其子世霖諸幼子貸死入官六月命貝勒尚善爲安遠靖寇大將軍與勒爾錦分道進兵是時雲南貴州湖南地皆入三桂通番市以茶易馬結保羅助戰伐木造巨艦治舟師採銅鑄錢文曰利用所至掠庫金倉粟資軍用勒爾錦師次荊州三桂遣劉之復王會陶繼智等屢以舟師攻彝陵勒爾錦遣將屢擊敗之未即渡江尙善師次武昌以書諭三桂降置不答三桂傳檄所至反者四起提督鄭蛟麟總兵譚宏吳之茂反四川巡撫羅森降將軍孫延齡以有德舊部反廣西精忠反福建河北總兵蔡祿反彰德三桂勢益張又遣使與達賴喇嘛通好達賴喇嘛爲上書乞罷兵上弗許先後遣經略大學士莫

洛大將軍康親王傑書貝勒董額等四出征撫將軍阿密達擒祿誅之上趣尙善攻岳州三桂使吳應麒廖進忠馬寶張國柱柯鐸高起隆等分道拒戰又遣兵窺江西循江達南康陷都昌復自長沙入袁州陷萍鄉安福上高新昌諸縣上命安親王岳樂爲定遠平寇大將軍徇江西簡親王喇布爲揚威大將軍鎮江南時王輔臣已爲陝甘提督復以審羌叛應三桂莫洛死之三桂遣其將王屏藩入四川與吳之茂合軍助輔臣上復趣尙善速攻岳州尙善疏請益兵未即進十四年正月上命岳樂自袁州取長沙岳樂遣兵先後克上高新昌東鄉萬年安仁新城諸縣復進克廣信饒州夏國相堅守萍鄉攻之不下上以岳樂師向湖南命喇布移鎮南昌三桂遣將率兵七萬衆羅三千防醴陵築木城以守又於岳州城外掘濠三重環竹木爲扉於洞庭湖峽口植叢木爲椿阻舟師陸軍築壘皆設鹿角重疊阻騎兵乃自常德赴松滋駐舟師虎渡口截勒爾錦尙善兩軍使不相應揚言將渡江攻荊州決隄以灌城分岳州守兵據井陵東北鎮荆山令王會楊來嘉洪福等合兵陷穀城執提督馬胡拜攻鄖陽均州南

澤勒爾錦遣貝勒蔡尼守彝陵與都統宜理布等力禦之疏請益兵上責勒爾  
錦逗遛不許是歲察哈爾布爾尼叛上遣大將軍信親王鄂札副將軍大學士  
圖海擊破之十五年三桂遣兵侵廣東授之信招討大將軍時可喜已病篤之  
信遂降三桂別遣其將韓大任高大節將數萬人陷吉安上令喇布固守饒州  
岳樂攻萍鄉力戰破十二壘斬萬餘級國相引兵走乃克之師進復醴陵瀏陽  
復進攻長沙三桂遣胡國柱益兵以守馬寶高起隆自岳州以兵會三桂自松  
滋移屯嶽麓山爲長沙聲援又令大任大節自吉安分兵犯新淦屯泰和復陷  
萍鄉醴陵斷岳樂軍後上嚴趣喇布援岳樂乃自饒州進復餘干金谿攻吉安  
大節將四千人來拒戰於大覺寺以百騎陷陳師左次螺子山大節復以少兵  
力戰喇布及副將軍希爾根倉卒棄營走師敗績會大任與大節不相能大節  
快快死喇布遣兵復圍吉安大任不敢出戰勒爾錦以三桂去松滋率兵渡江  
取石首遣貝勒察尼攻太平街三桂兵壘師敗績退保荊州是歲大將軍大學  
士圖海代董額征陝西輔臣降上令將軍穆占將陝西兵赴荊州康親王傑書

自浙江下福建精忠降之信亦遣使詣喇布降延齡聞亦願降三桂使從孫世  
琮襲桂林執而殺之掠柳州橫州平樂南寧十六年尙善分兵送馬三千益岳  
樂軍三桂邀奪於七里臺復遣兵援吉安與喇布軍相持穆占自岳州進與岳  
自嶽麓徙衡州分兵犯南安韶州並益世琮兵掠廣西十七年岳樂復平江湘  
陰三桂將林興珠率所將水師降穆占攻永興拔之並下茶陵攸酃安仁興甯  
郴宜章臨武藍山嘉禾桂陽桂東十二城喇布亦與江西總督董衛國率師逐  
大任及於甯都大任敗走福建詣傑書降三桂遣馬寶胡國柱等攻永興都統  
宜理布護軍統領哈克山出戰死穆占與碩岱等力守是歲三桂年六十有七  
兵興六年地日蹙授日寡思竊號自娛其下爭勸進遂以三月朔稱帝改元昭  
武以衡州爲定天府置百官大封諸將首國公次郡公亞以侯伯造新歷舉雲  
貴川湖鄉試號所居舍曰殿瓦不及易黃以漆髹之構蘆舍萬間爲朝房築壇  
衡山行郊天卽位禮將吏入賀是日大風雨草草成禮而罷俄病噎八月又病

下利隙不能語召其孫世璠於雲南未至乙酉三桂死竇國柱攻永興方急聞喪自焚其坐引軍還衡州世璠應熊庶子留雲南奔三桂之喪至桂陽其下擁稱帝改號洪化倚方光琛郭壯圖爲腹心光琛三桂所署大學士壯圖封國公三桂初起兵其下或言宜疾行渡江全師北向或言直下金陵扼長江絕南北運道或言宜出巴蜀據關中塞穀函自固三桂皆不能用屯松滋與勒爾錦夾江而軍相持皆不敢渡江決戰既還援長沙晚乃欲通閩粵道糾精忠之信復叛攻永興未下而死吳國貴復議舍湖南北向爭天下陸軍出荆襄趨河南水軍下武昌掠舟順流撼江左諸將俱重棄演黔馬寶首梗議乃罷上以勒爾錦頓兵荊州不進時尙善卒貝勒察尼代爲安遠靖寇大將軍攻岳州吳應麒守堅久未下下詔將親征聞三桂死乃罷趣諸軍分道並進並敕招撫陷賊官民察尼屯君山不能斷湖道至是造烏船百艘四百餘配以兵三萬水師始成軍以貝勒鄂鼐統之用林興珠策以其半泊君山斷常德道以其半分泊扁山香爐峽布袋口諸地陸軍屯九貴山斷岳州衡州道水陸綿亘百里岳州餽竭

援窮應麒與諸將江義巴養元杜輝駕巨艦二百乘風犯柳林嘴察尼令水師  
掉輕舟越敵艦發礮擊之毀過半兵皆入水死應麒復將五千人犯陸石將軍  
鄂訥前鋒統領杭奇率師擊之應麒敗走杜輝有子在師中通使約降事泄應  
麒殺輝諸將日構隙陳華李超王度沖等以舟師降應麒收殘卒挾輜重潰圍  
奔長沙胡國柱亦棄城與俱走察尼率師自岳州進克華容安鄉湘潭衡山諸  
縣勒爾錦聞三桂死率師自荊州渡江三桂所部勒水師泊虎渡上游陸師屯  
鎮荆山皆潰走分兵定松滋枝江宜都石門慈利澧州進克常德喇布率師入  
衡州進取祁陽耒陽復進克寶慶是時吳國貴自衡州退屯武岡與馬寶俱吳  
應麒自岳州退屯辰州胡國柱自長沙退屯辰龍關相犄角力守穆占師進克  
永明江華東安道州復進取永州岳樂師自衡州復常寧攻武岡國貴以二萬  
人據楓木嶺拒戰岳樂令林興珠與提督趙國祚督兵奮擊國貴死兵潰貝子  
彭壽等逐至木瓜橋大破之武岡下上召岳樂還京師彭壽代爲定遠平寇大  
將軍令與穆占議進取是歲將軍莽依圖等帥徇廣西世琮走死十九年春將

軍趙良棟自略陽破陽平關克成都王進寶自鳳縣破武關取漢中王屏藩走  
保寧師從之戰於錦屏山薄城屏藩自殺保寧下進克順慶將軍吳丹提督徐  
治都自巫山克夔州重慶楊來嘉譚宏先後降察尼攻辰龍關出間道襲破之  
克辰州楊寶蔭崔世祿皆降章泰帥克沅州吳應麒胡國柱走貴陽上召勒爾  
錦察尼還京師趣彰壽與穆占蔡毓榮等自沅州喇布自南寧吳丹趙良棟自  
遵義二道並進世璠令應麒與王會高起隆夏國相合兵入四川掠瀘州敍州  
進陷永寧譚宏復叛陷夔州上復趣彰泰速下貴陽命資塔爲平南大將軍盡  
護廣西諸軍吳丹坐不援永寧罷命趙良棟盡護四川諸軍仍三道入雲南世  
璠召會起隆國相自四川還援貴陽令馬寶胡國柱等掠四川十月彰泰帥克  
鎮遠世璠將張足法等敗走復進取平越克新添龍里二衛薄貴陽世璠與應  
麒等奔還雲南貴陽與安順石阡都勻諸府並下世璠所署侍郎郭昌邱元總  
兵滅世遠齊聘金文臺等率將吏百數十人兵一千三百有奇詣彰泰軍降師  
復進世璠所署總兵蔡國昌平遠知府鄭開樞等以平遠降戰於永寧至雞公

背世璠兵焚盤江鐵索橋走普安土司龍天祐永甯土司沙起龍禮廷試造浮橋濟師二十年春世璠以高起隆爲大將軍與夏國相王會王永清張足法等將二萬人拒彰泰復陷平遠屯城西南山上穆占與提督趙賴進擊破之起隆等走會降復取平遠彰泰師進次安南衛世璠將線彊巴養元鄭旺李繼業以萬餘人屯盤江西坡爲象陳師初戰爲彊等所敗越二日彰泰令總兵白成功等進擊戰於沙子哨力鬥自午至酉師分隊奮進彊等夜走遣都統龐圖等逐之至臘茄坡再戰彊等退保交水城克新興所普安州黔西大定諸府皆下斬世璠所署巡撫張維堅賚塔師自田州進次西隆州世璠將何繼祖以萬人屯石門坎守隘賚塔督兵分隊進攻奪隘復安籠所繼祖退至新城所復與世璠將詹養王有功等合兵二萬人屯黃草壩爲象陳堅守賚塔督兵進力戰奪隘二十二獲養有功俘兵千餘復進破曲靖取交水城彊等復走遂克馬龍州易龍所揚林城彰泰師亦至兩軍會於嵩明二月進攻雲南會城屯歸化寺世璠遣將胡國柄等將萬人爲象陳拒戰彰泰賚塔督兵進擊大破之斬國柄及裨

將九俘六百餘追之薄城世璠將張國柱李發美等先後降臨安姚安大理鶴慶麗江諸府悉下世璠召馬寶胡國柱夏國相等還救雲南上諭趙良棟等分兵邀擊寶等寶自尋甸至楚雄屯烏木兵潰與巴養元趙國祚鄭旺李繼業郎應璧等詣姚安降國柱自麗江鶴慶入雲龍州窮蹙自縊死夏國相白平越敗後走廣西總兵李國樑遣兵圍之亦與王永清江義等出降世璠援絕趙良棟師自夾江克雅州復建昌渡金沙江次武定復進次綏竹九月進與彭泰賀塔諸軍合時圍城已數月未下良棟議斷昆明湖水道主速攻督兵薄城圍之數重線緘等謀執世璠及郭壯圖以降世璠與壯圖皆自殺十月戊申緘等以城降穆占與都統馬齊先入城籍賊黨執方光琛及其子學潛從子學範磔於軍前戮世璠尸傳首京師世璠所署將吏一千五百餘兵五千有奇皆降雲南貴州四川湖廣諸省悉平上令宣捷詔赦天下二十一年春從議政王大臣請析三桂骸傳示天下懸世璠首於市磔馬寶夏國相李本深王永清江義親屬坐斬斬高敘隆張國柱巴養元鄭旺李繼業財產妻女入官三桂諸將馬寶王屏

潘最驍勇善戰竇初爲流賊降明桂王由榔爲將桂王奔南甸竇降於三桂爲忠勇中營總兵三桂反率兵前驅盡陷貴州至湖廣南境諸郡縣封國公再入廣西一入四川敗走姚安詣希福軍降至是死屏藩亦三桂所倚任代高啟隆爲忠勇左營總兵三桂反令入四川爲王輔臣聲援自秦州退守保寧敗我師蟠龍山十九年師克保寧自殺諸專閫大將叛降三桂助亂者雲南提督張國柱貴州提督李本深總兵王永清副將江義四川總兵譚宏吳之茂湖廣總兵楊來嘉廣東總兵祖澤清而陝西提督王輔臣兵最强亂尤劇國柱明副將來降從續順公沈永忠下湖南又從可喜定廣東累遷至提督三桂反授以大將軍封國公陷衡州圍長沙戰岳州皆國柱力師圍世璠乃自大理出降本深明總兵高傑甥傑死以提督代將降於豫親王多鐸授三等精奇尼哈番累遷至提督三桂反授以將軍彰泰師克貴陽出降永清以黔西鎮義以鎮遠協狀文焜先後附三桂至是同死洪初以明將降累遷至總兵三桂反與四川提督鄭蛟麟總兵吳之茂合謀叛蛟麟明都司自松山降三桂使犯漢中戰敗復出降

洪獨力戰屢攻郎陽三桂授以將軍封國公洪死子天祕走萬縣久之始出降送京師是年五月磔死之茂與屏藩合軍援輔臣攻秦州力戰敗走松潘還與屏藩守漢中城下就擒送京師誅之來嘉初以鄭錦將降授總兵三桂反與副將洪福同叛三桂授以將軍來嘉屢攻南漳福屢攻均州勒爾錦師渡江福先降來嘉敗走巫山復走重慶城下出降送京師未至死澤清大壽子以高州叛降三桂尙之信降澤清亦降俄復叛命之信討之克高州獲澤清及其子良棟送京師磔死輔臣初爲盜號馬鵝子從姜瓖爲亂降於英親王阿濟格尋以侍衛從洪承疇南征事承疇謹除總兵三桂留授援勦右鎮從入緬甸破桂王遷提督三桂反招使叛輔臣以聞授三等精奇尼哈番官其子繼貞經略大學士莫洛自陝西入四川以輔臣從次審羌脅衆擊殺莫洛反三桂授以大將軍固原定邊臨洮蘭州同州諸將吏悉附大將軍貝勒董額討焉輔臣保平涼久不下大學士圖海代將督兵力攻乃出降詔復官爵加太子太保授靖寇將軍從圖海駐漢中輔臣內不自安與其妻妾縊獨不死圖海師還偕至西安一夕死

上不深罪但命停世襲寵繼貞官耿精忠靖南王繼茂子順治中繼茂遣入侍世祖授以一等精奇尼哈番尙肅親王豪格女封和碩額駙康熙十年繼茂卒襲爵十二年疏請撤藩許之遣侍郎陳一炳如福建料理三桂反命仍留鎮召一炳還三桂以書招精忠精忠與藩下都統馬九玉總兵曾養性江元勳參領白顯忠徐文耀王世瑜王振邦蔣得鉉等謀應三桂獨九玉以爲不可養性等皆贊之十三年三月發兵反脅總督范承謨不屈執而幽之並及其賓從眷屬巡撫劉秉政降精忠自稱總統兵馬大將軍蓄髮易衣冠鑄錢曰裕民通寶以養性顯忠元勳爲將軍分陷延平邵武福甯建甯汀州諸府約三桂合兵入江西嗾湖州總兵劉進忠擾廣東又招鄭錦發兵取沿海郡縣爲聲援浙江總督李之芳聞亂出駐衢州遣副將王廷梅等四出禦戰上命將軍賀塔出浙江將軍希爾根出江西創精忠爵號討仍遣郎中周襄緒偕精忠護衛陳嘉猷齋敕招撫精忠留之軍中養性與林沖徐尙朝馮公輔沙有祥等將萬餘人出仙霞關陷江山平陽游擊司定猷縛總兵蔡朝佐以城降渡飛雲江攻瑞安不下移

師攻溫州總兵祖宏勤以城降巡道陳丹赤永嘉知縣馬璘死之精忠授宏勤將軍衆至十萬陷樂清天台仙居嵊縣而寧海象山新昌餘姚諸縣土寇競起養性請於精忠官其渠使屯大嵐山擾紹興寧波破黃巖總兵阿爾泰降分兵犯金華精忠與其將周列王飛石朵明等陷廣信建昌饒州復合玉山永豐土寇東犯常山陷開化壽昌淳安遂安諸縣別遣兵攻徽州婺源祁門上令康親王傑書爲奉命大將軍貝子傅喇塔爲寧海將軍率師下浙江又以岳樂喇布兩軍爲聲援將軍賚塔師次衢州養性自常山來犯賚塔同之芳遣兵擊卻之副將牟大寅戰常山斬精忠將張宏洪起元戰紹興復嵊縣鮑虎戰淳安擒飛石明復壽昌遂安養性尙朝等以五萬人攻金華副都統瑪哈達總兵陳世凱等與戰於木道山斬二萬餘級養性走天台十四年養性復以步騎數萬攻金華遣其將朱飛熊率舟師水陸並進傅喇塔擊斬飛熊養性退屯茂平嶺巡道許宏勤擊破大嵐山土寇斬其渠傅喇塔督兵自閒道出茂平嶺背養性兵潰復黃巖樂清養性走保溫州傅喇塔督兵合圍瑪哈達擊敗尙朝公輔有祥等

復處州穆赫林擊敗林沖復仙居喇布以兵助將軍額楚定徽州婺源祁門將軍希爾根亦復建昌饒州岳樂師次南昌諭精忠精忠以謾書答之上復遣其弟聚忠齋敕諭降至衢州精忠拒不納精忠母周氏阻精忠母叛精忠不聽周氏憤死精忠攻衢州戰屢敗以馬九玉爲將軍率兵屯江山而鄭錦兵至據漳諸地與精忠構數尙可喜請援上令喇布自江西下廣東精忠遣其將邵連登等擾建昌進攻撫州贛州三桂兵陷袁州吉安相犄角阻師行尙之信亦叛十五年春傅喇塔自黃巖進攻溫州力戰屢破敵坐養性憑江拒戰累月未能薄城上趣傑書自金華至衢州下福建八月傑書與賚塔之芳督兵擊九玉戰於大溪灘九玉敗走克江山招仙霞關守將金應虎降遂入關拔浦城鄭錦兵侵興化將及福州精忠勢漸蹙謀出降先使人狀承謨及其客嵇永仁等傑書師進次建陽書諭降精忠答書請宣詔赦罪師復進克建甯次延平精忠遣其子顯祚及襄緒嘉猷出迎師傑書使齋敕宣示精忠乃出降請從軍討錦自效傑書以聞詔復辭以其弟昭忠爲鎮平將軍駐福州命精忠從軍討錦錦敗還

臺灣乃移師趨潮州進忠出降令精忠駐焉養性在溫州屢出戰傅喇塔督兵擊破之養性墮水復入城困守精忠降亦降仍爲藩下總兵十六年遣顯祚入侍授散秩大臣藩下參領徐鴻弼等使赴兵部具狀訐精忠降後尙蓄逆謀昭忠亦以鴻弼等狀聞上留中未發十七年上令精忠還福州以其祖及父之喪還葬是秋三桂死傑書疏請誅精忠上諭曰今廣西湖南四川俱定賊黨引領冀歸正者不止千百驟誅精忠或致寒心宜令自請來京庶事皆寧貼十九年精忠請入覲上以九王爲總兵轄藩下兵昭忠衆忠又疏劾精忠上乃下鴻弼等狀令法司按治繫精忠於獄遣案忠赴福州宣撫所部是歲之信以悖逆誅二十年雲南平二十二年法司具獄上上諭廷臣欲寬之大學士明珠奏精忠負恩謀反罪浮於之信乃與養性顯忠元勳進忠文耀世瑜振邦得錄並磔於市顯祚宏勳等皆斬秉政速詣京師道死尙之信平南王可喜子順治中可喜遣入眷廿九年以可喜力爭之不允至丙午十一月三十日上諭命之行佐軍事之信醉酒嗜殺可喜老病營別宅以居號令自擅十二年可喜用其客

金光策上疏請以二佐領歸老海城而以之信豐爵留鎮光浙江義烏人佐可喜久以捕佛山亂民江馳翥功授鴻臚寺卿銜屢以之信暴戾狀告可喜爲可料理三桂反命可喜仍留鎮召清標還總兵劉進忠以潮州叛可喜遣次子之孝率兵討之上授之孝平南大將軍而命之信以討寇將軍銜協謀征剿鄭錦遣兵助進忠總兵祖澤清復以高州叛孫延齡將馬雄引三桂將董重民李廷棟王宏勳等陷雷廉二郡之孝退保惠州十五年春可喜病益劇之信代治事三桂招可喜藩下水師副將趙天元總兵孫楷宗相繼叛之喜遂降三桂遣兵守可喜藩府戒毋白事殺光以徇罷之孝兵使侍可喜可喜以憂憤卒三桂授之信招討大將軍輔德公旋進號輔德親王而以重民爲兩廣總督駐肇慶謝厥扶者故艇戶以繪船數百附馬雄天元之叛厥扶實誘之三桂亦授以將軍使與重民水陸相援應屢檄之信出兵之信賂以庫金十萬乃不復相促迫之信旋遣使詣喇布軍具疏請立功贖罪上敕慰諭之十六年之信復疏請敕趣

喇布軍入廣東之信密嗾重民所部兵噪索餉乘閒擒重民擊敗厥扶走入海乃遣副都統尙之琰迎師疏言閩屬歸正並請敘藩下總兵王國棟長史李天植等襄贊功時方多故而可喜有大勳上優容之命之信襲平南親王國棟等復舊職之信使入貢上諭曰昔爾先人在時屢獻方物比年事變信使弗通每念爾先人忠貞不二爲國忘家朕甚愍焉王克承先志遣使遠來朕見物輒念爾先人王其安輯粵東以繼爾先人未盡之志貢獻細務勞人費事今當暫止是年秋三桂遣其從孫世琮據廣西巡撫傅宏烈率師討之復梧州潯州規取桂林之信令總兵尙從志以三千人從上令之信自韶州進取宜章柳州永州之信不赴將軍莽依圖攻韶州擊敗三桂將馬寶胡國柱等上命之信移師梧州又不赴十七年春上以莽依圖深入廣西命之信策應之信仍以高雷廉三郡初定疏請留鎮省城上乃命發兵應莽依圖之信遣國棟率兵赴宜章及三桂死之信乃請自進廣信命爲奮武大將軍從師並進十八年天元出降之疏請誅之師進次橫州自言病作遽還上命以所部從莽依圖並進之信令藩

下總兵時應運率以往及莽依圖將攻桂林留應運守南寧三桂兵據武宣之信又疏言海寇宜防將召應運還上復諭趣之十九年春之信乃自將攻武宣之信與之孝不相能以之孝嘗典兵不欲其居廣州疏請遣還京師之信殘暴猜忌醉輒怒執佩刀擊刺又屢以鳴鏑射人楷宗叛復降上貸其罪之信杖殺之護衛張永祥爲之信薦疏詣京師上召見授總兵之信故阻抑復屢辱以鞭箠怒護衛張士選語忤射之殘其足諸護衛皆不平國棟與副都統尙之璋總兵甯天祚密謀圖之信巡撫金僞疏言之信凶殘暴虐猶存異志臣察其左右俱義憤不平因密約都統王國棟等共酌機宜之信日夕就擒乞赦議行誅以爲人臣懷二心者戒國棟亦上疏自述與僞之璋天祚合謀圖之信又代之信母舒氏胡氏疏言之信怙惡不悛有不臣之心恐禍延宗祀乞上行誅上諭趣之信出師之信既赴武宣承祥士選詣京師告變上遣侍郎宜昌阿以巡視海疆至潮州諭將軍賚塔移師並令總督金光祖提督哲爾肯副都統金榜選總兵班際盛傳詔逮之信之信與光祖榜選際盛等攻克武宣之信入城光祖等

屯城外得國棟檄合兵圍城傳詔逮之信之信就逮還廣州上疏自辯上令削爵逮詣京師藩下兵駐廣西訛言師至雲南即分置城守衆情惶懼上命宜昌阿賚塔宣敕慰諭七月宜昌阿將以之信赴京師天植怒國棟發難白之信母與之信弟之節之璜之瑛召國棟議事伏兵殺之賚塔率兵捕治天植自服造謀之信不與聞護衛田世雄言之信實使天植殺國棟獄上上命賜之信死之節之璜之瑛天植皆斬舒氏胡氏貸其罪並母籍沒世雄以不先發坐杖流上復諭宜昌阿曰之信雖有罪其妻子不可凌辱當護還京師又令察罷之信諸虐政所部十五佐領改隸漢軍駐防廣州之信初叛提督嚴自明附之自明明參將降從總督孟喬芳征撫陝甘又擊張獻忠破桂王有功授三等阿哈尼哈番之信遣攻南康敗走南安先之信降授鑾儀使病死孫延齡漢軍正紅旗人父龍從孔有德來歸授二等阿思哈尼哈番從有德廣西有德以女四貞字延齡及有德死事龍亦戰死加拖沙喇哈番以延齡襲四貞尙幼還京師孝莊皇后育之宮中賜白金萬歲俸視郡主長命仍適延齡有德所部諸將線國安功

最高國安與有德同起事偕來降從入關西破李自成南破桂王累擢廣西提督駐南寧李定國陷桂林盡殺其孥國安與總兵馬雄全節力戰復桂林走定國累加太子太保征蠻將軍封三等伯統有德舊部駐桂林康熙五年以老乞休上以延齡有德增四貞生長軍中習騎射通武事乃授延齡鎮守廣西將軍代國安統有德舊部予四貞郡主儀仗偕赴鎮延齡漸驕縱十一年御史孟一士劾延齡擅除武職兵部既駁奏延齡復疏請恣肆不臣上命申禁十二年所部都統王永年副都統孟一茂參領胡同春李一第等列延齡縱兵殃民狀牒總督金光祖光祖以聞上遣侍郎勒德洪按治得實請逮延齡治罪特命寃之三桂反上授延齡撫蠻將軍起國安都統時節已前卒雄代國安爲提督命與巡撫馬雄鎮合謀勦禦十三年二月延齡舉兵反殺永年一茂同春一第幽雄鎮及其眷屬詔奪官爵聲討延齡乃上疏言光祖雄誘永年等謀害上審其誣論尙可喜興光祖籌策進攻延齡自稱安遠大將軍移牒平樂梧州諸郡雄與總兵江義亦以柳州叛應三桂國安病死延齡招致萬羊山土寇與所部合設

五鎮鎮兵二千俄又自稱安遠王慶陽知府傅宏烈當三桂未反疏發諸不軌事謫戍蒼梧延齡既叛授以將軍宏烈說延齡迎師四貞尤力勸之十六年延齡遣宏烈迎師江西三桂調知之使從孫世琮率兵逼桂林執殺延齡四貞督兵禦戰世琮乃留其將李廷棟戍桂林出掠平樂潯州橫州南甯宏烈還至平樂延齡將劉彥明徐洪鎮徐上遠等擒斬廷棟與國安子成仁並出降四貞還京師雄亦從定國南征有功授二等阿思哈尼哈番既與義叛義偕嚴自明攻南康敗走雄旋病死雒容子承蔭出降進伯爵授左江總兵十九年二月復叛給宏烈登舟襲破其營殺之六月復降逮詣京師論死義奪官放還原籍

論曰聖祖初親政舉大事書殿柱即首三藩可喜乞歸老曷嘗言撤藩撤藩自廷議質上指也三桂反精忠等響應東南六七行省皆陷寇上先發兵守荊州阻寇毋使遠北分遣禁旅屯太原兗州江寧南昌首尾相顧次第漸進千里赴門而師不勞三桂白首舉事意上方少諸王諸將帥佐開國者皆物故變起且恆擾及聞上從容指揮軍報迅速闢外用命始歎非所料制勝於廟堂豈不然

歎上不欲歸咎建議撤藩諸臣三桂等奉詔罷鎮亦必曲意保全之情乎三桂等未能喻也

清史稿

列傳二百六十二

洪秀全

洪秀全廣東花縣人少飲博無賴以演卜游粵湘間有朱九疇者倡上帝會亦名三點會秀全及同邑馮雲山師事之九疇死衆以秀全爲教主官捕之急乃往香港入耶蘇教藉抗官旋偕雲山傳教至廣西居桂平時秀全妹培蕭朝貴及楊秀清韋昌輝皆家桂平與相結納貴縣石達開亦來入教秀全嘗患病詭云病死七日而蘇能知未來事謂上帝召我有大劫惟拜上帝可免凡會中人男稱兄弟女稱姊妹欲人皆平等託名西洋教自言通天語謂天父名耶和華耶蘇其長子已爲次子嗣是輒臥一室禁人窺伺不進飲食厯數日而後出出則謂與上帝議事衆皆駁服復造寶誥真言諸僞書密爲傳布潛蓄髮藏山箐間嗾人分赴武宣象州藤縣陸川博白各邑誘衆入會初粵西歲饑多盜湖南雷再浩新寧李沅發復竄入爲亂粵盜張家福等各率黨數千四出俘劫秀全乘之與楊秀清創立保良攻匪會練兵籌餉歸附者益衆桂平知縣誘而執之

搜獲入教名冊十七本巡撫鄭祖琛不能決遂釋之秀全既出獄秀清率衆迎歸招集亡命貴縣秦日綱林鳳詳揭揚海盜羅大綱衡山洪大全皆來附有衆萬人馮雲山讀書多智計爲部署隊伍攻守方略以歲值丁未應紅羊之讖遂乘勢倡亂於金田破鄭祖琛職起前雲貴總督林則徐爲欽差大臣往督師則徐薨於途以兩廣總督李星沅代之赴廣西剿寇竄竇平南恩旺城副將李殿元擊却之復回撲巡檢張鏞不屈死仍遁金田星沅檄清江協副將伊克坦布往攻被圍陣亡星沅檄鎮遠總兵周鳳岐往援戰一晝夜斃寇數百圍始解上以寇勢日熾命前漕運總督周天爵署廣西巡撫乃請提督向榮專勦金田咸豐元年秀全僭號爲天王縱火焚其城盡驅衆分擾桂平貴武宣平南等縣入象州上命廣州副都統烏蘭泰會討以大學士賽尙阿爲欽差大臣率都統巴清德副都統達洪阿馳防烏蘭泰至象州三戰皆捷疏言粵西寇衆皆烏合惟東鄉僭號設官易服蓄髮有大志兇悍過羣盜實腹心大患周天爵主滾營進逼驅諸羅深洞盡殲之向榮不謂然檄貴州鎮總兵秦定三移營大林堵北竄

象州道定三亦不奉命四月秀全自大林逸出走象州犯桂平新墟賚尙阿增  
調川兵募鄉勇合三萬人分兵要隘一日戰七勝斬捕二千寇仍遁新城七月  
竄紫金山山前以新城爲門戶後以雙髻山猪仔峽爲要隘巴清德與川楚鄉  
勇出其後上下奪雙髻山寇大潰屯風門均向榮率諸軍三路攻之陣斃章昌  
輝弟章亞孫章十一等始遁走我軍追之會大雨軍仗盡失閏八月寇分二路  
東走藤北犯永安陷之遂僭號太平天國秀全自爲天王妻賴氏爲后建元天  
德以秀清爲東王軍事皆取決蕭朝貴西王馮雲山南王章昌輝北王石達開  
翼王洪大全天德王秦日綱羅亞旺范連德胡以晃等四十八人任丞相軍師  
僞職時官軍勢勝寇知不可敵有散志秀清獨建議封王以羈縻之勢燼而復  
熾九月大軍移陽朔會攻永安賊分屯莫家村烏蘭泰建中軍旗於秀才嶺上  
植一紅蓋下埋地雷誘敵燔殺四千大軍乘之遂克莫家村二年正月大兵圍  
永安燐東西礮臺二月石達開分兵爲四敗我軍於壽春營進破古東沖小路  
關僞丞相秦日綱由水竇屯仙回嶺烏蘭泰分兵夾擊斃寇數千擒僞天德王

洪大全檣送京師磔之市時大雨如注烏蘭泰提精卒入山山路浮滑寇乘我軍陣未定短兵衝突遂大敗秀全從楊秀清謀由猺山馬嶺間道徑撲桂林烏蘭泰率敗卒追之城南將軍橋受重創卒於軍三月賊徑趨廣西省城向榮先一時繞道至省寇踵至已有備相持不能拔解圍而北馮雲山羅大綱先驅陷興安全州將順流趨長沙浙江知縣江忠源禦之棄衣渡馮雲山中被死寇退走道州道州俗悍多會匪所至爭爲效死勢復張六月陷江華寧遠嘉禾七月陷桂陽州江忠源蹕至一戰走之趨彬州蕭朝貴以膽智自豪謂羣寇遲悞又調長沙守兵單可襲而取也乃率李開芳林鳳祥由永興茶陵醴陵趨長沙設幕城南八月蕭朝貴攻南門官兵擊之殪戶埋老龍潭後起出梟其首秀全聞朝貴死自郴州至督攻益急九月掘隧道攻城屢不獲逞十月秀全於南門外得僞玉璽稱爲天賜脅衆呼萬歲遂夜渡湘水由回龍塘竄寧鄉抵益陽擄民船數千出臨資口渡洞庭陷岳州城中舊儲吳三桂軍械至是盡以資寇寇入長江旬日間奪五千艘婦孺貨財盡驅之滿載秀全駕龍舟樹黃旗列巨礮夜

則張三十六燈他船稱是數十里火光不絕如晝遂東下十一月陷漢陽十二月攻武昌時楊秀清司軍令李開芳林鳳詳羅大綱掌兵事值武漢二江屆冬水涸乃擄船作浮橋環以鐵索直達省城分門攻之向榮馳至約城內夾攻巡撫常大淳慮城啓有失不許地雷發城遂陷秀全出令民人蓄髮束冠巾建高臺小別山下演說弔民伐罪之意三月上以賽尙阿久無功授兩廣總督徐廣縉爲欽差大臣時石達開攻武昌廣縉逗留岳州不敢進上責其罪更以向榮爲欽差大臣日夜攻之急寇乘武昌駕船東下衆號五十萬資糧軍械子女財帛盡置舟中分兩岸步騎夾行進向九江下黃州武昌薪水等十四州縣抵廣濟縣下武穴鎮兩廣總督陸建瀛率兵二萬餘船千五百艘上溯遇寇不戰而走前軍盡覆建瀛狼狽還金陵寇薄九江而下收官軍委乘礮仗破安慶巡撫蔣文慶死之寇奪銀米無算水陸並進抵金陵沿城築壘二十四具戰船起新州大勝關巡邏至七洲里止晝夜環攻掘地道壞城守兵潰亂建瀛易服走爲寇所戕將軍祥厚偕副都統崔隆武等守滿城二日城陷皆死之城中男女死

者四萬餘閹童子三千餘人洩守城之忿秀全既破金陵遂建僞都擁精兵六十餘萬羣上頸稱明代後嗣首謁明太祖陵舉行祀典其祝詞曰不肖子孫洪秀全得光復我大明先帝南部疆土登極南京一遵洪武元年祖制軍士夾道呼漢天子者三頒登極制誥大封將卒王分四等侯爲五等設天地春夏秋冬六官丞相爲六等殿前三十六檢點爲七等殿前七十二指揮爲八等炎水木金土正副一百將軍爲九等炎水木金土九十五總制爲十等炎水木金土正副一百監軍爲十一等前後左右中九十五軍帥爲十二等前後左右中四百四十五師帥爲十三等前後左右中二千三百七十五旅帥爲十四等前後左右中一千八百七十五卒長爲十五等前後左右中四萬七千五百兩司馬爲十六等又自檢點以下至兩司馬皆有職同名目其制大抵分朝內軍中守土三途朝內官如掌朝門左右史之類名目繁多日新月異軍中官爲總制監軍軍帥師帥旅帥卒長兩司馬凡攻城略地嘗以國宗或丞相領軍而練士卒分隊伍屯營結營接陣進師皆責成軍帥由監軍總制上達於領兵大帥以

取決焉其大小相制臂使指應統系分明甚得馭衆之道守土官爲郡總制州  
縣監軍鄉軍帥鄉師帥鄉旅帥鄉卒長鄉兩司馬凡地方獄訟錢糧由軍帥監  
軍區畫而取成於總制民事之重皆得決之自都金陵分兵攻克府廳州縣遂  
即其地分軍立軍帥以下各官而統於監軍鎮以總制監軍總制受命於僞朝  
自軍帥至兩司馬爲鄉官鄉官者以其鄉人爲之也軍帥兼理軍民之政師帥  
旅帥卒長兩司馬以次相承皆如軍制此外又有女官曰女軍師女丞相女檢  
點女指揮女將軍女總制女監軍女軍帥女卒長女管長卽兩司馬也共女官  
六千五百八十四人女軍四十女兵十萬人而職同官名目亦同總計男女官  
三十餘萬而臨時增設及恩賞各僞職尙不在此數也其軍制每一軍領一萬  
二千五百人以軍帥統之總制監軍監之其下則各轄五師帥各分領二千五  
百人每師帥轄五旅帥各分領五百人每旅帥轄五卒長各分領百人每卒長  
轄四兩司馬每兩司馬領伍長五人伍卒二十人共二十五人其陣法有四曰  
牽陣法凡由此至彼必下令作牽陣行走法每兩司馬執一旗後隨二十五人

百人則間卒長一旗五百人則間旅帥一旗一千五百人則間師帥一旗一萬二千五百人則間軍帥一旗軍帥監軍總制乘輿馬隨行一軍盡一軍續進寬路則令雙行狹路單行魚貫以進凡行軍亂其行列者斬其牽線行走時一遇敵軍首尾蟠屈鉤連頃刻忿集敗則聞敲金方退仍牽線以行不得斜奔旁逸曰螃蟹陣乃三隊平列陣也中一隊人數少兩翼人數多其法視敵軍分幾隊即變陣以應之如敵軍僅左右隊即以中隊分益左右亦爲兩隊如敵軍前後各一隊則分左右翼之前鋒爲一隊以後半與中一隊合而平列爲前隊接應如敵軍左右何隊兵多則變偏左右翼以與之敵如敵軍分四五隊亦分爲四五隊次第迎拒其大陣包小陣法或先以小隊警敵後出大陣包之或許敗誘敵追伏兵四起以包敵軍窮極變化至於損左益右移後置前臨時指揮操之司令兵士悉視大旗所往而奔赴之無敢或後曰百鳥陣此陣用之平原曠野以二十五人爲一小隊分百數十隊散布如星使敵軍驚疑不知其數之多寡敵軍氣餒即合而攻之曰伏地陣敵兵追北至山窮水阻之地忽一旗偃千旗

齊偃瞬息千里皆伏地不見敵軍見前寂無一卒訖異徊徘徊伏半時忽一旗立千旗齊立急趨撲敵往往轉敗爲勝其營壘或夾江夾河浮筏阻山據村市及包敵營爲營動合古法每數營必立一望樓瞭敵守城無布帳每五垛架木爲板屋木牆土牆亦環皮板屋地當敵衝則浚重濠築重牆濠務寬深密插竹簽重牆用雙層板片約以橫木虛其中如複壁中填沙石埠土築二重牆築物無定或密排樹株或積鹽包糖包及水浸棉花包異常堅固其攻城專恃地道謂之掩翻土營而外又有木營金營組織諸匠各營以指揮統之其總制至兩司馬皆如土營之制立水營九軍每軍以軍帥統之但未經訓練不能作戰專以船多威敵而已其旗幟亦有差等僞西王白緣僞東王黃綢旗紅字綠緣方一丈以下皆黃綢旗紅字而以緣別如僞西王白緣僞南王紫緣僞北王黑緣僞翼王藍緣其尺丈長闊則以五寸遞減豫王燕王皆黃綢尖旗紅字水紅緣國宗黃綢尖旗紅字其緣視何王國宗即從何色皆長闊八尺侯黃綢尖旗長闊七尺八寸丞相黃綢尖旗長闊七尺五寸檢點黃綢尖旗長闊七尺以上皆紅字水紅緣

指揮黃綢尖旗黑字水紅緣長闊六尺五寸將軍至兩司馬皆黃旗無緣形尖黑字自長闊六尺以下遞減至二尺五寸每一軍大小黃旗至六百五十六面之多軍中號令惟擊鼓敲金吹螺搖旗凡起行出隊俱擂鼓吹螺搖旗以集衆打仗則擊鼓呐喊收隊則鳴鉦有老軍新軍童子軍尤善用間諜混入敵營又能取遠勢聲東擊西就虛避實其以進爲退以退爲進往往令人不測墮其術中此其行軍之大略也其服色尙黃僞天王金冠雕鏽龍鳳如圓規沙帽式上繡滿天星斗下紺一統山河中留空格鑿金爲天王二字東王北王翼王冠如古兜鍪式冠額繡雙龍單鳳中立金字職銜國宗略同諸王式自檢點至兩司馬皆獸頭兜鍪式帽上龍以節數分等差如諸王九節侯相七節檢點指揮將軍五節總制監軍軍帥三節是也袍服則黃龍袍紅袍黃紅馬褂僞天王黃緞袍繡九龍自諸王以下至侯相遞減至四龍檢點素黃袍指揮至兩司馬皆素紅袍自僞王至兩司馬皆繡職銜於馬褂前圍內儀衛與馬諸王皆黃緞轎繡雲龍俟相檢點指揮皆紅緞轎將軍總制監軍綠轎軍帥帥旅帥藍轎卒長

兩司馬黑轎至金陵始建宮室毀總督署復擴民居以廣其址役夫萬餘窮極奢麗雕鏤螭龍鳥獸花木多以金爲之僞王皆建僞府馮雲山蕭朝貴早授首其子亦襲封建府其宗教制度半效西洋日登高殿集衆演說與人民以自由權解婦人拘束定僞律六十二條最爲慘酷然行軍嚴搶奪之令官軍在三十里外始準撫刦若官軍在前有取民間尺布百錢者殺無赦於安慶大星橋設榷關機礮船十艘環以鐵索木筏橫截江濱以防偷漏九江蕪湖及沿江州縣岔河小港地當衝要者一律設立僞卡徵收雜稅此其建國大略也既都金陵欲圖河北羅大綱曰欲圖北必先定河南大駕駐河南軍乃渡河至皖豫一出否則先定南九省無內顧憂然後三路出師一出湘楚一出漢中疾趨咸陽以徐揚席捲山左再出山右會獵燕都若懸軍深入犯險無後援必敗之道也且既都金陵宜多備戰艦精練水師然後可戰可守若待粵之拖罟咸集長江則運道梗矣今宜先備木筏堵截江面以待戰艦之成猶可及也秀清方專政不納乃遣僞丞相林鳳詳李開芳羅大綱曾立昌率衆東下秀全詔之曰師行間

道疾趨燕都無貪攻城奪地蹙時日大綱語人曰天下未定乃欲安居此都其能久乎吾屬無類矣二月林鳳詳等陷鎮州揚州令吳如孝等留守分據浦口瓜州諸隣向榮既復武昌踞寇而東抵金陵軍孝陵衛是謂江南大營都統琦善亦以欽差大臣率直隸陝西黑龍江馬步諸軍軍揚州城外是謂江北大營三月向榮破通濟門寇壘襲占七橋壘奪獲鍾山圍殲寇無算遂移大營逼城而軍四月漕運總督楊殿邦進攻揚州毀城外木城土壘東路寇悉避入城琦善勝保先後督攻五戰皆捷鳳詳留立昌踞揚城驅婦女及所刦貨財運回金陵率三十六軍北竄分擾滁州踞臨淮關陷鳳陽府其酋朱錫琨黃益芸等別率悍黨犯浦口攻六合知縣溫紹原率鄉團拒之夜火其營寇遁回金陵五月大兵圍揚州殺敵逾萬勝保自揚州踞其後力攻鳳陽寇遁河南楊秀清遣僞丞相古文元由浦口竄亳州偕林鳳詳陷永城犯開封省官兵擊破之又敗之汜水寇奔黃河渡口溺死無算楊秀清遣僞豫王胡以晃陷安慶又遣僞丞相賴漢英石祥貞攻九江湖口進圍南昌湖北按察使江忠源馳援江西入城固

守鳳詳等自汜水敗退犯鄭州熒陽六月圍懷慶以地道攻城不克鎮江寇出  
城撲我軍戰北固山下伏寇縱火七營皆被焚鄧紹良退守丹陽都司劉廷鑄  
等督潮勇馳援寇退入城復擾丹徒鎮劉廷鑄復擊退之向榮檄總兵和春與  
劉廷鑄紮徒陽連河之新豐鎮寇始不敢南竄常州獲安寇之圍懷慶也立木  
柵爲城深溝高壘我兵相持幾至六旬訥爾經額親督諸將分五路攻擊毀其  
木柵斃敵曾古文元鳳詳受重創解圍而遁河北肅清八月鳳詳竄山西陷平  
陽直抵洪洞竄直隸踞臨洺關擾至深州賴漢英等解南昌圍入湖北踞田家  
鎮之牛壁山九月踞入楚要隘水陸並進陷黃州其竄深州者旁擾樊城十月  
竄天津踞靜海屯獨流楊柳青諸鎮漢陽之寇分股北竄一陷孝感黃坡諸縣  
一由應城犯德安府爲防兵所遇合衆退黃州秦日綱等陷安徽桐城舒城侍  
郎呂賢基死之舒城既失賊遂徑撲廬州陷之廬州者安徽文武大吏之所僑  
寓以爲省治者也十一月秀全以揚州鎮江攻圍急遣賴漢英等領江西衆糾  
合儀徵黨援揚州又令安徽甯國灣沚進薄高淳湖蕪伺東塙圖解鎮江之圍

我軍均擊退之寇復由三汊河進撲死戰不退揚州寇曾立昌突出與賴漢英同竄瓜洲上以寇擾長江非立水師不能制其死命乃命在籍侍郎曾國藩練鄉勇創水師討寇初寇圍南昌城外寇壘僅文孝廟數座官軍屢攻不能克郭嵩燾偶獲諜訊之則寇皆舟居其壘則環三面築牆而虛其後專蔽舟楫而已嵩燾因與江忠源議曰東南州縣多阻水江湖遇風一日可數百里官軍率由陸路彊寇其勢常不及長江數千里之險獨爲敵有且寇上犯以舟楫而官軍以營壘禦之求與一戰而不可得宜寇勢之日昌也忠源即具疏請飭湖南北四川仿廣東施罟船式各造戰艦數千飭廣東製備礮位以供戰艦之用並交曾國藩督帶部署奉旨允行國藩遂治戰船於衡湘至是始成共募水勇四千分爲十營募陸勇五千亦分十營以塔齊布爲軍鋒國藩親統大軍發衡州水陸夾江而下初鎮江揚州儀徵瓜州四處寇互相應援不得破十二月琦善以揚州寇退瓜州勢孤督軍攻復儀徵乘勝追抵瓜州楊秀清遣胡以晃率黨十餘萬攻廬州巡撫江忠源晝夜抵抗以衆寡不敵城陷死之四年正月黃州寇

張高會總督吳文鎔出其不意襲之會大雪罷戰越數日秀清分兵設伏山  
崗命其黨率城軍撲營文鎔拒戰伏起火發十三營皆潰文鎔死之賊乘勝遂  
陷漢陽二月揚州軍進剿瓜州總兵瞿騰龍陣亡寇遣僞將孫寅山陷太平府  
踞爲巢自瓜州結壘屬於江以達金陵往來不絕秀清復遣石祥貞會漢黃寇  
薰湖江直上陷岳州溯流至銅官渚逼近長沙曾國藩邀之靖港而寇已由間  
道襲湘潭副將塔齊布率兵千三百同水師血戰五晝夜斃寇數萬論者謂微  
此戰寇溯湘源以達粵直下金陵首尾一江相貫注大局不可支矣是月參贊  
大臣僧格林沁攻克獨流寇巢靜海寇復竄踞阜城僧格林沁攻毀堆村連村  
林家場三處寇壘禽殺僞指揮監軍以下一百餘人悉遁入城秀全念河北不  
能支遣皖黨山豐豆工偷渡黃河竄山東金鄉進撲臨清州冀擣阜城之困三  
月寇以地雷陷城尋爲我軍攻復竄冠縣聊城復據曹縣築木城拒守四月勝  
保破其巢追至漫口支河逼溺水僞丞相曾立昌許宗楊皆溺死僞副丞相陳  
世保已先於冠縣燒斃悉數殲除踞阜城者即於是日全股南竄入連鎮僧格

林汎及勝保會軍合勦破之誅林鳳詳復破之高唐州馮官屯生禽李開芳磔之京市河北肅清是後不復北犯我軍遂無後顧憂初長江爲寇往來道荊州當四路之衝至省道梗特召荊州將軍官文統軍討寇時沔陽安陸荆門監利京山天門均陷進寇荊州雲南普洱營游擊王國才奉調至一戰敗之重鎮始安並克復監利宜昌寇遁洞庭湖合股犯常德府先是李侍賢常與陳玉成李秀成謀解金陵圍犯江西福建僞敵王梁成先犯陝西後與捻合欲犯湖南河南而陳玉成志在武昌漢陽乃領一隊入梁子湖達武昌渡江分犯以全力圖武昌六月陷之並踞漢陽巡撫青麟自縊不死棄城走尋正法秀全以秦日綱留守武昌授玉成僞殿右十八指揮還陷田家鎮破廣濟黃梅連陷九江升僞殿右三十檢點楊秀清雖在軍而金陵之事一決於己驛騎絡繹多稽時日向榮軍孝陵衛稱江南勁旅秀清憂之既克武昌遂馳還金陵命石達開代守武漢官文自荊州下勦克沔陽初寇欲先取長沙踞上游爲破竹之勢而韋志俊略湘潭不得志退踞岳州築壘毀橋意圖久抗我軍水師設伏誘敗之七月復

岳州寇由城陵磯來犯我軍分五路迎擊斃僞丞相汪得勝等二人獲船七十六殲賊千餘人塔齊布陣斬悍曾僞丞相曾天養閏七月寇奔城陵磯塔齊布策馬率湘勇直入毀營十三斃二千人陸軍既勝曾國藩飭李孟羣率水師追剿荆河東西兩岸寇壘悉夷自此由荆入川由岳州入湘門戶始固初武昌失陷上以楊霈代總督台勇克京山安陸復天門生禽孔昭文等正法餘皆下竄踞沔陽州仙桃鎮是月破其巢並收復下游孝感黃州麻城諸縣寇悉竄黃州時金陵寇分股嘯聚於太平府與鎮江遙爲應援向榮分兵四隊擊之斃其僞國宗韋得玲僞檢點陳贊見僞將軍李長有僞總制吳春和遂復府城楊秀清自率戰鬪軍不利三路皆潰退入城謂韋昌輝等曰江南大營不走吾輩無安枕日矣現其勢方銳不可敵也當乘其罷徐圖之金陵寇以乏糧驅婦女之老而無色者出城聽其自散盡取年十五以上五十以下之婦女指配給衆不從則殺之守志者多自盡死者萬計八月總督楊霈收復黃州府屬蕲水廣濟羅田諸縣曾國藩自克岳州後議乘勝東下先與塔齊布會攻崇陽克之生禽僞

丞相金之亨等十一人惟廖二逃竄復旬結餘黨重失縣城國藩親督水陸諸軍攻武昌漢陽寇守城之法不守陴而守險洪山花園兩路皆精銳所在大軍自蝶山下勦楊載福等率水師羅澤南率陸師三路同進連克寇壘焚毀敵船數千李孟羣塔齊布進薄武昌寇宵遁楊昌泗亦攻漢陽克之黃州府城武昌縣均收復九月提督和春敗寇廬江禽僞監軍任大綱等十七名下游知官軍分路進剿乃由田家鎮糾黨六千餘一由興國分抄大冶以拒武昌軍一踞興國以拒金牛軍羅澤南馳至興國敗之克州城塔齊布赴大冶擊斃千餘彭玉麟楊載福抵蘄州燒寇船九十餘艘十月楚軍攻半壁山寇置橫江鐵鎖四道攔以木牌偏列槍礮楊載福等率水師至田家鎮會陸師進攻乘風縱火破其壘燔舟一萬有奇陳玉成棄蘄州竄陷廣濟聯合秦日綱羅大綱等分扼要隘塔齊布渡江追之收復廣濟寇退踞黃梅黃梅爲湖北江西安徽三省總匯之區寇死拒以萬餘守小池口抗水師以數萬拒大河堵以萬餘紮北城外又以數千游弋聯絡之塔齊布與羅澤南登山下擊兜殺陳玉成縋城而逸遂克黃

梅玉成自請罪而秀成反加僞勳號曰成天裕時捻匪蠶起粵寇與之聯合或令分擾或令前驅以牽制我軍秀成由廬州踞舒城並扼桐城大小二關阻我南路之師二關爲安慶通衢屢復屢失京堂袁甲三檄參將劉玉豹舉人臧紂青等戰奪兩關斬其目吳鳳珠等十二名進抵桐城廬江寇糾安慶黨來援我軍兜戮殆盡而潛山援寇復至臧紂青歿於陣十一月國藩進軍九江玉成自黃梅敗後復糾安慶新到之衆踞孔壠驛小池口與對岸九江相旬連李孟羣七戰七捷塔齊布與羅澤南等由北岸進至灌港進攻孔壠驛破土城縱火焚街市寇無得脫者小池口寇聞之亦遁乃調陸軍攻九江水師乘勝攻湖口大綱趨救大戰梅家洲燬小河簰船沙洲橋學十二月蕭捷三率水師馳入鄱陽湖內追至大姑塘石達開聯船爲卡斷其後捷三不能返遂與外江水師隔絕達開潛以小舟馳襲國藩坐船國藩跳入羅澤南營以免大軍之攻九江也敗寇收合潰散分三道東陷黃梅值歲除潛至廣濟火燒需大營需突圍出不敢入武昌走保德安五年正月江蘇巡撫吉爾杭阿克上海縣縣自三年秋陷於

賊至是始復秀全令皖寇大舉犯湖北中道自小池口沿江陷黃蘄復分黨從富池渡江西陷興國通城崇陽咸甯通山且掠江西武甯所至脅衆以行湖北巡撫陶恩培甫蒞任數日時總督在外未及議守備城中兵僅二千徵兵半途聞警皆潰去湖北江西方千里旬日騷然矣始寇之起所行無留難其踞省府脅取民財米行道掠人夫不用則遣還未嘗增衆及屢敗乃結土寇屯城鎮頗收拔悍鷙者而任用石達開陳玉成等極稱得人之盛自漢口進襄河上犯漢川擾沔陽進犯武昌踞漢陽府城沿江築壘並於漢陽下南岸蒲高築礮臺以阻下游之師時江西寇入腹地陷饒州國藩親至南昌修整內湖水師與羅澤南陸軍相依二月韋國宗等攻陷武昌巡撫陶恩培等死之寇溯漢江而上以岳家口仙桃鎮爲老巢上以胡林翼巡撫湖北國藩進吳城鎮屢書與議東南大勢以武昌據金陵上游宜厚集兵力爲恢復計四月陷德安府楊霈退走襄陽上褫其職以官文爲湖廣總督國藩屯南康思整軍出江謀進取然寇已由都昌陷饒州別由東流建德竊樂平屯景德鎮東犯祁門休寧諸處而湘軍僅

萬餘人水陸分爲四李孟羣等水師回援武昌塔齊布留攻九江羅澤南入江西攻饒州國藩收蘆捷三水師三營屯南康羅澤南奔走往來克廣信府收景德寇之踞徽州者與土匪相結據險以抗我軍浙軍出境擊寇復徽州乘勝克休寧黟縣婺源生禽僞將軍兩司馬等八名秀全命北固山鎮江瓜州金山四路約期進犯揚州托明阿伏兵九洑洲迎擊破之斷鐵鎖船練焚船三百諸路寇被創而遁饒州之寇分據樂平德興弋陽江西軍率水陸師往剿寇出五隊來撲不克而奔郡城立復秀全以金陵山三山爲濱江要區以精卒守之水師不能上駛托明阿督水師總兵吳全美沿江掃蕩焚船二百餘艘獲拖罟快蟹等船二十五艘大小礮八十餘尊生禽僞先鋒陳長順等六十一名吳全美乘勢上山蹋平營卡江西蘆清水師始棹行無阻五月秀全謀襲金口斷楚軍糧道林翼督軍屢戰斬其僞丞相陳大爲等進屯紙坊逼省城小東門寇潛自他門出掠林翼建議先攻漢陽扼渦口蔡店要隘絕竄湘之路開濬江隄以水師腹背攻之則漢陽可破而鄂省咽喉已通不難併力於武昌矣初寇由府河入

湘所過州邑悉殘破無完土復爲官文伏軍所狙擊分途潰退六月收復雲夢  
應城二城者府河出入要道也寇失之大恐我軍進攻德安斷其出入寇始不敢窺伺荆襄七月塔齊布卒於軍寇陷義寧國藩遣羅澤南出奇兵復之寇服  
守襄河蔡店上通德安下達漢鎮互爲應援十二月彭玉麟克蔡店水陸並進  
毀襄河鐵索浮橋蹋平南岸敵巢而下游塘角漢陽大別山營坐焚毀殆盡德  
安之寇益蹙林翼既克蔡店而漢川爲蔡店後路寇據此游行衝突德安亦資  
以通聲氣林翼與官文會軍克復漢川武漢首尾始聯絡一氣蕪湖之陷幾二  
載矣江皖往來道梗寇以爲上下關鍵水則聯艦陸則砌臺我軍屢攻不能拔  
是月向榮督軍分道擊之縣城始復楚南軍亦攻復湖口都昌八月按察使李  
孟羣守金口崇寧寇旬結武昌城黨分道來撲陸營失守林翼亦敗於麥山退  
保大軍山寇勢復熾分擾漢陽並繞道襲陷漢川九月官文林翼檄調羅澤南  
援武漢澤南上書請率所部以行謂得武昌乃可控制江皖屏蔽江西而後內  
湖外江聲息可通攻九江始操勝券國藩從之乃部署援師五千人自義寧趨

通城寇聞我軍至桂口分衆來援設木城重濠自固澤南會軍克之進攻崇陽桂口寇退入崇陽密約通山來援桂口與湖南江西湖北交界形勢奧衍米糧充足曩僞丞相鍾酋義甯敗後踞此修土木城跨山引澗袤斜六里欲踞一隅以掣三省之師伺隙而動澤南移得勝之兵先奪是日進克崇陽焚寇壘馳赴羊樓司扼敵上竄十月克復廬州廬州陷已三年矣守之者爲僞豫王胡以晃與我軍大小數百戰死傷萬餘皆受創而去是月始克之其據德安者衆不過數千恃武漢爲下游奧主襄府二河羣蠭衆我軍勝東挫西疲於奔命至是官文督兵力戰守城寇黨隣長年馬超羣潛赴大營投誠約爲內應值大風雨放火開門納師遂復其城時寇之牽制我軍者三路自隨棗至襄陽爲北路武昌上下爲南路漢川中路尾潛沔首德安爲尤要屢收屢陷官文督軍分四道齊集漢川克之遂率兵東下與林翼合謀武漢石達開自安慶率三萬人上援武昌澤南會林翼夾攻連克蒲圻咸寧至金口會攻武昌破城外敵壘駐軍洪山寇之踞武昌者城外大壘八小壘二林翼與戰澤南襲之破大壘一小壘二李

孟羣亦薄攻漢南與官文軍相聲援水師往來南北燒敵船都興阿以馬隊護之羣帥輯和寇益不得逞漢陽城外自龜山沿河而下敵船林立上游入江之梁子湖下游金牛鎮羣寇赴援水陸各軍督剛勇犁巢掃穴武漢外患至此盡除秀全以瓜鎮屢挫敗圖往援十一月出龍脖子等處向榮飭張國樑敗之仙鶴門甘家巷又戰七霞街斃僞丞相周少魁等四十名追至石埠橋嶺二千餘逃入城不敢復出秀全於對江九洑洲築石壘浚深濠悉銳守之爲金陵屏蔽寇竄江北以此爲出路屢攻之未下也六合知縣溫紹原克其壘後復爲寇據同治二年始復之瓜州鎮江一水相望兩城往來無阻並時有合竄揚州圖北犯意揚州軍與瓜州相持已二年餘托明阿以日戰無效諭士民築長圍於瓜州之北以扼之至是圍成寇水路分撲大敗去奪其簰船生禽僞參護鄭金柱等十名吉爾杭阿既克上海移軍鎮江是月營小九華山又於黃鶴山京畿嶺築城置礮臺以逼之並爲地道礮城寇死拒不得入十二月無爲寇糾合安慶蕪湖諸黨東下圖解鎮江之圍蕪湖下至揚州沿江汊河套港皆寇通藪向榮

檄水師泝江會攻敗之神塘河又敗裕溪口援寇於陶陽浦生禽爲檢點趙元  
發僞將軍王化興等數十名十二日秀全遣李秀成等援鎮江我軍禦之石埠  
橋尋由江州下竄下蜀街先是楊秀清調上游蕪湖江北和舍及廬州衆還江  
寧統以李秀成及僞丞相陳玉成僞春官丞相涂鎮興僞夏官副丞相陳仕章  
僞夏官正丞相周勝坤取道棲霞石埠而豫遣城寇四出結我軍向榮大營存  
兵不敷分布檄蕪湖鄧紹良分軍爲張國樑秦如虎應援令吳全美以師船攻  
大勝關以分敵勢明安泰嚴堵秣陵關咨吉爾杭阿等守丹陽以固蘇常要隘  
初澤南既去江西石達開乘虛復入義寧敗江西官軍陷新昌瑞州臨江袁州  
安福分宜萬載江西湖北隔絕軍勢不能復振曾國藩飛調副將周鳳山統九  
江全軍往援遇寇樟樹鎮以鉤連槍敗其藤牌手並會水師燬敵船新潯寇聞  
風竄走遂復其城六年正月石達開陷吉安乃由湖北入通城達開悍而多詐  
肆擾江西不急犯省城不直指南康先旁收郡縣偏置僞官迫其土民刦以助  
逆因糧因兵愈蔓愈廣其陷瑞州者爲僞檢點賴裕新先陷袁州者爲僞裕王

胡以晃先攻臨江後攻吉安者爲僞春官丞相張遂謀廣東土匪入江西者以周培春黨爲衆又匪目葛耀明鄧象等均於瑞州入達開大股之中匪目王義潮劉夢熊分屯吉安泰和亦與達開合併爲一達開久居臨江爲上下適中之地凶悍之衆皆萃於此南則竊伺贛州南安以通粵匪北則踞守武甯新昌以通九江達開進攻南昌周鳳山以九江全軍守樟樹鎮時達開衆才數千餘乃張燈火山谷間爲疑兵卒敢死士乘夜來襲我軍不戰而潰鳳山走南昌國藩亦移軍省城秀全益以皖贛諸事付達開尋陷進賢東鄉安仁破撫州未幾建康南昌相繼失澤南念國藩艱危日夜憂憤督戰益急秦日綱嬰城待援士卒多傷亡陰穴城爲突門會達開率九江援黨至開城迎之澤南要之突門寇出直衝澤南軍澤南三退三進軍幾潰槍丸中左額收軍還創發而歿以李續賓領其衆續賓初建議分屯窯背絕寇糧既代澤南仍屯洪山以游兵巡蕩彎塘角間古隆阿率萬人來援武昌約城寇舉燧爲識林翼謀知佯舉火城寇出伏大敗達開援衆號十萬林翼分水陸力戰焚敵船七十平八十壘武昌寇大

窘城守益固而江西請師日數至義甯寇復犯崇通九江寇合興國大治土寇  
自武昌縣進至葛店謀襲巡撫大營林翼以江西待援分軍四千一百人以國  
藩弟國華統之率劉騰鴻劉連捷等道義甯收咸甯蒲圻崇陽通城上高湖南  
所遣援軍將劉長祐收萍鄉蕭啟江收萬載國藩命李元度收東鄉周鳳山等  
收進賢劉子淳收豐城五月畢金科將千人防饒州陷旋收復黃虎臣將三千  
五百人攻建昌遇寇死六月彭玉麟收復南康七月劉騰鴻至瑞州戰寇走之  
是時江西列縣陷者四十餘城廣東和平土寇犯定安定遠信豐長甯上猶崇  
義零都省城不能救軍報數月不相聞瑞州居江湘之衝有南北城中隔一河  
劉騰鴻援南城韋昌輝自臨江來援至北城遽挑戰騰鴻乘其弊攻之從北岸  
渡河抄其後南城兵角其前寇大敗至是江湖路通自長沙以至南昌無道梗  
憂寇自陷吉袁瑞臨諸府大修戰船議秋間圍攻省城瑞臨寇船出而下湖口  
寇船入而上困我水師復於生米口築立堅壘七月由松湖帶戰船三十餘艘  
陸寇千餘將抵瑞河口我水師偵知豫釘排椿寇甫至我軍衝入縱火焚之復

堵城寇於臨江口焚其船壘生米口之寇聞之亦遁八月劉騰鴻等敗臨川僞指揮黃某收復靖安安義寧都土寇襲陷建昌鉛山貴溪圍廣信浙將饒廷選赴援寇遁走時江西寇勢浩大黨類衆多欲以全力困江西自去年十一月至本年二月以石達開爲主三四五月以黃玉崑爲主六七月以章昌輝爲主九江則林啟容瑞州則賴裕新湖口則黃文金撫州則三檢點建昌則張三和袁州則李能通皆劇寇也統計江西境內近十萬人九月國藩視師瑞州李元度以撫州不克餽益絀乃分軍略旁縣募糧且分寇勢遂收宜黃復崇仁是日城寇出攻江軍林原恩敗死元度突圍免撫州軍俱潰元度移屯貴溪十月復陷宜黃崇仁分陷金溪福建援軍將張從龍援建昌軍潰特詔起黃冕知吉安府率軍往以國藩弟國荃爲軍主當是時江西軍分爲四湘軍最强國藩居水軍中劉長祐屯袁州派隊攻克分宜援寇路絕十一月僞將李能通啟西門納官軍袁州復國荃收安福江西諸軍稍振初武昌久不下林翼謂戰易攻難以分兵牽寇斷其援路爲要是月唐訓方等敗石達開於葛店寇增召戰艦復犯葛

店蔣益澧總六營往逆戰克之追奔至樊口合水師燔其船入武昌縣城石達開憤樊口之敗大集黨萬餘由廣濟蕲水黃岡至漢鎮密約僞丞相鍾某堅守以待官文獲其僞謀令都興阿多隆阿馬步兜擊寇大潰我軍乘勝攻黃州不能克舒興阿舒保等將馬隊四百人渡江寇於青山魯港間增十三壘相持水陸合擊破之追奔至葛店寇燭於騎軍乃大奔自是水陸馬步相輔軍勢日盛益募陸軍五千水軍十營增長圍困之武昌漢陽同克復擊斃僞丞相鍾某僞指揮劉滿生禽僞將軍帥帥旅帥兩司馬五百餘名武昌寇分七隊突門出生禽僞檢點古文新等四人斃先鋒悍黨八百餘死兩萬有奇蓋武漢自五年三月失守至是已二十餘月矣尋復武昌縣黃州興國大冶蕲州民兵復蕲水廣濟黃梅陳師九江城下十二月國藩至九江勞軍議統水師決取九江以聯絡內外乃派千總張金璧等復建昌李續寶追寇東下復瑞昌進攻九江派軍復德安劉長祐由袁州赴分宜寇退踞新喻溼遇之寶山降將李能通匹馬衝陣寇退入城我軍隨之入寇出東門遁湖南援軍將劉拔元等收永寧永新蓮花

廳崇義上猶寇陷鎮江至是四年矣是年京口爲張國樑所迫秀清命四僕丞相李秀成陳玉成陳仕章涂鎮興往援秀成欲一人渡江潛往京口約兵夾擊無敢應者玉成乃夜乘小舟潛越水寨縱兵擊國樑軍秀成登高見城中兵出遣鎮興仕章當敵而自率奇兵繞國樑軍後擊之乘勝擊丹徒和春敗走遂渡瓜州攻揚州陷之托明阿軍潰退北路詔德興阿代領其軍爲顧王吳如孝守鎮江分兵踞高資吉爾杭阿檄知府劉存厚扼之金陵寇大恐秀清遣悍黨數萬出句容來援吉爾杭阿中藏死存厚翼其屍不得出亦戰死向榮急遣張國樑會救克之秀成以揚州孤懸江北留守不便遂棄去竄回金陵當是時向榮張國樑負衆望稱江南勁旅然頻年征戰餽餉乖時士卒常忍饑赴敵頗缺望又分兵四出所部兵力過單楊秀清知可乘請於秀全定夾攻大營之策五月密約李如孝率鎮江寇自東而西附大軍之背金陵寇自西而東與相應更命溧水金柱關諸寇旁出橫截秀清自率勁旅出廣濟門先遣賴漢英率紫荆山諸黨攻七橋甃以挑之向榮張國樑狃常勝併力截殺漢英忽少卻向榮益策

大軍赴敵吳如孝以鎮江黨突薄之大營空虛守兵驚散向榮見大營火起退無所據軍立潰寇數路乘之大軍死傷徧地國樑獨以身翼衆出稍收敗卒退保丹陽寇築壘圍之向榮以病不能進乃以軍事付國樑一慟而絕向榮既死寇舉酒相慶頌秀清功秀全益深居不出軍事皆決於秀清文報先白其府刑賞黜陟皆由之出諸僞王上如韋昌輝石達開雖同起草澤比於裨將大營既潰南京無圍師秀清自以爲功莫與京陰謀自立曾秀全過其宅令其下呼萬歲秀全不能堪因召韋昌輝密圖之昌輝自江西敗歸秀清責其無功不許入城再請始許之先詣秀全秀全詭責之趣赴僞東王府請命而陰授之計昌輝戒備以往既見秀清語以人呼萬歲事昌輝佯喜拜賀秀清留宴酒半昌輝出不意拔佩刀刺之洞胸而死乃令於眾曰東王謀反吾陰受天王命誅之因出僞詔糜其屍咽羣賊令閉城搜僞東王黨殲焉東黨洶懼日與北黨相鬪殺殺予杖慰謝東黨召之來觀可聚殲焉秀全用其策而突以甲闖殺觀者東黨東黨多死亡逃匿秀全妻賴氏曰除惡不盡必留後禍因說秀全詭罪昌輝酷殺予杖慰謝東黨召之來觀可聚殲焉秀全用其策而突以甲闖殺觀者東黨

殆盡前後死者近三萬人時石達開在湖北洪山黃玉崑在江西臨江聞亂趨歸達開頗謂讓昌輝昌輝怒將併圖之達開縋城走寧國昌輝悉殺其母妻子女秀全責以太過昌輝負誅秀清功大不服率其黨圍攻僞天王府秀全兵拒敗之昌輝遁渡江爲避者所獲縛送金陵磔之夷其族傳首寧國甘言召達開回既至或謂達開兵衆功高請留之京師解其兵柄否則又一楊秀清也秀全心動乃命如秀清故事輔朝政達開危懼不自安其黨張遂謀曰王得軍心何鬱鬱受人制中原不易圖曷入川作玄德成鼎足之業達開從之乃還走安徽約陳玉成李秀成偕行二人不從益不能還金陵於是始起事諸悍黨略盡乃以僞春官正丞相蒙得恩爲正掌率調度軍事僞成天豫陳玉成爲右正掌率僞合天侯李秀成爲副掌率兵事專屬秀成玉成均聽蒙得恩節制而內政則秀全兄弟僞安王洪仁發僞福王洪仁達操之時我軍自克復廬州寇黨竄踞三河分營金牛一路壁壘相望屢抗我師八月和春督軍乘夜踰濠火其藥局梯城而入寇倉皇奪門出追斃之巢湖生禽僞指揮張大有僞將軍秦標盛等

十一名殲賊五千餘江南軍克復高淳九月擊敗句容溧水二城近金陵爲犄角金陵聞其敗氣阻大營始安巢縣者寇之老巢也其水陸連營無數所掠糧餉悉輸金陵巡撫福濟與編修李鴻章督軍攻復之廬州所屬州邑以次肅清七年正月湖南援軍吳坤修克安義靖安與民團會攻奉新寇棄城遁武昌之陷也曾國藩遣彭玉麟援鄂及石達開躡江西連陷瑞臨袁吉建撫諸郡又檄玉麟赴援尋國藩以父喪歸上命彭玉麟協同載福調度軍事九江爲江西重鎮皖楚咽喉寇力爭天險滙踞九江而以對岸黃梅之小池口爲外蔽進以犯湖北退以擾章皖游行掉臂防不勝防大軍自達九江宿松諸酋衆衆數十萬城於小池口以遏官軍圖上竄是月寇分三路入犯距黃梅縣城數十里知縣單瀚元請空城誘入都興阿從其計伏軍四起殲之寇棄城走截斬其僞燭天侯陳某僞天王堦鍾某曾某三名小池口寇聞之喪膽乃築堅城爲固守計復於段窯楓樹坳獨山鎮諸處依山砌石爲壘數十引水浚濠阻我軍東下都興阿遣鮑超多隆阿王國才等分攻悉平其壘四月王成犯湖北衆號十萬李續

寶壁小池鮑超移屯黃梅遏其衝分途迎擊大破之軍威始振五月李續賓攻九江掘長濠困寇設伏敗之馬宿嶺茶嶺諸處越旬餘安慶寇來援合城寇三萬蜿蜒數里我軍水陸會剿連戰皆捷閏五月玉成復犯湖北大小二十五戰亡七千有餘時蕲黃一路寇猶甚蕲州諸軍並挫賴舒保力戰水師左光培扼巴河得免上竄官文令唐訓方增軍守要約都興阿力扼黃梅嚴防後路以是黃州上下烽火不絕而武漢帖然無恙六月續賓浚長濠合水師力攻九江宿松太湖羣寇糾合皖省饑民十餘萬乘虛圍武漢且解九江之圍寇據黃梅廣濟蕲州蕲水分四路進大小五十餘戰死萬餘而勢不稍衰初小池口之捷也潯陽湖口立望廓清及皖寇上援九江陸軍梗阻而上游水師又難驟撤楚軍馬隊不及萬寇所竄伏崎嶇泥淖馬隊幾無可施惟將士一心屹然不爲所撼楊載福李續賓督水陸上援多隆阿鮑超攻賊童司牌敗之十里鋪寇造浮橋河中東通北湖西達武穴續賓渡江平南岸寇屯水師復焚寇艇燬浮橋寇不得逞七月黃梅寇以弱兵守壘而以强悍驍勇者偏伏村落多隆阿偵知約鮑

超直衝村落斃五千餘而其在蕲黃者仍不下數萬官文督軍五路進攻杜其上竄禽渠掃穴蕲黃路通尋又大破皖寇於黃岡蕲水界克復瑞州我軍直抵小池口小池口與薄城隔江對峙爲江皖入楚衝途寇壘石爲城深溝高壘胡林翼以寇築正袞約諸軍先拔小池口親督唐訓方李續宜等由蕲水達黃梅坡下建碉以塞宿松上竄之路偵知城內鑿具已毀於礮火煙斷熄乃令水陸環攻射火入城我軍乘亂而登寇壘殄滅全楚始一律肅清江西軍隨復東鄉東鄉隸撫州寇踞之以爲撫州保障復陷萬年諸縣八月將軍福興冒雨進攻縱火平塘絕寇竄路平塘者附城往撫州之衝也寇果棄城而遁初寇踞石鐘山守湖口兩岸致水師隔絕九月克湖口連破梅家洲燔石鐘山寇巢殲萬餘內湖外江至今三載始合載福以取九江當先援彭澤彭澤南有小孤山寇築城其上以守彭澤爲九江聲援載福會軍攻克縣城盡掃小孤山寇巢下游巨險悉夷大軍回向九江十二月長祐會攻臨江府拔之寇竄湖北興國州復爲續賓所殲餘衆僅二百皆鳬水而逸寇之自楚北敗竄回皖也糾合河南搶匪

撲廬州及巢縣柘皋我軍進平柘皋寇壘火巢湖派河兩子鋪寇船寇蹤遂絕先是江南水師提督李德麟率紅單船入皖寇遇之繁昌縣峽口不得上七閔月矣載福督師東下焚奪陳玉成所派戰船略盡連日焚華陽鎮復望江東流疾趨安慶破樅陽大通鎮進克銅陵馳入峽內與紅單船合寇望風瓦解逼泥汊爲城李成謀擲火焚之斬戮過當時江西寇糾黨二萬餘由浮梁建德都昌鄱陽竄湖口而宿松太湖寇憤九江之敗糾黨五六萬脣集於楓香驛仙田鋪等處聲勢相依官文檄唐訓方壁陳園固蕲州門戶多降阿鮑超等迎勦太湖李續宜會水師分三路直擣蕪寇二萬餘寇勢大挫江南大營之退駐丹陽也秀成踞旬容屢出窺伺正月國樑獨率精卒間道抵城下毀其外壘蕪寇千數百名寇不敢復出二月金陵安慶寇偵溧水勢蹙糾衆至鄖山築壘爲援和春乘寇營未定邀而敗之寇渡河復結四壘江南軍三路敗其衆合兵攻溧水城前後半寇壘二十六座殲三千號爲靠天侯以下十餘名移營已及一年戰功此爲最烈四月瓜州以我軍圍攻久勢頗危乃出背城計水陸並撲戰土橋西

里鋪不勝復以戰艦分兩路進一沿港助勢一渡江他擾均爲我水師所殲寇之聚溧水者屢招援黨攻大營死萬餘復於鄖山築壘數十以抗我軍五月總兵傅振邦破其外壘繼以火攻城副將虎坤元乘內亂斬守城悍酋而入遂復其城溧水既克和春進規句容與溧水相犄角寇結外援聲勢尙壯國樑會軍圍攻而自帥親兵衝入刺黃衣悍目數名寇奔潰和春進衝內濠國樑首先登城寇尸山積閏五月二十五日收復縣城九月鎮江寇出城至甘露寺逕撲大營和春迎勦敗之寇欲西竄接應金陵國樑密於高資增營扼塞寇亦築壘運糧河北國樑遣參將余兆青等毀其礮臺而自率親兵渡河會水陸諸軍屢戰六晝夜沈巨船十餘艘削壁壘二生禽魏長仁等六名斬俘無數寇之踞瓜州者遙聯金陵近接鎮江阻官軍進勦之路歷五年矣適南岸寇援創於和春德興阿乘其隙檄大軍踰城而入遂下瓜州十二月國樑大捷於瓜州南岸陣斬僞王奪坐十七遂圍鎮江秀全四遺衆援均爲虎坤元所破國樑督軍攻四門壞垣奪復其城逸出者沿江搜殺近萬人惟李如孝潰圍遁入金陵復竄聚安

慶而潛山太湖之寇又陷霍山旋退出欲從羅田麻城上竄踞獨山西河口爲營官文調馬步軍兼程馳防豫皖交界之處以固楚疆八月皖寇糾豫捻謀援金陵犯商固擾光州六安窺伺隨巢一路而太湖渡石牌等處寇黨連營三十里衆六七萬乘我軍度歲竄近蘄州尋又竄荆橋好漢坡諸處多隆阿迎勦敗之仙田鋪風火山追抵太湖連營宿太以扼寇衝而秦日綱遣其黨北趨避實擊虛謀犯蘄州蘄水六安之寇亦併力上竄陷英山縣分七路竄羅田羅田知縣崔蘭馨連日鏖戰收復英山守備梁洪勝等督楚軍禽僞丞相韋朝綱寇出黃花嶺竄楚境楓樹坳等處都興阿遣將往南陽河迎擊寇築壘北岸我軍潛伏北岸山谷中而列陣南岸寇渡河而南我軍邀擊之乘勝北渡寇陣山腰潰寇踵至伏兵起斃寇無數楚軍勢大振宿太諸營始紓後顧憂時秀全大會諸黨飭陳玉成爲前軍主將以潛太黃宿爲根據敵我上游楚師楊輔清爲中軍軍主將二月和春攻破秣陵關關爲金陵南面外蔽寇所嚴守者也三月和春

率張國樑等圍攻金陵會秀全張筵飲羣薦酒流丸墜秀全膝下羣駭愕秀全曰予已受天命縱敵兵百萬彈丸兩下又將如予何況和春非吾敵也諸將弄彼如小兒特供一時笑樂耳奚恐爲初寇屢伺我軍懈悉銳出犯冀解其圍而兩花臺爭之尤力和春嚴爲防倣寇果由兩花臺攻大營大敗之和春張國樑作長圍困寇度地勢險夷溝而垣之築山越水周城百餘里諸營大小相維絕寇應援秀全大懼誠各門嚴備潛結坐於壽德州屢突長圍不克死者枕藉當是時石達開在蜀楊輔清竄閩林紹璋敗於湘林啟榮圍於九江黃文玉坐困於湖口張朝爵陳得才孤守皖省陳玉成坐守小孤山華陽鎮一帶穆陵又陷金陵老巢聲援殆絕而糧食尙充足上游諸州縣皆爲寇據呼吸可通故寇雖危蹙而未遽顛覆我軍屢圍金陵玉成多方抗拒而秀成出陷杭州以掣圍師之肘我軍不動玉成乃自潛山太湖下江浦伺官軍之虛悉衆攻大營以冀解圍蘇常相繼而陷四月李續賓楊載福會攻九江九江爲金陵犄角南岸肅清專力攻九江城寇被圍久以數千人擗城植蔬種麥供軍食其守愈暇頻傷攻

城軍士崩地道成城破而復完楊載督水陸十六營攻四門地雷再發城崩  
百餘丈諸軍躍登斃寇萬六七人出城者水師扼之俘斬無遺林啟榮李興隆  
均敗死磔其屍九江既克寇黨無固志楚南軍先後收復新淦崇仁下撫州克  
安樂宜黃安豐新城諸縣收復建昌國峯攻吉安旁克吉水萬安二縣於是江  
西陷城收復八九矣寇黨畏懾金陵寇亦窮蹙秀全力圖外擾乃命寇將竄皖  
南北及閩浙諸省翼大軍分擾以牽我師王成旬結捻首張洛行賈瞎子衆號  
十萬人踞麻城四門築五十八壘溝壑重疊據險自固而安慶暨英山諸寇又  
陷黃安萸窺漢陽德安取道北竄官文檄續寶上援以紓麻城之患先是秀全  
命賴漢英掠江西皖寇入福建陷政和縣邵武府遂陷浦城分擾建寧五月我  
軍克復黃安麻城斬僞丞相指揮數十人追至商城並進剿太湖南山英山霍  
山諸寇其黨竄踞東安者圖爲江南北聲勢和春督軍立復縣城金陵寇愈形  
危蹙急思潰竄和春派水師分剿繁昌毀其堅壁土橋進破蛾橋魯港等處城  
寇憤恚出太平神策門分犯大營張主良馮子材等陷陣敗之寇退遂攻金川

門悉毀東北城外壘石遂開乃自廣豐陷江山縣金華衢州處州三府屬邑焚掠殆徧浙軍敗之壽昌七里亭六月寇竄全椒踞滁州九洑洲等處浙軍大敗之進克武義永康常山江山開化縉雲宣平衢閩亦解寇悉竄處州陷之周天受督軍克復會閩寇蜿延猖獗所復各城旋失又陷松溪崇安建陽等縣建寧府亦被圍浙江巡撫晏端書檄將馳援閩省又出師江山界剿浦城寇巢是時上以浙閩寇並起乃起曾國藩率江西湘軍援浙旋命改援閩國藩自鉛山進軍寇大懼圖牽制之計分萬餘人犯江西圍廣豐玉山入踞安仁閩軍遂克光澤收建陽解順昌圍連復松溪政和宣化崇和破浦城老巢復邵武府閩省肅清國藩移軍弋陽親督水陸各軍克復安仁縣城八月克吉安禽僞先鋒李雅鳳僞丞相翟明海正法江西列城皆復進攻太湖前月寇陷廬州巡撫翁同書告急於續賓官文以太湖方血戰有功疏留之時寇於東岸及楓香鋪小池驛東山頭各築營壘竇寶等分段攻城焚其火藥庫寇衆駭散遂克大湖乘勝抵潛山潛山石牌爲南北要衝寇屢集黨與援應抗我東征之師都興阿等營

北門彰法山馬步並進寇敗潰斃七八千遂復縣城我軍分二路平上下石牌老巢九月正成自潛太會九洑洲羣寇下江浦伺官軍之虛疾攻浦口以冀解金陵之圍我軍進退爭一橋遂大挫和春派兵來援寇分軍縕之仍力撲浦口江北大營遂失陷迭陷江浦天長儀徵並分攻六合德興阿遁揚州賊破南門入揚州陷進犯邵伯縣國樑率軍渡江會北軍克復府城移攻儀徵亦克之亟引兵救六合阻於寇不得驅進寇穿地道陷城補用道溫紹原赴水死寇渡江陷溧水築壘江藍埠諸處爲扼要持久計十月和春遣總兵張玉良攻復溧水寇夾攻高古山大營國樑怒馬陷陣斃寇五六千合兵追抵江寧鎮燬卡壁數十座小丹陽以至采石磯老巢悉平初勝保率皖軍攻天長捻首李昭壽以部衆二千降勝保奏請賞給花翎三品銜賜名世忠使爲內應遂克縣城大軍之入皖也克復桐城舒城二縣寇悉遁三河都興阿會水師盡掃安慶城外寇壘續竇追至三河王成秀成侍賢連江浦六合廬江衆又乞援捻匪招賴壽光州羣盜合十餘萬圍官軍三重衆寡不能敵續竇死之潰軍至桐城前留防四城

軍潰不旬日桐舒潛太復陷都興阿收潰卒由石牌駐軍宿松進剿黃泥營寇  
衆敗之復督鮑超多隆阿大戰荆橋陳家大屋平三十餘營軍勢復振玉成退  
還太湖以爲舒桐已得而宿松不破則安慶之守不固與秀成謀再舉秀成知  
不可敵不欲從而玉成屢言有妙策始與分道來犯卒受大創而退玉成留軍  
太湖而自還安慶秀成率黨還巢縣黃山是時江西寇復闖入閩界蹂將樂縣  
並陷浦城永吉建陽順昌甯化長汀等城國藩入閩軍建昌諸陷城以次復寇  
復竄回江西惟連城尙衆萬餘復陷景德東流謀竄湖口九江等處國藩檄調  
道員張蓮蘭倍道馳赴景德鎮屢戰皆捷初寇踞景德鎮勢燄薰熾江右要衝  
之區恣行無阻國藩添派其弟國荃率湘軍五千八百赴鎮助連蘭攻剿寇夜  
襲綏師劉于滬然火彈拋燒解卡無數寇棄鎭竄浮梁國荃等水陸進攻復浮  
梁寇走建德北去江西稍定十一月江南大營援軍直隸通永鎮總兵戴文英  
戰死寧國灣沚次日幫辦皖南軍務浙江提督鄧紹良大營陷死之甯都設防  
三百餘里皆鄰寇巢近則蕪湖青陽繁昌銅陵遠則無爲和州滁州渡江即至

而祿口秣陵溧水敗寇句合太平金柱關東西梁山黨衆潛山太湖舒桐及樅陽土橋敗黨皆以密國爲通藪防軍僅七千有奇又多調援他處寇衆兵單故及於敗國藩疏陳目前緩急宜先攻景德鎮保全湖口上是其議胡林翼先以丁母憂回籍會三河變起朝旨迫起督師十二月渡江駐黃州時寇之踞南安者有五支一爲僞翼府宰制陳亨容傅忠信何名標一爲僞渠帥蕭壽瑞蔡次賢一爲僞尚書周竹坡一爲僞軍略賴裕發一爲僞承宣劉逸才張遂謀衆七八萬將由南康犯贛州築僞城於新城設卡壘踞郵莊綿亘二十餘里九年正月國藩檄蕭斂江設伏赤石塘敗寇克新墟進破南康池江小溪鳳凰城長江城寇壘並克崇義南安進解信豐之圍二月江浦薛三元獻城降進克浦口陣斬僞天福洪方僞立天豫莫興寇覬李世忠擊高旺乘虛再陷浦口世忠回軍再克之浦口肅清李秀成急率悍賊七八萬來犯踞烏衣鎮汊河秀成復要陳國樑擊敗寇與閩浙餘寇皆趨郴桂所謂石達開三十萬衆後圍寶慶者也玉

成由六合犯廬州布政使李孟羣被執不屈死之三月糾安慶黨圍撲定遠護城營築堅壘數十以困我師勝保襲破其壘秀成東走而黨衆日增國樑於定遠縣西築十里長牆禦之其北路自九里山至浦口三四十里寇壘殆徧我軍日戰副將鄭朝棟張占魁皆沒於陣時浦口後路滁州來安皆困於寇世忠自浦口繞道回援勝保撤烏衣汊口防軍還定遠其地復爲寇踞和春慮江北軍單遣馮子材渡江接應玉成度江浦浦口未可力爭分黨援六合又謀趨天長揚州渡江攻南營後路並襲北營於是寇衆四五萬東趨六合蔓延來安盱眙諸境四月玉成圍揚州提督德安擊寇天長失利歿於陣勝保率軍進戰石梁互有死傷還屯舊鋪扼盱眙前路捍北犯駐汊洞軍爲寇困先後突圍出和春遣張玉良安勇分六合軍赴防揚州以固清淮門戶時池州青陽寇逼石硊窺灣沚當塗蕪湖寇分壁青山亭頭逼黃池我軍敗盱眙汊洞及天長寇天長寇分竇六合並踞儀徵江干東溝圖撲紅山窺其地距六合二十里旁通瓜埠爲大營餉道咽喉五月鞠殿華督軍破平六合東路王子廟太平集寇壘初六合

儀徵連界二十里寇壘四十餘阻糧道至是六合廓清時六合以北天長以南  
寇虜集數萬餉道危急由烏家集繞犯各軍之背世忠退保滁來寇趨舊鋪直  
犯盱眙圍勝保於桑樹都與阿力戰解之尋舊鋪寇犯紅子橋勝保及穆騰阿  
馳援而寇已分犯盱眙盱眙故無城倉猝遂失六月勝保攻克盱眙追創之磨  
臘天台諸山揚州諸軍安勇等聞天長寇回竄六合赴儀徵截擊大破於沙河  
大小銅山玉成憤甚圖報復率死黨攻來安世忠守城伏壯勇於兩門外自督  
軍衝入寇營寇乘虛襲城伏起攔擊世忠返隊夾攻寇大敗夜走滁州世忠由  
水口焚燒寇壘寇大潰糾合捻匪圍定遠再敗再進我軍衆寡不敵遂失陷七  
月玉成率死黨攻來安犯滁州世忠擊之稍却尋復糾衆圍來安並分屯城西  
北卓家巢等處寇壘幾徧世忠偵寇志已驕潛伏兵挑戰僞敗寇笑官軍怯而  
世忠又環諫之寇不爲意惟槍聲絕續作備而已世忠驟起鳴角而前火其營  
破二十八壘會勝保解其圍世忠還滁州八月敗寇西竄陷霍山江長貴等擊  
敗太平郭郵宏潭踞寇尋竄石埭陷烏石壠防營游擊黃金祥退屯楊谿河自

去歲三河失陷寇造僞城高二丈餘礮眼星列環以深濠櫓籬密布與太湖互  
相援應兼通糧道石牌鎮隸安徽懷甯當宿望潛太之交爲由皖入楚要衝官  
文以僞城不拔終礙東征乃令多隆阿統馬步軍會攻拔僞城擊斬霍天燕石  
廷玉等四十七名並拒敗潛山安慶援寇僞顧王吳如孝者寇之最悍者也自  
鎮江逸出至皖北糾捻沿淮肆擾尋撲盱眙之清塘爲格蘭額等槍斃斷其首  
衆南潰九月擾霍山下符橋六安防軍盧又熊等擊敗之破毛坦廠寇壘而廬  
州安慶寇同犯六安乃引軍還盱眙天長寇犯楊州參將艾得勝雙喜等敗死  
司徒廟玉成率大股自甘泉山西竄儀徵陳板橋進援六合圍李若珠坐馮子  
材禦之失利退屯段要口寇踞紅山窯斷李若珠營後路餉運不通十月若珠  
自八埠牆陳家集潰圍出中數創退屯揚州死傷馬步軍二千八百餘人石埭  
夏郵寇分股糾青陽寇萬餘竄踞涇縣查郵防軍副將石玉龍敗死南山嶺適  
周天受至自寧國督天孚等力擊之寇退還查郵王浚破平陶美鎮寇壘陣斬  
僞丞相孫瑞亨鎮距秣陵關二十餘里盧又熊克崔山寇自太平蕪湖犯寧國

陷黃池高州鎮總兵蕭知音敗退新豐鎮王成及秀成自天長六合糾大股窺  
桐江浦分屯南北兩岸張國樑渡江遣水師破壽德州寇擊水師曹秉忠破六  
合紅山窯瓜埠寇七營彭常宣敗寇於儀徵泗源溝時寇衆悉踞揚州西北尋  
陷江浦防軍壘周天培死之大軍退保江浦寇乘勢東伺揚儀西逼江浦南窺  
溧水勢復熾寇自洪楊內亂鎮江克復秀全兇燄久衰徒以陳玉成往來江北  
旬結搶匪擾廬州浦口三河等處迭挫我師曾國藩以爲廓清諸路必先攻破  
江甯欲破江甯必先駐重兵於滁和而後可去江甯之外屏斷蕪湖之糧道欲  
駐滁和必先圍安慶以破陳玉成之老巢兼擣廬州以攻陳所必救誠能攻圍  
兩處略取旁縣備多力分不特不敢悉力北竄齊梁並不敢一意東顧江浦六  
合蓋寇未有不悉力以護其根本者也於是定四路進兵之策國藩任第一路  
山宿松石牌以窺安慶多隆阿鮑超任第二路由太湖潛山以取桐城胡林翼  
任第三路由英山霍山取舒城調回李續宜任第四路由商固以規廬州以後  
平寇之策皆不出此十一月涇縣查村寇犯吳正熙望不利而章家渡亦爲我

軍所挫揚州寇踞甘泉山馬德昭破其壘國樑督軍攻江浦寇壘不下寇掘地道攻城王良遣將縋城出焚其壘墳塞地道寇築壘磨盤洲我軍四路蹙之寇衆大敗狂奔北門寇營亦同時攻破其陳家集等處之寇竄回天長南路之寇潛窺溧水皆爲防軍擊退江長貴克太平郭郵查都敗寇竄涇縣北路副將榮陞連破石柱坑盤臺寇卡寇竄踞董家村白茅塘犯萬級黃柏兩嶺榮陞會徽軍破之覆其巢寇又竄擾河西爲參將朱景山等所敗副將吳冉升遂乘勝進剿黃池南岸牛頭山寇壘北岸寇糾衆來援分兵拒之寇多死傷北岸寇潰走渡河我軍遂收南岸池州守城寇韋志俊獻城於楊載福其部下古隆賢等不從回撲府城城復陷桐潛寇援太湖將襲天堂後路余繼昌會軍團分路敗之槎水畈陣斬僞漢天侯拱天豫二名寇奔潰十二月侍賢山蕪湖金柱關率大股犯寧國與黃池北岸寇合勢連日分擾黃岡橋牛頭山等處再犯西河蕭知音熊廷芳退走寒亭寇圍游擊冉正祥壘都司李培基馳援始解王成以定遠舒城廬州寇衆北犯壽州翁同書令副將尹善廷率精銳馳援挫寇於東南兩

路時玉成以楚師甚盛欲圖西竄六合拒楚師因北犯壽州以牽掣我軍尋自江浦回援安慶太平糾合捻首龔得樹張洛行等分道上犯衆號十餘萬多隆阿鮑超蔣凝學禦之潛山連破靈港寇壘蕪湖寇進犯宣城灣沚周天受禦之不得逞乃分衆四竄我軍亦分拒於海南渡浮橋口清水潭鹽官渡寇退踞許郵埠進犯西河朱景山等創之增軍守東西岸寇迭窺灣沚我軍渡河擊之甯國西北寇鋒稍斂先是銅陵青陽寇常犯南陵涇縣之交我軍扼守雲嶺蘇嶺而設伏朝山要三里甸參將方國淮出奇擊之寇屢犯三里甸陷國淮壘復竄越雲嶺陷觀領防營天受調金友堵清弋江寇北走南陵陳大富擊之寇復退入涇境自玉成回援安慶後秀成獨屯浦口寇勢已孤時金陵因急援兵皆不至秀成以玉成兵最强請加封王號寄圖外秀全乃封玉成英王賜八方黃金印便宜行事然玉成雖專閫寄而威信遠不如秀成無遵調者李世忠因致書秀成曰君智謀勇功何事不如玉成已王而君尙爲將秀全之憤憤可知矣吾始反正清帝優禮有加以君雄才胡爲鬱鬱久居人下盍從我遊乎時

僞兵部尙書莫仕葵以勘軍在秀成營書落其手閱之大驚以示秀成秀成曰臣不事二君猶女不更二夫昭壽自爲不義乃欲陷人耶仕葵曰吾知公久矣乃代奏之秀全命封江阻秀成兵並遣其母妻出居北岸止其南渡仕葵曰如此則大事去矣乃偕蒙得恩林紹璋李春發入僞宮切諫曰昭壽爲敵行間王奈何墮其計自壞長城京師一綫之路賴秀成障之玉成總軍數月不能調一軍其效可觀矣今宜優詔褒勉以安其心臣等願以百口保之秀全悟召秀成入慰之曰如卿忠義而誤信謠傳朕之過也卿宜釋懷戮力王室即進封僞爵爲忠王榮千歲寇自楊章構殺秀全以其兄弟仁發等主持僞政僞幼西王蕭有和蕭朝貴子也秀全尤倚任之而以一僞將畜秀成不與聞大計至是曾僞爵爲王乃大悅以爲秀全任已漸專不料其疑已也浦口當金陵咽喉要地迫於大軍而糧援無措南渡時見秀全問計秀全語以事皆天父排定奚煩計慮又與仁發等謀留其助守金陵秀成不可曰官軍既以長圍困我當謀救困法俱死於此無益也渡還以黃子隆陳贊明屯浦口親赴上游糾合皖南蕪湖甯

國死黨謀間道犯浙江分江南大營兵力還解長圍之困其志固不在浙也連日援太湖寇搶攻鮑超潛山小池驛營壘不克楊輔清古隆賢用內應陷池州  
章志俊突圍屯泥灣收合散亡移屯香口迭敗寇於八都坂栗樹街俘斬僞將軍陳松尅等三十餘人是年秀全大封諸王初秀全定都金陵一切文武之制悉由僞東王楊秀清手定是時爲秀全建國極盛時代其宮室制度第一爲龍鳳殿即朝堂也主議政議戰諸大事每有大事鳴鐘擊鼓會議秀全即升座張紅幃諸王丞相兩旁分坐依官職順列賊將則侍立於後議畢鳴鐘伐鼓退朝第二說教臺每日午秀全御此衣黃龍袍冠紫金冕垂三十六旒後有二侍者持長旗上書天父天兄天王太平天國臺式圓高五丈階百步說教時官民皆入聽其有意見者亦可登座陳說文左上武右上士民由前後路直上立有一定之位第三軍政議事局軍事調遣糧餉器械總登所秀全自爲元帥當日僞東王爲副元帥北王翼王爲左右前軍副元帥六官左右副丞相爲局中管理各科員中分軍馬軍糧軍械軍衣軍帳軍船軍圓軍俘軍事諸科又有糧餉轉

運局文書管理局前鋒告急局接濟局皆屬軍政議事局內以六官左右副丞相領之其最尊者爲軍機會商局長初以僞東王領之遇有戰事籌畫一切則僞東王中坐諸王丞相天將左右坐立各手地圖論形勢然後出師秀清死僞翼王領之石達開去後李秀成領之秀成東入蘇杭則有名無實虛懸其位矣其時寇之武備頗詳盡自諸僞王內訌人心解體秀全以爲非不次拔擢無以安諸將之心然自此大封之後幾至無人不王而丞相天將之職多攝行於是各持一軍勢不相下而調遣諸王者僅陳玉成一人故八年以前寇之用兵攻守並用八年以後不過用攻以救守戰局遂至日危以底於亡十年正月僞匡王僞奉王僞襄王糾合僞攝王自南陵犯涇縣灣灘游擊王熊飛退走寇遂蔓延黃邨焦石埠進攻副將李嘉萬援師爲楊名聲所敗斬僞閻天燕賴文禾寇竄踞黃柏嶺其黨尋大至陷涇縣楊名聲等退走旌德寇踵至明日亦陷我軍還守甯國是時秀成自率悍黨數千已由甯國縣間道犯廣德張國樑督水陸諸軍渡江期大舉克浦口八壘黃子隆陳贊明遁攻九洑洲克其老巢焚之寇

自咸豐四年築壘九洑洲內蔽江甯外通大江踞爲南北水陸要區江甯長圍成後浦口九洑洲皆克勢大困秀成由皖犯浙分我兵勢而諸將又以寇在阱無能爲役習爲驕佚戰志漸消故有閏三月大營失敗之禍太湖寇捻分四股來犯我軍知府金國琛會集諸軍敗之仰天庵高橫嶺生禽悍目藍承宣向擾害蕲黃者寸磔之金國琛等復敗寇捻於潛山廣福寨玉成率翼得樹張洛行來援乘霧移營於羅山衝白沙畈冀與城寇相通以圖牽縕我軍諸軍會擊寇大敗禽斬僞庶天侯麥烏宿僞軍師汪遂林等明日鮑超等進攻小池驛當東路蔣凝學等攻羅山衝當西路多隆阿居中路策應羅山衝寇蠭擁來撲凝學連破衝口攻入內山馬隊繼之寇大敗值東南風作以火焚之燬壘百有數十寇奔路狂奔斃僞丞相葉榮發僞將軍舒春華等城寇謀宵遁伏軍四起擊之是役也殲寇二萬餘益惶懼竄入潛山多隆阿督軍尾擊克其城秀成侍賢等至廣德詐爲清軍陷之杭湖蘇常並震巡撫羅遵殿調徽寧防軍援剿廣德以保兩浙門戶張芾遣周天孚馳防長興四安鎮距廣德四十里當蘇浙之

交和春遣水陸軍來會秀成留陳坤書陳炳文守廣德自率譚紹光陳順德吳定彩等馳攻四安鎮陷之和春遣水師會攻江寧上下兩關七里洲寇謝茂廷壽德州寇秦禮國遣使詣大營乞降江寧西北各門皆瀕大江洲堵錯互寇踞上中下三關築壘於壽德七里各洲與北岸九洑洲遙相倚藉九洑洲既克茂廷禮國約舉火爲號於是上下關同日而克國樑增八壘於江東門增四壘於安德門毛公渡南北岸關隘悉爲我奪寇益大困秀全檄諸寇解金陵圍時秀成在皖與其部下謀曰清軍精銳悉萃金陵城下其餉源在蘇杭今金陵城外長濠已成清軍內圍外禦張國樑又嘔嗜善戰攻之難得志不如輕兵從間道急搃杭州杭州危蘇州亦必震動清軍慮我絕其餉源必分師奔命以救我瞞大營虛還軍以破圓師則蘇杭皆我有也乃自率數千精卒以行連陷安吉孝豐長興諸縣以其弟侍賢犯湖州自率悍黨陷武康間道踰嶺犯杭州預結捻首張洛行費瞎子等使內擾清淮以分江皖兵力上命和春兼辦浙江軍務而以張玉良總統援浙諸軍玉良分大營兵勇五分之二禦之秀成攻杭州以地

雷崩清波門陷之巡撫羅遵殿等均死難秀成之破杭州也祇一千二百五十  
先鋒諸處援兵不知虛實聞城破皆潰走迨張玉良援軍至屯武林門秀成曰  
中吾計矣自以兵少乃多製旗幟作疑兵潛退出城委之而去玉良與將軍瑞  
昌會擊立復省城三月秀成回竄餘杭陷臨安旋爲李定泰克復孝豐武康寇  
亦退走時秀成及侍賢回廣德楊輔清亦自池州來會李定泰等會圖廣德寇  
已分走建平陷之連陷東壩高淳復許爲官軍陷溧陽自是江南大營後路驟  
急蘇常俱大震和春馳檄張玉良等還救常州熊天喜等克廣德而楊輔清陷  
溧水詐爲官軍製金壇爲周天孚等所敗棄墾西竇句容亦陷句容當大營後  
路餉道所必經且與丹陽鎮江接壤爲常州門戶和春遣副將梁克勤赴援不  
及續遣副將張威邦由淳化進剿何桂清遣將分防丹陽鎮江瓜州冀通大營  
至蘇常水陸道路馬德昭等出屯郡城三十餘里下弋橋堵溧陽宜興各路寇  
內犯米興朝自廣德進軍克建平閏三月寇自昌化出於潛分犯分水陷而旋  
復進陷淳安秀成約會諸酋同議救金陵之策秀成與侍賢由淳化輔清由溧

水退秣陵關玉成亦自江浦渡江來會江寧寇爭出築壘接應斯時大營四面受敵而良將勁兵調援浙西者一萬三千人淳瑞宜興防軍又調去一千有奇大營空虛糧路又截斷乃改月餉積四十五日始一發兵勇皆怨心漸摶貳時羣寇廣集和春急調張玉良回援何桂清留之不遣寇至雄黃鎮我軍禦之不克輒潰山秣陵關至南門玉成由江寧鎮至頭關板橋善橋諸寇皆集南岸秀成由姚巧門進紫荆山尾陳坤書劉官芳由高橋門而來侍賢由北門紅山而至輔清山兩花臺玉成由板橋善橋連日攻撲長圍國樑與王浚分督諸將力禦十五日夜雷雨雹雪大寒總兵黃靖副將馬登富守備吳天爵戰死大營火起全軍潰陷和春許乃釗退走鎮江再退丹陽旋馳書趣國樑亦至留馮子材守鎮江國樑語和春曰六年向帥大營失陷退扼丹陽彼時京口未復今東門之限在於鎮江舍此不守是導寇而東也和春卒不能用而宜興同時亦失陷寇勢大張而秀全於戰士不及獎敘終日亦不問政事只數人認實天情自有昇平之局仁達仁發忌秀成功嗾秀全下嚴詔飭秀成率所部限一月取蘇常

寇掠金壇四鄉大書於壁曰攻野不攻城野荒城自破我軍屯六門日與賊戰  
互有勝負秀成自句容攻丹陽國樑開南門酣戰秀成命力士淵入我軍潰卒  
中猝擊國樑被創大呼入尹公橋下而死秀成入丹陽命收國樑屍曰兩國交  
兵各忠其事生雖爲敵死尙可爲仇乎以禮葬之下寶塔和春奔常州寇逼其  
後何桂清聞變跳走是月楚軍援皖南會克太平建德石埭三縣涇縣張芾會  
同周天受等進毀白華宴公堂一路寇壘直抵城下斬關直入遂復縣城四月  
天長六合寇乘金陵大營退守分三路進犯一由陳家集圖揚城一由東溝窺  
瓜州一由僧道橋編筏偷渡襲邵伯皆爲我軍所截擊不敢逞乃築壘僧道橋  
圖久踞我軍分左右中三路疾趨會攻毀二壘焚木城積屍枕藉寇合股退踞  
陳家集揚州與鎮江相爲脣齒李若珠咨艇師陳泰國等分扼各口寇大逼常  
州張玉良由杭郡率軍先至築營寨大小四十餘悉爲所破常州陷玉良敗走  
無錫秀成率所部精卒潛出九龍山附高橋之背玉良軍大敗無錫陷敗走蘇  
州和春創胸至蘇州濟墅關而卒玉良連敗之師不能復戰寇薄蘇州玉良退

走杭州長洲元和兩縣廣勇李文炳何信義開門迎秀成入踞之巡撫徐有壬等同殉難秀成踞蘇後改北街吳氏復闢爲僞府秀成踞蘇十有一日出僞示安民城廂內外凡收屍八萬三千餘具而從者猶盛稱秀成愛人不嗜殺也寇踞蘇城復恣意掠掠民競團練爲自保計江皖援浙諸軍以次克復諸城遂會剿淳安寇敗遁入徽州境蘇寇陷吳江犯平望浙江防軍潰江長貴負傷還走仁和塘棲鎮副將張守元亦潰於清衫庵嘉興危急杭省大震侍賢燒嘉興南門入踞之玉良攻嘉興西南兩門陳坤書陳炳文求救於蘇適青浦周文嘉與洋軍戰來告急秀成乃先援青浦擊退洋軍直攻上海不克遂應嘉興之援由松江浦邑而回戰取嘉興平湖順至嘉興連戰五日分一股上石門斷玉良來路兵多降者玉良回杭州五月貴池青陽寇犯涇縣總兵李嘉萬等敗死楊名聲退至太平黃花嶺寇陷廣德米興朝軍潰奔孝豐再退歙北箝嶺外初涇縣竇旌德孫郎廣德寇竊伺甯國天受擊却之寇由青國縣東岸至旌德與涇縣

合勢嘉陷定薛煥尋克之收太倉寇攻鎮江陷青浦陷松江寇之守江寧也以安慶廬州爲犄角以太平蕪湖爲衛護蕪湖之南有固城南瀘丹陽白白諸湖上可通寧國之水陽江清弋江下則止於東端掘東端而放之則可經太湖歷蘇州以達於婁江蕪湖孤懸水中寇守之則易官軍攻之則難是以距五年血戰不退而黃池灣沚屢次失利皆以我無水師寇堅忍善守官軍圍攻屢年往往因水路無兵不能斷其接濟今蘇州既失面面皆水寇若阻河爲守陸軍幾無進攻之路城外幾無立營之所則欲攻蘇州須立太湖水師使太湖盡爲我有而後西可通寧國之氣東可附蘇州之背因建淮陽寧國太湖速立水師之策寇陷江陰王良連以礮艇破嘉興三塔普濟二寺平新塍寇壘移營逼西門南門破壘七平望鎮者浙江之嘉興湖州江蘇之吳江總匯處也寇踞沿河六里橋梅堰諸處偏築壘壘密釘排椿扼險以阻江浙之路湖州趙景賢毀沿河寇壘分軍進克平望會軍於米市湖盡燬礮臺巢穴進圍嘉興寇既陷松江遣其黨竊上海薛煥乘其不備直搗南門而入殺黃衣目十三名奪船七十餘艘

立復府城自松江至上海沿途圍練截殺殆盡六月楊輔清糾旌德太平大股犯寧國寇自長興竄陷安吉王有齡遣彭斯舉赴援遇於孝豐失利退走昌化寇直犯於潛陷之杭省大恐寇復由黃渡再陷嘉定糾土匪進踞南翔鎮逼上海四十餘里再陷平望蘇州嘉興寇勢復合於潛寇連陷臨安餘杭分擾富陽吳雲會洋將華爾攻青浦急僞寧王周文嘉乞援於蘇州秀成率大股親援我軍敗績寇收槍礮乘船再犯松江陷之江陰寇分黨築壘申港掠船謀北渡李若珠飭艇師破燬之僞丞相方得勝遁玉良以地雷崩嘉興南門城垣寇嚴拒不得進劉季三等連克餘杭臨安浙西寇回竄孝豐突犯建德七月秀成毀松江城堞率僞會王蔡元降僞納王郝永寬北犯上海號十萬焚掠泗涇七寶民團禦之多死傷寇屯徐家匯薛煥督文武登陴固守寇詐爲官軍賺城城上諷知創却之洋輪之泊黃浦江者升開花礮於桅發之寇始敗退孝豐寇陷廣德游擊黃占起江陰霖戰死江長貴突圍退至安吉米興朝奔四安未幾趙景賢復廣德寇再陷踞之寇復陷江陰楊庫汛城逼常熟二十餘里黃浦輪船洋兵

以開花礮測擊上海寇壘六發創及秀成是夜秀成解圍還青浦時嘉興寇告急遂趨浙江初副將陳汝霖率民團救松江迨上海解圍洋將華爾會守松江賜號常勝軍秀成陷嘉善陷平湖錫齡阿兵勇皆潰寇旋去收之寇陷金壇知縣李淮守百四十餘日糧盡援絕川兵逼寇殺參將周天孚陷之李淮等皆戰死丹陽寇糾黨六七千由新豐等處分道撲水師謀掠舟北渡並沿河築壘架礮轟射周希濂督艇師乘煙霧對擊寇不支遁回丹陽玉良攻嘉興兩月不下先後集兵三萬有奇而蘇常以北無牽掣之師松江青浦之寇可直入嘉興常州宜興之寇可直入長興建平廣德之寇可直入安吉南匯縣之寇可直入於潛寇前自長興逕逼省垣雖經擊退並立復數城而廣德遂至不守迨收復廣德而嘉善平湖又復失陷寇處處牽制我軍近復添築營壘礮臺又偷劫五龍橋頭卡多方悞我軍實有罷乏不堪之勢秀成以嘉興圍急率大股來援玉良督戰五日勝負未決秀成分股上趨石門謀斷大營後路地形多支河塘路絕無可歸我軍懼奔玉良負創疾馳還杭省賊既解嘉興之困復陷石門分兩

路直逼杭省一趨塘棲民聞禦之退掠新市一趨臨平吳再升敗之轉走海甯  
彭斯舉等擊斬頗衆寇悉退還石門未幾石門寇亦退再升進駐石門馬德昭  
由臨平長安相繼前進八月寇陷昭常再攻平湖嘉善陷之是時秀成自嘉興  
還蘇州奉秀全僞詔趨還江南令經營北路初咸豐三年林鳳詳李開芳北犯  
不返秀成未敢輕舉適江西湖北匪目四十餘人具降書投秀成邀其上竄自  
稱有衆數十萬備調遣秀成覆書允之留陳坤書駐守蘇州自返江南請先赴  
上游招集各股再籌進止秀全大怒責其違令秀成反復爭辯堅執不從秀全  
卒不能強於是取道皖南上竄江鄂秀成之在僞京與諸黨會議也曰曾國藩  
善用兵將士聽命非向張可比將來七困天京必屬此人若皖省無他故尙不  
足慮一旦有失則保固京城必須多購糧食爲持久之計秀全聞之責秀成曰  
爾怕死我天生真主不待用兵而天下一統何過慮也秀成歎息而出因與蒙  
得恩林紹璽等再三計議僉以秀成之策爲然因議定自僞王侯以下凡有一

雖如均輸故事以爲思患預防之計洪仁發等相謂曰此亦一權利也因說秀全用鹽引牙帖之法分上中下三等上帖取米若干石中下以次遞減此帖即充僞樞府諸僞王祿秩收入後無須撥解而稍提其稅入公大半皆入私橐商販非執有帖者粒米不得入城犯者以私販論罪如是則法可行而利可獲矣洪氏諸僞王乃分售帖利上帖售價有貴至數千金者及商販至下關驗帖官皆仁發輩鷹犬百端挑剔任意勒索商販呼籲無門漸皆裹足而諸僞王侯又因成本加重售價過昂不願多出資金米糧反絕秀成言之秀全請廢洪氏帖秀全以詰仁發仁發以奸商每借販米爲名私代清營傳遞消息設非洪氏誰能別其眞僞此實我兄弟輩之苦心所以防奸非以罔利也秀全信其言置之不問秀成憤然而去寇陷甯國提督周天受等死之甯國之陷也玉成與賴裕新古隆賢楊輔清四面圍擊周天受戰守七十餘日軍中食乏餉阻不能達寇盡掃城外諸壘城陷天受遂遇害甯國既失南陵孤懸總兵陳大富苦守閔半

載國藩檄令自拔出城遣水師迎之難民從者十餘萬寇再陷太倉王成糾合  
江南丹陽句容寇十餘萬自九洑洲新江頭掠船二百餘日夜更番意圖乘虛  
下竄爲軍團所敗竄六合鎮江寇船駛入丹徒諫壁兩鎮港口爲水師李新明  
擊退馮子材尋進解鎮江城圍侍賢率寇四萬出廣德攻陷徽州署皖南道李  
元度潰走開化寇趨祁門甚急國藩檄邀運蘭屯霍縣趣鮑超自太平還屯漁  
亭以捍大營徽州既失杭嚴兩府防務益急寇之踞蘇城也同時城邑陷者數  
十江陰居大江尾閭狼山對岸再陷於寇寇踞之以窺江北人心惶然九月通  
州知州張富年等會水師攻復其城上月王成率悍寇二十餘萬進陷白鯤橋  
尹善廷壘旋至馬廠集犯東津渡黃鳴鐸擊却之至是圖取壽州內東肥河跨  
山越谷盤行抵淮河岸聯營櫛比餘黨竄入姚家灣揚船欲水陸會攻巡撫翁  
同書派礮艇沿河截擊寇乘霧鳬水入小港爲黃慶仁圍殺復以步騎撲北關  
城上彈丸兩下夜縱火焚寇壘皆燼城圍立解寇竄南路一還定遠山一走廬  
江一赴六安徽州寇自蕪安竄陷嚴州進踞烏龍領江寧寇糾九洑洲寇船二

百餘艘下竄儀徵我軍大敗之東溝副將格洪額會破盱眙竹鎮集寇屯禽斬  
爲檢點汪王發等曾秉忠破青浦寇於米家角攻城三日不下秉忠中創參將  
李廷舉攻寶山羅店寇敗併嘉定旋再竄羅店踞之寇攔入壽昌金華兵圍復  
之旋再陷再復十月寇自淳安擾及威坪兵圍禦之回竄獨口徽州北路寇竄  
至杞樟里逼昌化昱嶺二十里先是江西瑞金廣昌新城瀘溪大股寇窺伺福  
建汀州邵武防軍力禦之遂折竄建昌而瑞金一股竄踞福建之武平尋陷汀  
州兇焰甚張旬容寇至鎮江湯岡築壘馮子材擊之不下審國寇直趨四安破  
長興長橋卡防分竄廣坤梅谿嚴州寇連陷桐廬新城蘇州寇分股撲金山我  
軍擊敗之遂克楓涇鎮寇復糾蘇常大股襲廣富林圖犯松江守將向奎軍單  
敗退曾秉忠回援寇竄寶山羅店都司姜德設伏敗之還青浦王良克嚴州新  
城寇竄陷臨安初壽昌被陷金華知府程兆綸督民團復之桐廬亦同時收復  
橋侍賢復糾集臨安寇陷餘杭逼杭州省城侍賢由嚴州還顧徽州瑞昌等敗

寇泰山亭古蕩觀音橋追至留下寇棄坐走省城解圍遂復餘杭侍賢不得志於杭州自餘杭直犯湖州建昌寇間道犯鉛山河口鎮踞之福建浦城崇安浙江衢州常山開化邊防皆急時徽州寇自深渡街口下竄天長防軍會水師大破於三河衡陽等處是股爲天長葵天玉陳天福會合秀成黨三萬餘衆將謀渡河分擾淮陽秀成竄皖南踰羊棧嶺陷黟縣鮑超大創之城立復再破之廬郵陣斬僞丞相吳桂先秀成受傷遁徽州國藩飭將屯守廬郵郵距黟縣二十五里是時侍賢自嚴還徽輔清盤踞旌德環二百里皆寇秀成復由江蘇上犯越嶺肆擾我軍疾馳百餘里力戰兩日驅出嶺祁門大營始安趙景賢大破賊解湖州城圍湖州自三月以來迭被賊因此趙景賢第三次解圍也先是寇踞楊家莊爲老巢以礪山仁黃山爲犄角焚掠雙林諸郵鎮蔓延長興西安太湖景賢會軍先攻礪山仁黃以孤老巢之勢我軍踞仁黃燬楊家莊敗寇西竄天長寇掠下五莊舟船數百艘欲犯湖路我軍克河口鎮復創之石谿竄廣豐道員段起禦之寇間道走玉山多隆阿李續宜會軍大破桐城寇陳玉成襲得樹

於挂車河鶴墩香鋪街等處平寇至四十餘寇退奔城安慶者江表之咽喉實平吳之根本也寇援安慶水陸阻梗不能直抵江寧玉成眷屬悉在安慶城中邀合髮捻十餘萬人圍解城圍多降阿李續宜雖力挫之仍分屯廬江桐城復糾集下游江寧蘇常援寇並力上犯逼近樞陽桐城鄉鄰眈眈以伺我軍之隙將挾江南寇勢全力謀楚軍時屆冬令安徽城河水涸道路紛歧我軍四路告急之書應接不暇皖南浙江之寇分三大枝竄入江西祁門各營圍裹於中勢頗危急湖南道州寇亦竄江西寇既陷吳勢必全力犯楚此其深謀詭計故安慶一城寇以死力爭之左宗棠之入景德也聞南贛寇分黨由貴溪過安仁直撲饒景遣軍迎敗之周坊寇竄陷德興踞之十一月宗棠進克德興寇奔婺源又克之十日內轉戰三百餘里寇驚爲神速彭斯舉解玉山城圍寇竄衢境犯常山與兵團戰敗走開化埠楊輔清自池州率黨竄陷東流進陷建德水師收束流而建德防軍潰退國藩遣唐義訓馳擊至利涉口寇築壘河洲列隊以待並以馬隊扼拒各卡我軍分東西兩路緣山上立破其卡前軍夾擊河洲寇

後軍抄其背寇敗走我軍復分爲三進攻寇出東門逸遂復其城寇復陷彭澤  
闖入浮梁越一日復之寇趨馬影橋逼湖口玉麟督水陸軍力擊之遂收彭澤  
寇宵遁陷都昌鄱陽我師馳至都昌擊退踞寇復之休寧寇犯上谿口陷副將  
王夢麟壘屯谿寇犯江灣陷副將楊名聲壘古隆賢賴裕新糾大股犯羊棧桐  
林二嶺張運蘭會軍擊之寇由新嶺退去犯婺源國藩督飭鮑超大破於黟縣  
廬邨別軍繞出羊棧斷寇歸路寇沿崖逃走追軍反出其前迫之墜崖死無算  
而休寧城寇以鮑超回剿景德由藍田擾及小溪一帶張運蘭擊敗之別股屯  
鄭家橋者進逼漁亭我軍兩路抄擊寇狂奔斃黃世勗等復敗上溪口寇追至  
馬全街而還自是嶺外寇不敢輕入玉成率衆萬餘犯桐城樅陽我軍鎮靜固  
守寇踞七里亭韋志俊扼樅陽街口李成謀昇三版入蓮花池護衛營卡寇不  
得逞寇再犯景德宗棠敗之鮑超進扼洋塘宗棠進扼梅源橋寇自下游糾  
大股屯洋塘對岸我軍大破之僞定南主將黃文金負創西奔時祁門三面皆  
寇僅留景德鎮一路以通接濟寇盡銳攻撲欲得甘心焉時國荃圍安慶寇勢

漸窮十二月玉成糾約秀成輔清及捻匪併力西犯其大股寇捻俱從南岸渡江而北會於無爲廳江以圖急援懷寧桐城勢甚猖狂多隆阿等會於樅陽一帶布署戰守皖南寇大股竄孝豐又別股由昌化竄分水嘉興踞寇備具礮船意圖南下寇勢蔓延浙東西同時告警十一年正月傅忠信譚體元汪海洋洪容海各挾衆數萬棄石達開歸秀成秀成驟增衆二十萬勢大熾由石埭分兩路趨祁門防軍皆敗江長貴援大洪唐義訓迎戰厯口斬僞麟天豫古得金寇潰走常山富陽新城臨安皆爲我軍所克解廣信之圍寇竄鉛山弋陽貴溪金谿漸逼建昌秀成自去冬犯皖南黟縣羊棧嶺不得志竄浙江常山江山等處今春以全力攻玉山轉圍廣豐犯廣信志在踞守要地以通徽浙之路犯建昌作浮橋渡河以大股屯水東環城築二十餘壘以浮橋通往來江西寇黃文金犯景德鎮左宗棠鮑超敗之石門洋塘斃許茂材林世發文金踉蹌宵遁銅陵援寇與敗匪合復入建德分踞黃麥鋪諸處鮑超督諸軍乘勝壓之斃寇萬計追至建德會師水收復縣城誅林天福秀成梯攻建昌參將高安等縱火具創

退之復潛爲地道修子城備之寇船犯太湖陷東西山全湖失陷湖州北路七十二溇港橫被竄侵太湖巨浸也襟帶蘇常湖三郡港口紛歧多至百餘自蘇常陷後沿湖要隘多爲寇有去冬間寇船自湖州出湖迭犯西山角頭等處爲副將王之敬礮船所敗然所部不滿十艘募民船佐之卒以衆寡不敵敗死二月玉成圖援安慶糾合捻首襲瞎子率五萬人攻松子關成大吉兵僅二千五百寇多二十倍分兩路抄官軍後大吉令參將王名滔從左側山橫截而出陣斬襲瞎子寇驚潰復還悍黨分五路進再戰再敗捻散亡三萬人初玉成嗾襲瞎子犯松子關而自率悍黨十餘萬從霍山之黑石渡襲余際昌營於樂兒嶺相持四晝夜力竭而潰遂抵英山入蘄水襲陷黃州分黨取蘄州擾麻城闖入黃安黃坡孝感雲夢諸縣並陷德安府隨州勢益猖獗武昌戒嚴秀成聞玉成攻國荃久不下分攻蕲黃廣濟欲國藩赴援以分兵力秀成歎曰英王誤矣正使國藩得全力以攻皖彼豈暇救此間城哉彼有長江之利而我無戰艦安能絕其糧道不能以我攻浙救京師爲例也玉成屯孝感而以德安雲夢隨州三

處爲長蛇陣窺伺荆襄官文飛調李續宜舒保彭玉麟率水陸諸軍回救侍賢  
竄踞休寧城築壘上溪口河廊石田小當等處與休寧屯溪之寇互爲犄角國  
藩以休城不克徽郡難圖祁門終屬危地檄朱品隆等進攻焚諸聖寇夜遁收  
復縣城左宗棠進剿婺源寇破侍賢於清華街而城寇忽分黨由中雲竄入樂  
平界宗棠親率數營屯柳家灣扼其衝寇敗退而援寇漫野至返旆截殺復大  
潰而去侍賢糾徽州悍黨圍王開林於婺源甲路越三日潰圍出還景德秀成  
率黨竄撫州爲知府鍾岐等擊敗竄宜黃復糾土匪陷遂安國藩遣大富防景德  
宗棠進軍鄱陽次鮚魚山聞寇偷渡昌江圍景德旋移駐金橋寇竄平  
湖分由西路榔根嶺北路禾黍嶺進犯副將沈寶成當西面江長貴出北路拒  
之國藩復檄朱品隆由祁門馳援殲寇越嶺而逃宗棠擊破於樂平范家鄉陣  
斬僞謝天義黃勝才僞燒天福李佳普等侍賢率數萬衆潛匿於牛嶺柳家灣  
回龍嶺翌日齊進景德鎮陳大富戰死陷之金魚橋坐營後路已絕遂移屯樂  
平初國藩至皖南設糧臺於江西以景德鎮爲轉運寇之窺祁門者屢遭挫敗

遂悉銳再犯景德冀絕大軍餉道至是陷之國藩度糧路已斷惟急復徽州可通浙米觀至休寧攻徽寇不克仍屯祁門而寇環攻不已誓以身殉宗棠大破寇於樂平斬馘數萬侍賢遁圍建昌撫州攻之不下遂陷吉安大軍旋復之乃進陷瑞州於是祁門之路始通三月我軍克新淦解麻城圍繁昌荻港蕪湖魯港寇皆敗走民團克雲夢收應城黃安黃坡金國琛會水師克孝感進攻德安逼城爲壘嘉興寇竄陷海鹽平湖宗棠敗寇於龍珠桃領寇渡吉水海灘陷吉安復爲知府曾詠等攻復寇由吉安東犯分股竄峽江與新喻賊合併屯陰岡嶺臨江告警玉成分股守德安隨州牽緩我軍卒悍黨由蕲州黃廣回宿松進太湖大營後路繞趨宿松桃花鋪巡竄石牌逼安慶集賢關築壘未幾桐城蘆江僞章王林紹璋僞千王洪仁玕等率二萬自新安渡至橫山鋪練潭一帶連營三十餘里至馬踏石竄安慶與玉成會解城圍多隆阿分擊敗之玉成闖入集賢關攻圍師各壘復於菱湖兩岸築壘阻水師進攻楊載福遣軍昇礮船入湖毀寇船筏復立壘湖傍使寇不敢逼水陸大營多隆阿自桐城挂車河進攻

安慶援寇林紹璋等於練潭橫山逼溺菜子湖無數黃文金糾蕪湖寇及捻二萬築壘天林莊二十餘座謀入安慶城多隆阿誘斃二千國荃圍師不少動水師焚奪寇船斷其接濟以困城寇侍賢自廣信竄常山陷之入踞江山旋由常山分股犯衢州先是福建援師自衢防回援汀州軍勢驟孤故寇乘虛回竄又別股由開化白沙關竄玉山童家坊僞爲難民呼城礮創之常山寇復至會攻城詐爲援兵奮力擊之退屯三里街七里街潛掘地道道員王德榜縋城出大破之寇還常山遂安寇直抵淳安港口副將余永春中創敗退茶園寇踵至再退桐關嚴州大震四月國藩自祁門移駐東流多隆阿擊敗玉成棄壘遁屯集賢關國藩復撥鮑超一軍胡林翼撥成大吉一軍同赴安慶初玉成即渡湖北岸築壘十三城寇葉芸來出城接應亦築五壘於南岸以隔國荃與其弟貞幹之師國荃掘長濠包寇壘於長濠之內玉成前阻圍師後受鮑成兩軍夾攻計窮遁去猶死守關內外寇壘又於隨州德安各留悍寇牽制我兵官文派軍攻德安築長圍困之秀成踞義寧州武寧縣逼近湖南北邊境官文派軍分守興

國及崇通山治四縣寇裏脅七八萬人一由苦竹南樓二嶺犯通城一由蛇箭嶺犯通山我軍衆寡不敵均被闖入直抵崇陽之白霓橋其窺伺興國之寇撲余際昌營官軍戰失利退大治隨至大冶並擾武昌官文咨調李續宜等屯東湖站紙坊一帶相機進剿秀成自孝豐竄四路陷長興壽昌分犯三里亭千家邨復自瑞州分竄西路連陷上高新昌北路陷奉新擾義安以阻援師連日曾秉忠等水陸諸軍破走乍浦平湖寇於金山各隘金山與浙之平湖水陸交錯薛煥與秉忠商籌平湖一日不復松江屬一日不安謀越境會攻平湖再圖乍浦當陳玉成之退走也多隆阿已進軍磨盤山遣溫德勒克西曹克忠金順等分途尾追玉成復糾合林紹璋洪仁玕黃文金及格天義陳時永拉首孫葵心共三萬餘併力上犯築八壘於挂車河磅礴尖迤西恭盤嶺率黨破山內黃山鋪團卡仍出山外調黃文金四千餘人伏山內自率悍黨分道進犯我壘多隆阿分軍設伏於恭盤嶺老梅樹街而自率馬步各軍分道拒戰寇後隊忽自亂老梅樹街伏騎乘之勢不支玉成督敗黨抵敵而項家河寇壘爲舒亮伏兵

襲焚烟焰突起寇大驚敗奔桐城八壘悉平燒山內寇館數十處斃八千餘上  
命左宗棠幫辦軍務寇越衢州陷龍游連陷湯谿金華紹興寧波皆大震寧紹  
爲浙東完善之區寇垂涎已久金華既陷勢將內犯寇犯丹徒水軍敗之毀寇  
浮橋曾秉忠自金山攻青浦寇堅壁不出敗嘉善援寇於章練塘寶山防軍姜  
德攻嘉定以分寇勢都興阿敗天長六合單寇於揚州西北鄉盡毀甘泉山寇  
壘秉忠自金山涉涇率礮船進破白虎頭金澤鎮寇巢直抵浙境敗西塘援寇  
進毀愈滙卡寇退入嘉善金華寇分股陷蘭谿武義五月鮑超成大吉破集賢  
關外赤岡嶺寇壘三殲寇三千餘僞屬天豫賈仁富僞傅天安李仕福僞垂天  
義朱孔棠等皆伏誅大吉回援武昌餘一壘超獨破之禽斬劉瑜林瑜林陷蘇  
常爲前鋒自恃其勇欲以孤壘遇官軍既伏誅國荃軍勢自倍國藩之移東流  
也皖南寇度嶺內空虛糾衆由方干嶺樟樹衛防軍而入潛陷黟縣築壘西武  
嶺等處窺伺祁門張蓮蘭等克黟縣寇併入盧齡十都增壘抗拒我軍克其七  
壘寇悉駢誅徽州寇聞之竄走宗棠追剿侍賢至廣信以建德再陷竄入鄱陽

視田街急回景德寇宵遁宗棠截之大戰樞樹嶺寇走建德後河遂復縣城運  
蘭進攻徽州復之汀州寇由江西瑞金回竄時江西寇竄江山進陷遂昌秀成  
以一股踞瑞州義寧武寧分三路犯湖北連陷南岸興國崇陽通城大冶通山  
武昌咸寧蒲圻寇鋒逼武昌省城官文李續宜會遣水陸軍分道進剿胡林翼  
亦自太湖移軍還省先援南岸再圖黃蘄寇之竄擾江西者自去冬以來前後  
凡五大股其由皖境竄入自北而南者三股一曰黃文金連陷建德鄱陽六縣  
一曰李侍賢連陷浮梁景德等處此二股均經左宗棠擊退未能深入江西腹  
地一曰李秀成連圍玉山廣信廣豐三城又深入內地圍建昌撫州均未破  
竄入崇仁樟樹鎮吉安峽江並踞瑞州府城分竄奉新靖安武寧義寧各州縣  
又竄入湖北之興國大冶蒲圻崇通等處此北三股也其由兩廣竄入自南而  
北者二股一曰廣東股其渠有周姓許姓上年由仁化樂昌闖入江西與李秀  
成聯合圍攻廣信南豐建昌各城連陷湖口興安婺源經左宗棠攻克德婺兩  
城遂歸併徽州一曰廣西股其渠爲朱衣點彭大麟本石達開之餘黨也由江

西竄出湖南經過南贛陷福建之汀州回竄江西蹂躪雩都建昌河口等處其前隊已由婺源竄浙後隊尙留撫州此南二股也五大股中又分爲三支四支忽分忽合時南時北國藩令鮑超回援江西由九江直搗建昌先保江西省城瑞州及各縣踞寇逼近南昌毓科留張運桂等扼屯城外劉于淳屯安義堡後營屯生米丁岐屯臨江皆爲省垣西路屏蔽李續宜克武昌寇陷松陽處州永康縉雲縉雲既復寇竄永康宗棠遣軍克建德國藩移屯婺源婺源者界江皖浙三省之衝也賴裕新合汀州寇犯德興分黨踞九都之新建遣軍敗之寇渡江竄浙江開化華埠德興婺源肅清游擊黃載清克遂昌松陽踞寇亦聞風遁載清進攻宣平克之寇竄武義處屬肅清金華知府王桐等克永康寇併趨金華江陰常熟寇由海塘竄壽星沙大肆焚掠六月曾國荃會水師破菱湖北岸十三壘南岸五壘斬馘九千餘寇之踞湖北咸甯蒲圻通城者我軍均克復寇由武甯犯建昌金華寇出擾曹宅等處李元度克義甯張玉良等率水陸軍圍攻蘭谿不下寇僉嚴州軍單築壘女埠下竄嚴州陷之尋爲張玉良所復寇陷

上高擾萬載知縣翁延緒等克復武甯水師李德麟等擊毀黃山黃田石牌三  
港寇船壽星沙寇退回江陰蘇州寇擾青浦李恒嵩自北斬山移屯塘橋以固  
松江門戶嘉定寇糾蘇州寇犯上海我軍禦於貞如寇渡河竄華漕奪踞參將  
王占魁壘薛煥遣軍奪還寇走南翔再敗退嘉定時江水盛漲國藩檄楊載福  
圖池州牽制南岸載福攻十日不能下乃率李成謀三營至舊縣偵北岸無爲  
瀕江壘寇避水移神塘裏河駁擊破之進攻州城陳玉成楊輔清死力抗拒還  
軍次大通敗青陽寇還屯黃石磯七月玉成糾輔清衆十餘萬自無爲州犯英  
山繞宿松徑攻太湖爲救援安慶計寇排隊山岡作長蛇勢復有寇數萬自龍  
山宮對岸至塔下袤延二十餘里分路誘我軍我軍堅守不動夜大兩賊洶湧  
潮進城中飛丸隨雨落至晨開始解玉成乃自小池驛進至清河高樓領欲結  
桐城寇包裹我軍以解安慶之圍攻撲六晝夜玉成輔清援桴鼓督軍揮刀砍  
不前者我軍奮擊大挫其鋒玉成輔清率大隊竄至高河鋪馬鞍山桐城圍復  
合安慶圍師悉平城外諸壘秀成自竄踞瑞州分陷上高新昌奉新等縣以瑞

州爲老巢官文檄元度會軍攻克新昌奉新上高敗寇均趨瑞州乃遣游擊賀接華等會軍直搗郡城攻復之官文以德安寇謀窺荆襄派水陸諸軍節次嚴剿寇堅守有冒死突出者諸軍擊潰寇不得入城寇復出抄我軍後以援前寇乃斷其歸路寇奔河西伏兵四合架梯入立復府城程學啟克安慶北門外三石壁北門寇路已絕德安寇竄河南信陽轉犯羅山光山商城兵團截擊退奔皖境鮑超督諸軍大破豐城西北岸寇墾東岸屯寇驚潰劉于溥乘之收樟樹鎮初超自九江進軍秀成聞風遠遁率瑞州奉新清安安義之寇先分萬人擾撫州令玉成率悍黨二萬攻豐城而自領大隊由臨江踞樟樹沙湖豐城一帶綿五百餘里先一日超至豐城對河值寇在樟樹爲浮橋障山岡超分中後左右四隊齊進寇搖旗迎拒戰一時許大敗馘八千餘人八月克安慶城城外四時僞右軍劉官才方盤踞池州與安慶相犄角內則堅守石埭太平阻徽師進兵之路外則上犯德建鄱陽爲江省北邊之患今與安慶相繼而下皖南軍勢

益張國荃與多隆阿會議以桐城爲七省要道安慶咽喉寇死守待援玉成尙擁衆數萬徘徊於集賢關內外謀與桐城合併乃會軍進擊玉成輔清皆大敗越山而逃遂復其城宿松黃梅蕲州廣濟相繼下多隆阿進屯蕲州曹家渡扼下游敗寇以絕黃州寇援李續叢等會同水師進攻黃州寇築壘凌濛以抗我軍蔣凝學令投誠劉維楨服寇衣僞爲援衆復造玉成僞文誘寇出而設伏以待寇果出爲我軍所殲立復黃州時秀成竄出豐城踞白馬寨遣黨攻撫州鮑超馳至撫圍立解寇走貴谿得廣東新寇合大衆據湖防河口勢甚洶湧超分五路應之踢毀七十餘壘進復鉛山國藩移駐安慶省城初侍賢攻嚴州兩月不能下乃於烏石方門二灘連環築壘逼近外濠城內糧盡援絕副將羅大春受重傷率將士突北門出城遂陷秀成自桐廬新城進陷餘杭寇之竄貴谿者聞鮑超自撫州至豫遁走初閩寇三起與花旗廣匪先後由建昌竄至廣信與秀成併爲一路鮑超會屈蟠大破廣信寇壘立解城圍秀成敗走鉛山築七壘與城寇相守禦超踵至悉覆其壘渡河攻城克之秀成竄圍廣豐不克分竄玉

山築壘十餘復爲道員王德榜所破秀成全股悉自江西竄犯浙境一由玉山陷常山一由廣豐犯江山龍游踞寇同時出擾衢州危迫是月知府張詩華克復瀘谿興安各城福建援軍張啟煊擊寇浦江失利陷之寇直犯五指山金華大股踵至米興朝等迎擊失利義烏東陽相繼不守啟煊退守諸暨辟水嶺寇至再潰九月寇陷處州大軍之破安慶也無爲州寇馬玉棠妻子居安慶曾國荃生致之密諭玉棠獻無爲城無爲居皖北形勢控金陵引蕪湖爲寇必爭之路附近泥汊口神塘河諸處石壁星列以阻我軍曾國荃會同水師抵泥汊口壘高難仰攻乃令築寨安營而自率勁旅迅赴楊家橋鳳凰頸決堤斷寇歸路寇大恐遁入城越日攻神塘河寇亦遁歸乘勝直抵城下至是玉棠事洩僞頂王朱王陰幽之玉棠黨擧兵攻王陰我軍乘之寇大潰斃僞豫侯丞相等城立復秀成由臨浦陷蕭山再由蕭山塘路竄杭州陷諸暨紹興府城分竄新昌嵊縣上虞餘姚均先後失守國荃連破運漕鎮及東關鎮鎮在無爲含山之界外瀕大江內連巢湖寇糧皆屯於此上濟安慶廬州下輸金陵爲南北鎮餉僞巨

王洪某率衆五六千並礮船數十守之寇失此益膽落十月楚軍克復隨州湖北自黃州德安復後惟隨州以係撫援應擾及襄陽懇堅死抗官文擊退豫撫復用降將劉維楨取黃州計誘寇出城敗之克復州城多隆阿收舒城蘆江李續宜部將蔣凝學屯六安霍山宗棠屯婺源張連蘭等屯徽州李元度新軍出廣信寇悉赴浙江而皖南寇聚保廬州宗棠議大舉援浙寇猖獗全省糜爛逼近省垣上命曾國藩管轄江蘇安徽江西浙江軍務秀全見各省攻討嚴刷迭克名城金陵唾手可下乃大懼令秀成侍賢分途翼擾分我兵力秀成竄浙江壘陷各郡邑直至餘杭浙江省戒嚴寇從塘路抵杭州撲武林門外賣魚橋踞我營卡寇隊尋大至蓮耀道阻提督張玉良來援與城軍夾守寇乃自海潮寺至鳳凰山環木柵實土其中爲堅壁使城外隔絕日以槍礮轟城玉良攻木柵中礮死內外兵益懼而城中久乏糧人多餓死自蕭山諸暨等城陷後援兵路絕寇尋陷奉化台州十一月由慈谿犯陷鎮海台州寇分股陷黃嚴甯波會同輔清由浙江嚴州遂安踰嶺回竄徽州復蔓延衢屬開化其謀在深入江皖腹

地阻我援浙之師宗棠於廣德奉督辦浙江軍務之命以寇圍徽郡當入浙後路遣軍至婺原會防軍援剿輔清大舉分犯徽州休甯兩敗於屯谿篁墩遂趨南路逕逼嚴郡而秀成已陷杭州滿城亦相繼失守輔清率甯國寇圍攻徽州休甯兩城僞成天安竄休甯之屯谿尋又竄篁墩十二月總兵張運桂堅守徽城待援乘間出擊破寇壘寇復踞屯谿市街潛口一帶以絕徽軍糧道國藩調總兵朱品隆馳赴休甯與唐義訓先破屯谿街口寇卡毀河邊四壘進平石橋潛口寇巢尋派軍護糧赴徽寇由萬安街分股包抄我軍奮擊之寇不敢遏張運桂以嚴市街爲寇踞糧道梗阻與休甯軍會商兜剿燬寇十餘壘輔清受傷值除夕大雪寇掠無所得悉遁去圍立解是月提督李世忠克復天長六合寇自八年踞六合屢攻不下黃雅冬思反正潛約世忠先削其外疊而已爲內應世忠自滁州至六合遂大破寇壘斬馮懋林直造城下黃雅冬倒戈縱火拔關我軍擁入城禽斬衝天福林國安頂天燕江玉城擊天福魏正福五十餘人皆悍黨也詔黃雅冬更名朝棟世忠以黃朝棟密約天長寇陳世明爲內應朝棟

所部未盡雍髮詐爲援寇進城下世明拔關納軍遂克之是歲汀州寇竄陷連城分竄上杭江西寇復闖入武平境時寇謀分股一圖竊龍巖一由清流寧化擾延平邵武總督慶端以延平爲全省關鎖馳往駐紮克連城進攻汀州創洪容海克之而江西續竄武平之寇亦爲副將林文察等擊敗國藩疏請飭慶端嚴守浦城俾寇不得由閩境竄江西同治元年正月是時浙蘇兩省膏腴盡爲寇有全浙所存尙有湖州海寧兩城又孤懸城中獨衢州一府尙可圖存國藩疏薦福建延邵建甯道李鴻章署理江蘇巡撫別立一軍由滬圖蘇以圍攻金陵屬曾國荃以浙事屬左宗棠於是東南寇勢日就衰熄世忠攻江浦約劉元成單玉功爲內應殺僞報王僞王宗操天福等七十餘名立復江浦至浦口復克其城自江浙兩省寇糾衆數十萬併力東犯連陷奉賢南匯川沙等廳縣烽火徧浦東逼上海各隘防軍遇寇輒潰走寇旣爲法船所擊退踞天馬山陳防橋復爲李恒嵩所破敗入青浦城中其浦東大股踞高橋欲斷我要隘美人華爾白齊文撰寇巢毀其壁進攻浦東浦南大破之尋嘉定青浦寇進逼七寶以

寇上海圍防軍郭太平營薛煥督軍解其圍甫還軍寇復大至李鴻章率湘淮軍援江蘇營上海城南黃翼升統水師相繼至宗棠出嶺攻開化楊輔清糾衆踞張蟛銀坑石佛嶺窺伺衢州連戰走之陣斬藍以道開化肅清九洑洲寇竄江浦浦口和州分黨犯橋林二月嘉善平湖寇水陸犯金山洙涇七日陷之松江上海俱震東梁山僞愛王黃崇發西梁山僞親王某裕谿口僞善王陳觀意糾合雍家鎮寇分股上竄五顯廟水家邨湯家溝水師李成謀登岸破之斬黃崇發初宗棠旣克開化進軍常山璞石偵李侍賢嗾壽昌蘭谿寇糾遂安恭天義賴連繡犯開化馬金謀長圍困我宗棠回攻遂安乘援寇未集先剿克之三月李元度敗寇於江山碗窯再敗小青湖援寇江山賊進陷峽口閩軍曾元福坐踞之連管數十里宗棠自常山遣軍進剿林文察之克遂昌也寇併聚松陽蔓延雲和景甯尋以次擊退進規處州破寇松陽平港頭寇坐奔處州碧湖上年國藩檄鮑超平青陽城外寇坐作長圍困之僞王奉古隆賢潛糾浙江死黨三萬餘人進撲銅陵分我軍勢超率援軍盡掃橫塘等處百餘卡三十六壘

古隆賢偵知大軍北出陰統涇太悍寇築九壘於青陽猪婆店門我師以通糧道適超凱旋進逼青陽克之國荃既募湘勇回安慶國藩飭令攻取巢縣舍山和州西梁山等處以爲欲制寇死命先自巢始遂進屯縣城東北劉連捷等赴望山岡以扼南路寇乘我壘未定來犯拒敗之初寇踞江岸以北上援廬州下衛江寧分布堅城拒守要塞通上下之氣杜我進兵要路至是攻破巢縣銅城閘雍家鎮旋收巢縣復舍山再會水師大破裕溪口寇屯寇之踞金陵也以全力扼東西梁山兩山對峙大江至此一束水急流洞視小孤山尤爲形勝國荃以此關爲金陵鎖鑰循江上逼西梁山而陣寇走江州水陸爭起搏擊遂克之自是金陵重鎮已失其半僞匡王賴文鴻竄繁昌縣糾約踞寇撲我三山峽營曾貞幹乘寇未逼督軍分道馳剿寇大亂殪其渠吳大淵遂克繁昌蕪湖援寇潛屯魯港以圖抗拒貞幹會同水師奪其船百餘艘夷三壘十餘卡餘悉遁蕪湖貞幹督各軍馳抵南陵立復其城鮑超旣克青陽議先取石埭太平以固徽州之防繼取涇縣以達寧國之路乃分軍五路由龍口直抵石埭寇矢石交下

總兵婁雲慶從西北二門攻入立復縣城寇大懼糾集南陵援寇大至屯甘棠  
鎮阻我帥我軍分三路進擊破十七營遂復太平禽斬僞主將徐國華等三十  
七人先是超攻青陽時有僞佐將張遇春率衆萬餘乞降超納之令暫屯景德  
三谿至是太平賊寇將北走張遇春驟起殲之超回軍挾之進攻涇縣復其城  
遂東渡清弋江進規寧國李侍賢自陷常山與龍游寇同撲衢州總兵李定泰  
等敗之復常山解衢州之圍宗棠馳至常山攻克招賢關以通衢州糧道其撲  
江山之寇檄李元度會攻石門花園港寇巢毀十四營寇勢不支乘夜向台州  
潛遁是時楊輔清由淳化犯遂安宗棠自常山進屯開化圖之尋遣劉典進攻  
遂安輔清退走淳安昌化竄皖南犯寧國四月儀徵寇敗後竄擾沙漫洲等處  
水師擊走之揚境肅清浙軍會民團克復州台仙居黃巖太平寧海縉雲樂清  
慈谿等縣禽斬延天義李元祿僞王李洪藻李遇茂僞主將李尙揚尋進克寧  
波府鎮海青田二縣台處寇上竄溫州踞太平嶺及任橋瞿谿尋分竄瑞安張  
啟煊營陷退守縣城楚皖軍會克廬州秀成竄擾蘇常玉成則盤踞皖楚之交

自大軍克復安慶玉成率黨自石牌而上調宿松黃梅之寇同至野雞河欲赴  
湖北德安襄陽招集其黨羣曾不從乘夜由六安走廬州衆漸擴貳秀全復督  
責甚切玉成懼力守廬州不敢走皖楚諸軍困之日盼外援而潁郡解圍後僞  
扶王陳得才西竄僞天將馬融和隨張洛行遠遁外援遂絕多隆阿與皖軍張  
得勝設伏誘賊出戰兩軍合擊寇大敗遂克府城誅僞官二百十三名玉成奔  
壽州尙有死黨二千以苗沛霖陰受僞封往乞援沛霖縛之獻潁州勝保大營  
並禽僞導王陳士才僞從王陳德僞統天義陳衆成僞天軍主將向士才僞虔  
天義陳安成僞禱天義梁顯新及親隨僞官二十餘並正法秀成聞玉成死頓  
足歎曰吾無助矣玉成兇很亞楊秀清而戰略尤過之軍中號四眼狗自玉成  
伏誅楚皖稍得息肩而金陵勢益孤矣民國克寧海象山奉化李世忠大破寇  
於六合八步橋寇竄滁州來安又大敗寇勢大餒華爾等克柘林謀搗金山衛  
知府李慶琛攻太倉秀成率僞騎王陳炳文僞納王郜雲官來援逼青浦李恒  
嵩失利退走塘橋嘉定寶山皆震寇別隊由婁塘攻陷嘉定英法二提督及我

軍突圍走上海鴻章飭軍駐法華鎮扼滬西寇遂踰青浦逕逼松江秀全自竄踞金陵以東西梁山爲鎖鑰以蕪湖爲屏蔽而尤以金柱關爲關鍵自國荃破太平府彭玉麟破金柱關黃翼升往襲東梁山一戰而下貞幹循江進克蕪湖提督王明山等復攻破烈山石壘未逾三日上下要隘悉爲我有從此上而寧國下而江寧寇均失所恃矣國荃進軍江寧鎮屯板橋潛襲秣陵關進破大勝關三汊河直抵兩花臺軍焉江北浦口六合敗寇悉衆江邊李世忠蹙之渡還九洑洲江北肅清五月爲什天安吳建瀛統衆衆南匯與淋天福劉二林屢爲秀成養子所凌至是來降我軍整隊入城秀成養子方踞金山衛來犯復糾川沙寇回撲復爲我軍所敗直逼沙川寇由海塘竄出遂復川沙進攻松江寇逼泗涇防軍游擊林叢文敗退北門華爾由青浦回援鴻章令程學啟扼虹橋分青浦松江後路寇陷湖州福建糧儲道趙景賢拔刀自刎賊奪之囚一年餘秀成禮待之極厚終日罵不絕口譚紹光舉槍一擊而殞初寇圍逼松江鴻章以松江扼青浦東西之中爲最要地自赴新橋令程學啟時出兵綏寇寇初營西

門妙嚴寺土城華爾以礮毀之寇復攫據之增築礮臺環合四門常勝軍戰寇  
資福濱城軍乘夜分門出擊寇遁乃簡精卒破天馬山寇營突入青浦盡焚  
輜重寇死戰併力守松江其分屯廣福林及泗涇之寇鴻章進擊敗之寇遁入  
營斷橋以拒劉銘傳等克奉賢陳炳文鄧雲官等率衆數萬圍新橋程學啟營  
填濠拔鹿角學啟不及以槍礮禦擲磚石擊之寇藉屍登濠學啟開壁突擊寇  
始卻而分股踰新橋逼上海鴻章將七營往援大破之追至新橋學啟大呼夾  
擊寇解圍遁陳炳文鄧雲官皆負傷竄走進軍泗涇寇大潰盡燒其壘廣福林  
塘橋寇亦退上海松江俱解嚴初李世忠遣軍自六合通江集南渡連破石埠  
橋龍潭東陽寇壘悉遁句容自是九洑洲寇外援盡絕秀全遣江甯寇大攻  
石埠橋曾玉梁豐世忠遣義子李顯發往援入壘會守陳坤舊自句容進攻龍  
潭東陽諸壘守軍黃國棟等退併石埠而寇攻益急顯發會水師力戰盡平其  
壘解石埠閏時李秀成自松滬敗還謀連合杭湖寇衆救援江寧秀全遣悍黨  
二萬攻大營國荃設伏敗之連日宗棠督軍攻衢州東南北三路寇壘皆盡初

秀全以大軍驟逼城下日出撲犯輒被創趣浙曾李侍賢蘇曾李秀成還救江甯而宗棠攻衢州與李侍賢相拒遂安龍游間鴻章新克松江廳縣秀成奔命未遑乃與諸黨議曰曾國荃兵力厚集於金陵爲久困之計我勢日蹙不如先圍害國太平斷其後路我軍勢既振敵乃可圖也秀全以久困慮糧不繼仍促其入援秀成不得已乃先遣悍黨數萬自蘇西援時甯國餘寇竄併江寧屯於淳化鎮者亦不下二萬餘六月宗棠自衢州進軍龍潭侍賢自遂安敗後復糾合金華及溫處悍黨分屯南岸湖鎮羅埠北岸蘭谿之永昌太平祝家堰諸葛郵孟塘油埠裘家堰宗棠駐潭石望距城十五里遣眭金城會劉培元駐城西圭塘山屈蟠王德榜駐紫金旺崔大光駐城北對河茶圩劉典駐高橋先是李糧江浙斷我餉道計宗棠遣軍大破之寇由壽昌退還金華七月我軍進敗龍游寇毀蘭谿油埠寇屯陣斬僞駿天義鄧積士等宣平處州餘姚壽昌均以次收復是時楊輔清糾衆十餘萬竄踞寧國府城復分黨屯聚圓山寒亭等處阻

我進兵之路鮑超飭將卒撲寒亭寇出巢猛拒總兵宋國永橫躍入陣伏起扼歸路寇篩潰平寒亭管家橋楠家甸獅子山寇館數十處寇坐三十五座爲衛王楊雄清糾合餘衆遁回甯郡輔清聞寒亭戰敗即糾黨繞城結壘延三十餘里鮑超進壁烏紗鋪飭婁雲慶設伏望城岡以輕兵誘寇寇以我兵寡直壓山岡而下我軍張兩翼却之寇見旌幟遍山谷誤爲援寇反鬪中伏我軍復斷其後斃無算望城岡及抱龍岡十數都皆平寇復陰結別股築壘堅拒鮑超率各軍逼壘而營各僞王出大隊於南北兩門夾攻鮑超分軍進搏寇敗走浮橋我軍焚橋截殺無得脫者寇復收餘燼再戰再敗輔清單騎脫走立收甯國府縣二城初輔清聞超軍至數遣使乞援於江甯秀全遣僞保王洪容海率悍寇赴之容海者石達開死黨也既至攝超威乞降超許之而郡城已克容海奔廣德夔獻州城卒衆六萬就撫復本姓童江甯援寇大舉犯壘分二十餘隊牽制各軍而以銳卒突兩花臺國荃拔卡縱擊大破之解圍去潘鼎新等會克金山衛城地界江浙爲浦東門戶至是一律肅清是月鴻章督諸軍會攻青浦克其城

譚紹光方踞湖州聞青浦已失恐官軍蹑其後乃合嘉湖蘇崑寇犯松滬西北進窺青浦學啟會水師擊却之寇攻北算山壘不獲退遂東趨攻北新涇北新涇爲上海西路之蔽防軍大戰却之寇分竄法華逼上海鴻章調諸軍自金山衛青浦松陵回援悍寇二萬圍官軍學啟戰逾時寇大潰北新涇之寇憑河據壘伏左右以待我軍鴻章親督陣與學啟軍合盡毀寇營紹光遁嘉定上海危而復安八月寇陷慈谿華爾復之受創尋卒嵊縣新昌寇陷奉化閏八月奉化寇窺甯波宗棠飭蔣益澧等進平蘭谿裘家堰寇堅斃僞元天福萬興仁僞走天福劉茂林等羅埠踞寇僞戎天義李世祥乞降益澧攻羅埠世祥應之破五星湖鎮寇聞之遁我軍渡河破五星街此皆龍游湯谿要衝也益澧屢攻湯谿不下軍多死傷宗棠進營新涼亭逼龍游城五里飭益澧由羅埠進攻湯谿劉典屯扼油埠湖鎮以堵蘭谿金華援寇九月鴻章會常勝軍攻嘉定克之紹光及僞魏王陳炳文復糾援寇十餘萬分道自太倉崑山來犯北由蟠龍鎮至四江口圖據黃渡以當青浦南由安亭至方泰鎮圖入南翔尋我軍郤寇南翔寇

乃於三江口四江口立左右大寨設浮橋潛渡困我水師而青浦西北洋新涇  
趙屯橋自鶴江寇益蔓延擾及重固鎮張堰距青浦十餘里黃翼升率水師自  
青浦出衝敵舟寇扼白鶴江不得進別隊犯黃渡李鴻章會擊敗之時四江口  
久被圍紹光屯吳淞江口炳文踞南岸鴻章督諸軍至黃渡分三路進擊自辰  
至未屢衝不動鴻章督戰益急諸軍逾濠直逼寇營學啟礮傷胸復裹創疾戰  
寇由南岸潰而北四江營守將皆衝圍而出寇退崑山我軍毀其浮橋石卡殆  
盡斃數萬夷壘二百座寇自是不復窺松滬悉力堅守崑山太倉尤爲蘇州門  
戶寇所必爭者也審國再陷寇復由句容進蒲鎮江壁湯岡獮子材督軍破湯  
岡九壘寇歸青山老東乘勝拔之竄還句容初僞護王陳坤書糾衆四五萬圖  
犯金柱關彭玉麟禦之花津五戰皆捷尋寇以戰艦數百從東塘拖出我軍毀  
其浮橋寇乃不敢渡河至是惶寇結筏偷渡屢逼金柱關我軍水陸大舉敗之  
花山寇遁上駟坡而水師已先毀浮橋寇回戈轉鬪諸軍合擊殲萬餘其黨頭  
等處尙延袤百餘里我軍環攻焚其壘花津清山象山采石磯諸寇巢悉數平

毀自是蕪湖金柱關六十里之間寇蹤以絕時大營軍士患疫方稍止秀成親率十三僕王號稱六十萬脣集金陵東自方山西至板橋鎮旗幟林立直逼我軍營壘尤趨重於東西兩隅曾貞幹等擊敗之小河邊城寇援寇尋由東西兩路進攻分黨趨洲上抄出猛字等營後我軍分路擊退之寇之圍逼西路者歷六晝夜爲我軍擊敗寇悉向東路逼營而陣潛通地道百計環攻各軍將士負牆落立擲火球擊寇寇負板蛇行而進填濠欲上我軍叢矛擊刺寇搜尸復進抵死不退飛彈傷國荃頰血流交頤仍裹創上濠守禦侍賢自浙東來援急攻吉後營喊臺國荃引軍馳救寇來益衆用箱匱實土排砌濠間暗鑿地道我軍以火箭攢射隨出銳卒擊之賊鋒稍挫遂毀西路寇壘東路之寇環逼不已嘉字吉後兩營地道轟發寇擁入缺口我軍分路衝出決戰缺口以內之寇誅戮無遺濠外寇復舉旗督戰各營同出抄殺寇精銳悉挫折復於東路別開地道西路決江水淹絕連糧之路貞幹在高坡增築小營令水師駐雙橋護餉道我軍凡破寇地道五處寇計益窮國荃乘勢進拔十餘卡破東路四壘西南諸壘

望風驚潰追至南路牛首山一帶平壘數十座搜剿至方山之西兩花臺守衆  
旬結城寇絕我軍歸路我軍左右盪決寇分路而遁重圍始解是役也秀成自  
蘇侍賢自浙先後圍攻大營四十六晝夜國荃率諸將居圍中設奇破之弟貞  
幹力顧餉道將士猶目睂面皮肉幾盡大營解圍後秀成仍屯秣陵關六郎橋  
一帶侍賢謂秀成曰今江北方空虛出其不料驍攻揚州六合括其糧以濟軍  
復分兵攻國藩於安慶彼必分軍馳救我今屯秣陵漂水之師乘虛擊之鮮不  
濟矣秀成納之別遣僞納王郝永寬僞對王洪元春等自九洑洲渡江竄越江  
浦浦口者五六萬洪元春陷巢縣含山和州遂踞連漕鎮銅城牆東關各隘知  
無爲州米足兵單徑撲州城提督蕭慶衍攻連漕銅城會彭玉麟水師焚毀三  
石卡進破連漕鎮連覆陶家觜崑山岡寇望繞出銅城牆後牆口寇衝闖而出  
岡東牆西寇皆遁走國荃遣軍守東西梁山顧江陰令李昭慶帶五營自蕪湖  
北渡援無爲以保皖南各軍連道國藩調李續宜毛有銘移防廬州賴文鴻古  
隆賢等自廣德審國竄入旌德總兵朱品隆敗之解圍去其攻涇縣之寇亦被

援軍擊退先是昌化寇率衆數萬竄入績溪糞絕旌德防軍糧路唐義訓會浙軍克之十月我軍連復上虞嵊縣新昌宗棠屢攻龍游湯谿蘭谿嚴州諸處破壘卡三十餘惟附城諸壘不可破寇以死守城穴牆開礮軍士多傷亡龍游湯谿兩城爲金華要道必兩城下後路清而後可攻金華蘭谿一水直達嚴州必蘭谿下餉道通而後可收嚴郡此三城者所請如骨之硬在喉也十一月寇竄太平黟縣進陷祁門將窺伺江西饒州景德宗棠恐阻糧路檄軍助剿未至而祁門已克魏喻義攻嚴州嚴州形勢外通懷甯內達杭州宗棠援浙謀首下嚴州而寇在三衢圖犯江西斷我餉道乃先清衢郡飭劉典攻蘭谿以分寇勢踞寇僞朝將譚富與蘭谿譚星爲兄弟互相首尾喻義屯銅關據險設卡譚富糾桐廬浦江諸寇屢來犯喻義伏兵鐘嶺脚殲寇前鋒寇竊還閉城固守是夜我軍梯城而入殲寇萬餘立克府城焚船三百餘艘獲僞印二百九十三顆餘棄械投誠是時紹興僞首王范汝增僞戴王黃呈忠僞梯王練業紳率大股由諸暨東陽義烏永康西竄金華號稱十萬以援湯谿龍游分黨竄武義林文察敗

之丹陽句容寇竄鎮江馮子材督軍大破於丁邏薛邏諸處寇踞常熟昭文二縣以窺江北距城十八里有福山者爲江南重鎮與江北狼山鎮對峙由江入海之鎖鑰也二縣守寇錢桂仁駱國忠董正勤與太倉曾錢壽仁密通款我軍李鶴年攻城寇約內應國忠夜飲桂仁酒就座斫殺僞馮天安錢嘉仁僞遠天福姚得時以城降明日會水師周興隆破平福山滸白徐六涇諸海口寇壘進規太倉而蘇州內應事泄譚永光悉衆爭常熟招江陰無錫寇六七萬來會又令楊舍寇乘隙陷福山官軍固守常昭十二月寇圍而攻之圍勇潰周興隆告急鴻章遣援而江陰楊庫寇已竄福山各口阻援師遣常勝軍及水師攻福山口河西寇壘不下寇攻常熟急西北門營壘已失常勝軍阻寇福山不得達李鶴年攻太倉寇援甚衆亦難驅進鴻章增調浦東軍由海道繞赴福山會師援剿鶴年等自望仙橋進攻太倉敗之時蔣益澧攻湯谿不下劉璈會攻蘭谿寇壘亦失利劉典合水陸進攻寇堅伏不出龍游湯谿援寇適大至乘間西趨擾江皖益澧等迎擊湯谿援寇於金華白龍橋大創之僞扶王陳得才僞端王藍

成春僞增王賴文光僞顧王梁成富僞主將馬融初皆陳玉成悍黨也玉成命  
北犯牽掣官軍而得才見廬州被圍急欲南援爲防軍所扼奔竄於河南湖北  
山陝之間與諸捻合遂成流寇二年正月秀成調集常州丹陽諸寇屯江寧下  
關中關號二十萬自九洑洲陸續渡江意欲假道皖北竄擾鄂贛截斷江皖各  
軍運道圖解江寧之困蓋近攻不如取遠勢也旣渡江陷浦口李世忠退入江  
浦僞匡王賴文鴻僞奉王古隆賢僞襄王劉官方糾合花旗廣寇數萬圍涇縣  
鮑超自寄國馳援誘之入伏寇敗還壘而壘已爲我軍所焚寇大奔立解城圍  
及還軍而西河寇乘虛犯壘見超輒倉皇遁去蔣益澧康國器克湯谿金華寇  
恃湯谿龍游蘭谿三城爲犄角我軍攻湯谿寇勢漸蹙僞朝將彭禹蘭詣營乞  
降益澧令內應誘誅僞天將李尚揚等八名是夜彭禹蘭啟西門納軍殺九千  
餘城寇遂盡僞戴王黃呈忠僞首王范汝增僞梯王練業紳自白龍橋退奔金  
華龍游寇聞風而遁左宗棠收之劉典收蘭谿高連陞等收金華而武義永康  
東陽義烏浦江皆相繼收復浙東敗寇從於潛昌化越叢山關竄皖南績溪復

踰箬嶺歸旌得并句容太平大股虜集石埭謀西上建德大震江西饒州九江邊亦急劉典等克諸暨譚星自浦江敗後竄踞桐廬宗棠飭劉培元會水軍合擊之逼其西趨蔣益澧乘勢進攻紹興提督葉炳忠會英法軍克之敗寇萬餘與桐廬踞寇沿江築壘抗拒我軍水陸合攻遂復桐廬蕭山寇亦竄走浙東肅清左宗棠遣益澧進攻杭州先是楊輔清糾合羣黨噓聚西河紅楊樹麒麟山一帶十餘萬人以一大股抄出高祖山先以一小隊繞過山背揚言上犯涇縣實欲圖鮑超老營二月寇分三四萬衆圍高祖山八營鮑超分軍三路伏兵茯苓山傍以斷其後戰逾時寇譖亂奔近茯苓山伏起寇駭懼遂平高嶺周家橋馬家園小淮窯諸壘寇之由河西遁入灣沚者爲水師擊敗併入梅嶺麒麟山鮑超遣將分攻之積屍若阜並收復仰賢圩各處餘分道竄逸僞懷王周逆等糾衆竄至句容城外會丹陽僞效天義陳曾圖由九洑洲北渡馮子材扼橋據險分隊進攻直趨牧馬口沿鄞十餘里卡林立官軍直突屹不稍動守備李耀光陣斬執旗寇搗中堅官軍無不以一當百立燬牧馬口敵卡東湖寇亦敗

潰進毀南路柏林邨老巢斬陳曾馬下卽四眼狗玉成之叔也寇駛奔向西南竄走皖西寇犯休寧分掠建德西侵江西鄱陽彭澤東擾池州圍青陽續由江浦縣新河口迤邐西竄巢舍全椒之間南岸則金柱關時踞皖南寇約有三起一爲胡黃古賴諸寇卽踞寧國太平石埭旌德者也一爲花旗此廣東匪前由廣東湖南江西入浙皖者也一爲譚星即蘭谿抗官軍者也徽防諸軍紛紛告警當曾國藩之視師東下也寇攻常熟益急譚紹光又益以礮船二百艘突地攻城降將骆國忠悉力扼守鴻章遣軍攻太倉崑山分寇勢別遣英將戈登助剿福山會潘鼎新等水陸軍奪石城夜毀城壘翌日寇入西山而福山火起乃開門悉銳出擊寇盡潰禽斬悍酋孝天義朱衣點常熟昭文城圍立解太平踞寇圍祁門江西軍王沐敗寇於徽州屯谿草市寇再敗於嚴寺街長林潛口等處死近萬人退奔休寧藍田一帶西通漁亭未幾寇復進踞潛口祁門防軍禦之黟縣漁亭太破之陣斬僞天將劉官福寇之初起也禁令嚴明聽民耕種故取江南數郡之糧出金柱關江北數郡之糧出裕谿口並輸江甯今耕者廢業

煙火斷絕寇行無人之境而安慶蕪湖廬州甯國東西梁山金柱關裕谿口暨  
浙之金華紹興山川筋絡必爭之地寇悉喪失我軍足制其死命昔年寇之所  
至築壘如城掘濠如川近乃日近草率羣酋受封至九十餘王之多各爭雄長  
敗不相救識者知其亡無日矣寇復由寧國繞出青陽分擾建德東流三月由  
東流犯江西彭澤進逼祁門由建德窺饒州犯梅林營壘劉典督軍敗之遂大  
破潛口寇屯徽州休寧解嚴乃赴漁亭會克黟縣斬僞絅天義古文佑追寇出  
嶺外平寇壘二十餘嶺內一律肅清太倉踞寇僞酋王蔡元隆詐降郊迎我軍  
至城下伏起槍傷李鶴章程學啟殿軍而退鴻章檄戈登會攻太倉克之黃文  
金合許家山各處寇十餘萬山祁門進逼與參將韓進春血戰四時陣斬僞孝  
王胡鼎文羣寇奪氣寇攻廬州犯舒城李秀成將由舒城六安上竄一出黃州  
一出漢口擾犯湖北掣我南岸之師以援北岸掣我下游之師以援上游皆爲  
解金陵圍計也湖北爲數省樞紐曾國藩調成大吉回屯漢口檄永師赴武漢  
嚴防秀成來犯石澗埠進逼我軍晝夜猛攻相持不下寇復於前營增百壘層

會合圍彭玉麟派隊來援會軍夾擊盡平羣衆秀成遁走其犯廬江舒城者悉敗走悍寇馬融和自豫間道犯桐城我軍敗之三里街遁往孔城與秀成合而爲一秀成遣僞富天豫張承德等圍六安敗死六安者淮南要衝也餘寇走廬州鮑超追擊會攻巢縣先破東關銅城廬二隘遂克其城金山和州相繼皆下李侍賢自金陵敗遁糾悍黨數萬屢犯金柱關花津上駒渡萬頃湖涂家渡及燕子磯伏龍橋護駕墩漕汎黃池諸處寇坐皆爲我軍所覆自是寇不敢輕渡西岸遁溧水丹陽一帶四月水師楊政謨襲破杭州閘口寇船登岸進毀望江門寇坐寇大震急招新城寇還救蔣益澧進攻富陽富陽一城爲杭州上游關鍵嚴防禦船壘相輔杭州援寇屯新橋與城寇相爲犄角秀成令陳炳文等舍蘇州常昭急援富陽並糾蘇常嘉興悍黨由餘杭趨臨安竄新城擾富陽軍後路魏喻義等督兵進擊寇復乘霧分道攻撲新城大敗向臨安遁僞慕王鑑戰三晝夜破之僞天將夏天義率悍黨數萬久踞崑山新陽縣城鴻章率督

程學啟戈登會水師大破崑山寇壘二十四斃萬餘有正義鎮首烏蘇城援崑山必由之路學啟攻之破石壘二寇見歸路已斷奪路狂奔遂進克同城崑山新陽王沐自黟縣回援景德寇敗於陳家畈包家塅竄安寧嶺外時江寧攻圍久百計欲解城圍既分股由徽寧窺伺江西由含和一帶圍犯湖北而由湖北下竄之捻自蕲水分爲四枝一回竄黃州一撲宿松越潛太以撲廬桐寇捻苟合兜篴甚張此皆李秀成所規畫也我軍克復福山後江陰縣屬揚庫汛爲江邊險要寇糾衆死守以蔽江陰我軍水陸會攻斬趙尙林等立復汛城而湖北湖西塘市屯寇均棄壘遁還無錫常州我軍克復建德連復巢含和三城於是皖北寇全遁皖南寇勢亦衰初秀成自六安敗後率衆東竄聲言回救蘇州國荃急爭江寧老巢攻其必救使城下之寇不暇遠趨蘇郡而北岸之寇亦不敢專注揚州乃率軍分六路併進潛襲兩花臺及衆寶南門石壘肉薄登城遂奪兩花臺乘勝猛攻東西南各卡九壘皆克之羣寇潰奔我軍追擊於長干橋鑛入水者無數未幾城寇出又敗退斃六千餘寇勢從此衰減秀成在江北聞雨

花臺失益惶懼又以崑山新克蘇州亦受逼乃與諸僞王改圖南渡於是天長六合來安次第解圍而寇之分踞喬林小店者冒雨掠舟喧鬧不絕五月浦口寇棄城遁走而江浦寇忽獻書乞降鮑超等察其詐引軍急進水師次江浦寇聞風亦宵遁九洑洲爲城踞寇閉門不納寇竄蘆葦中溺死者無算江浦浦口兩城寇盡燬之入江江北肅清曾國荃連日破平下關草鞋夾燕子磯收寶金圩距蕪湖金柱關百里內已無寇蹤進攻克九洑洲寇之在中關者附城爲壘卒不稍動其堅踞九洑洲者下有列船上有僞城羣礮轟發不息復於東西南三面分伏洋槍隊伺間出擊我軍多損傷彭楚漢等負創角戰乘風縱火夜二鼓撲牆而入衆殲無一脫者九洑洲既克謀者謂浙軍攻富陽滬軍攻蘇州江寧亦宜速合圍使備多力分國藩亦主合圍制敵爲上策秀成南渡後連營於江陰無錫數十里聲言援江陰攻常熟鴻章督諸軍攻破七十五壘顧山以西寇皆盡寇自失九洑洲下關江上接濟已斷糧食漸乏謀赴蘇州嘉興力圖接濟秀全以城圍日逼留秀成共守老巢緩援蘇州六月秀全遣黨出儀鳳門

率水陸軍擊破嘉湖援寇禽斬僞貴王陳得勝及悍黨四十餘追至平望斷其橋從此攻蘇之軍無牽掣之患僞平東王何明亮等以劉典屯績溪不克上犯徽歙遂由甯國千秋關竄浙江陷昌化擾於潛其前竄廣德者復折踞孝豐劉典遣軍出績溪昱嶺關援剿江甯軍自攻克江東橋上方橋而城東數隘未下近城者曰中和橋曰雙橋曰七橋甕稍遠者曰方山土山曰上方門高橋門迤南則爲秣陵以至博望鎮皆金陵外輔也劉荃以東路未平不能制寇死命令諸軍東渡提督蕭衍慶過河破五壘城寇出爭擊退之遂克上方門高橋門雙橋門右路方山土山之寇亦棄壘而奔七橋甕踞寇倉皇欲遁而城中忽出大股來援兩軍相搏總兵蕭孚泗乘夜縱火寇冒火突出遂克七橋甕其博望鎮總兵朱南桂已先五日襲取之博望鎮既失則秣陵關之勢孤七橋甕既失則中和橋之勢孤總兵伍維壽等南略秣陵關寇棄壘奔潰自是鍾山西南無一寇巢僞奉王古隆賢詣朱品隆降收復石埭太平景德三城徽州蕭清餘寇竄踞寧國廣德孝豐之間勢甚渙散宗棠飭劉典由昌化於潛趨臨安進剿孝豐

爲規取湖州之地十月易開俊克寧國縣城自是東瑞黎立新上書請爲內應建平張勝祿上書請獻城池鮑超等遂合趨東瑞繞壘環攻楊輔清從亂軍中逸出寇立獻僞城東瑞既克建平張勝祿等即於是日斬僞跟王藍得仁舉城降而溧水寇楊英清亦繳械降遂收二城國荃克淳化鎮解谿龍都湖墅三岔鎮等營燬寇壘二十餘江寧城東南百里內寇巢略盡蘇州軍自黃埭攻滸墅關破王瓜涇觀音廟寇壘直抵滸墅擊走僞來王陸順德進毀十里亭虎邱楓橋寇皆遁蹤至閶門寇大恐李鶴章敗寇無錫鳴城橋破西倉寇壘直抵茅塘橋李侍賢調常州陳坤書來援城寇黃子澄出迎我軍縱擊敗之秀成聞滸關已失退屯北望亭謀返蘇州老巢坤書還走常州侍賢遁宜興溧陽我軍乘之下寇壘百餘鴻章督軍攻婁門寇蘇州四年自我軍連克要隘乃於胥封婁等門馮河築壘數十婁門外石壘尤堅至是我軍由南北岸而進秀成等突出婁門拒戰程學啟與常勝軍分隊以應援寇遁入城水師會攻婁葑門外寇壘二十餘皆下我軍連克齊盤門各壘三面薄城寇衆惶懼而秀成及譚紹光猶圖

固守他酋郜雲官等皆有貳心密請於鴻章乞反正許之學啟戈登單舸見雲  
官等命斬秀成紹光以獻而雲官不忍殺秀成許圖紹光秀成覺之涕泗握紹  
光手爲別乘夜率萬人自胥門出走嘉善郜雲官殺譚紹光率僞比王伍貴文  
僞康王汪安均僞甯王周文佳僞天將范起發張大洲汪瓊武汪有爲開齊化  
門迎降鴻章受之雲官等未薙髮要總兵副將等官並請自領其衆屯守盤齊  
胥閩四門程學啟慮其不可制密請於鴻章誅之立復蘇省秀成以輪船炸礮  
越無錫水師北竄十一月李鶴章克同城無錫金匱追禽黃子隆與子德懋並  
誅之劉秉章等攻浙西平湖寇陳殿選獻城乞降連日乍浦賊熊建助海鹽潊  
浦賊皆反正十二月秀成留蘇州敗黨分布丹陽句容間自率數百騎潛入江  
寧太平門苦勸秀全棄城同走秀全侈然高座曰我奉天父天兄命令爲天下  
萬國獨立真主天兵衆多何懼之有秀成又曰糧道已絕餓死可立待也秀全  
曰食天生甜露自能救饑甜露雜草也秀成以秀全戀老巢不肯去非口舌所  
能爭乃貽書溧陽約李侍賢銳意走江西初寇自咸豐十年破江寧長圍迭陷

蘇常嘉湖上竄江西湖北撫脅潰兵游匪以百萬計盡得東南財賦之區日以強大自去歲屢戰屢敗各城精銳散亡不下十萬今年春夏間竄皖北我軍殺殺解散又十數萬其自九洑洲過江僅存四五萬人秀全驚惶失措賴秀成回江寧主持守局而秀成以蘇州爲分地事急回援今巢穴已失黨羽又孤蹤踰而走隨行僅兩萬餘人欲赴金陵解圍無術力勸秀全突圍上竄回粵以圖再舉常州陳坤書溧陽李侍賢皆聽秀成爲進止而杭州陳炳文係安徽人鄧光明湖南人聞秀成有回粵之謀皆不願從秀全亦屢勸不聽國荃自四月間掘地道至是始成而寇附城築牆號月圍下穿橫洞以防隧道故城崩而猶阻月圍橫洞不能克劉銘傳進攻常州西路奔牛踞寇邵志倫羅墅灣踞寇夏登山萬錫階石橋灣踞寇張邦振皆詣我軍乞降收衆萬六千人惟孟河賊尙踞汛城輒出犯降人坐銘傳一鼓下之潘鼎新克嶼城李鴻章等破常州東門南門石壘明日張樹聲傍城東北築壘破小門土門連日嘉興桐鄉石門寇犯嶼城海寧寇犯澉浦海鹽僞璋王林紹章自句容援常州均爲我軍擊走程學啟克

平望鎮平望東連嘉興西接湖州南通杭郡爲蘇浙樞紐浙寇精銳多聚守此今被我軍攻克嘉興藩離已失蹤寇奪氣寇犯鎮江甘棠橋張文德學馮子村等助擊破之斬李秀成養子僞罔天義黃曾十二月僞曾王蔡元隆獻城降左宗棠受之改名元吉海甯瀕海爲杭州東北屏蔽元吉擁衆致攻杭之師未能合圍今幡然附款杭州之勢益孤東北兩面圍漸合嘉興賊僞榮王廖發受呈降書程學啟慮有狡謀誠軍嚴備杭州踞寇僞聽王陳炳文遣人詣降而無降書宗棠趣蔣益澧攻城益急秀成會李侍賢犯江西既以溧陽至饒州浮梁數百里處處乏食慮要糧疾趨爲難因趣侍賢持二十日糧道長興廣德寧國入江西先踞腴區待已於是侍賢遣黨西竄行甚疾曾國藩遣軍屯休寧沈寶楨遣軍屯婺源玉山拒之四月川督駱秉璋破賊天全生禽僞翼王石達開礮於市自洪秀全倡亂封五僞王馮雲山蕭朝貴皆敗死楊秀清韋昌輝自相賊殺石達開避禍出奔自樹一幟歷犯浙江福建兩湖兩廣諸省並擾及滇黔蓄意入川以圖霸據至是爲川軍禽戮凡僞五王前後皆誅滅矣三年正月蔣益澧

飭降人蔡元吉襲桐鄉不下桐鄉爲杭嘉要道益澧遣將分屯東北門爲朝將何培章來降遂收桐鄉令培章率降衆屯烏鎮雙橋阻杭嘉道絕寇糧湖杭寇皆來爭擊走之我軍進屯嘉興聯絡蘇師規復郡城廣德寧國寇竄犯浙江昌化副將劉明珍不知寇衆寡進擊創矛退扼河橋寇尋分黨一竄徽州績溪一竄淳安謀渡威坪河進窺遂安時侍郎上犯冀衝過徽州就食江西其大勢趨重遂安擾及開化馬金街其地與休寧婺源常山玉山接壤王開琳自徽州進遂安連破寇於中州昏口黃少春馳入縣城敗寇遂安城北墻入郭郵驛之寇後隊仍由章郵竄昏口少春擊破之新橋開琳復繞出昏口敗之其竄往開化華埠僅千餘侍衛句合黃文金及廣德餘黨由寧國上竄陷績溪退踞雄路孔靈等處圖撲徽州唐義訓自徽州出繁吳山鋪敗之毀雄路寇館援寇至我軍奮擊再破之縣城立復鴻章派郭松林戈登等攻宜興荆溪寇圍城出拒槍子傷松林右肘我軍屯三里橋與常勝軍會擊僞代王黃精忠由溧陽來援拚死相撲我軍屹立不動以洋槍排擊之寇死傷相繼無退志我軍三路包抄寇始

奪路狂奔城寇勢益不支開西門而逸遂復兩縣城是城瀕太湖西岸當江浙  
衝道爲常郡後路自是常郡寇益蹙蘇州無錫之防益固戈登進圍溧陽溧陽  
爲李侍賢老巢又江寧後路要隘常州金壇在其北句容丹陽值其西長興廣  
德當其南面面寇巢前與鮑超東堵溧水之師相隔絕後距李鴻章常州軍亦  
稍遠孤軍深入李鴻章戒戈登慎進止尋溧陽曾吳人杰降戈登復其城郭松  
林等進攻金壇敗僞列王古宗成僞襲王劉官方於楊巷是時常州陳坤書合  
丹陽句容之寇十餘萬由西路繞出常州之北日犯我軍李鶴章督軍擊敗之  
寇以我軍城圍日緊分犯江陰常熟無錫以圖分我兵勢李鶴章撤圍師堅守  
勿戰別調軍援三縣李鶴章等尋解無錫城圍江陰守將駱秉忠與楊鼎勳等  
內外夾攻寇亦敗走乃並趨常熟北自楊舍福山南自顏山王莊數十里皆寇  
黃翼升會同城軍夾擊克王莊顏山陳市寇坐追殺二十餘里寇由大河回  
撲常熟水師截之首尾不能相顧掩殺無算常熟之圍立解初秀成入江寧說  
秀全出走不聽秀成憂糧食不繼遣黨百計偷運國荃約楊岳斌水陸巡邏遇

奸民運米入城輒奪之秀成遣養子李士貴率黨數千出太平門赴句容接糧入城伏兵要之寇棄糧走國荃銳意合圍江寧城延亘百餘里自我軍駐師兩花臺奪取附近諸隘東西南三面爲官軍所據惟鍾山石壘未克城北兩門尙未合圍秀成自將出鍾山南攻朱洪章營敗退登山沈鴻寶等挾火繩箭擲壘中寇突火跳遂克鍾山石壘寇所署僞天保城者也國荃分檄諸將屯太平門洪山北固山塞神策門餘元武湖阻水爲圍於是江寧四面成包圍之勢寇援及糧路皆絕二月寇以運糧路絕日驅婦孺出城以謀節食城西北多園圃豫種麥濟饑初程學啟進攻嘉興破小西門北門寇營殲除淨盡禽僞天將劉得福慕天義賈慕仁而湖州寇屢竄南木壠邱四亭子新牌思犯盛澤平望以圖嘉興不得逞又犯盛澤圍王江涇後路營亦爲我軍所敗而城守甚固我軍多傷亡又遇雨不能進攻學啟急思復嘉興分門攻擊增築月牆寇拚死抗拒又以地雷巨礮轟踢城垣百餘丈擊毀礮臺賊爭負土壤城闕湖州賊又自新塍來援學啟會軍猛攻肉薄登城丸創其首部將大憤縱橫刺射寇衆潰遂克嘉

興僞榮王廖發受僞挺王劉得功皆伏誅授寇黃文金還湖州寇之分竄江西者疊經我軍截殺闖入金溪道員席寶田由安仁馳擊復其縣城寇由瀘溪趨建昌寶田會軍敗之寇蔓延於新城南豐提督黃仁翼進攻新城克之餘竄入福建建寧縣境南豐之寇亦經寶田擊敗斬僞天侯張在朋寇棄舉狂奔退至城下合圍攻之蔣益澧克杭州康國器等同日收餘杭寇分竄德清武康等處宗棠飭軍分路進取三月羅大春等各率所部撲壘環攻降人楊芸桂開門迎納官軍援賊回鬪礮擊之敗走德清寇蹙戰四時亦大敗武康德清皆復我軍進逼石門踞寇鄧光明降其圖竄孝義之寇亦截殺無算鮑超等會克句容僞漢王項大英僞列王方成宗皆伏誅僞守王方海宗遁金壇寶堰寶堰南距金壇城四十五里北達丹陽方海宗與坐僞顯王袁得厚合謀阻進兵之路鮑超攻之閉壘不出乃負草填濠一躍而入寇向金壇丹陽遁去鮑超進攻金壇設伏茅山大敗追寇城寇喪膽啟南門遁走遂復其城敗寇二三千屯踞南渡僞植王林得英約會常州西路孟河呂城諸寇欲由金壇歸併廣德同踞南渡鴻

章檄道員吳毓芬等會水陸軍分三路夜襲其巢陣斬林得英及秋天安黃有才等殄寇殆盡其攻丹陽者爲鎮江揚州防軍援寇一由常州運河一由江陰孟河大至詹啟綸張文德會擊敗之援寇退屯丹陽東北一帶丹陽一城多聚巨曾僞然王陳時永爲陳玉成叔父僞來王賴桂芳爲洪秀全妻弟因其內閨我軍乘之陳時永創仆斬之其黨自縛賴桂芳及僞廣王李愷瞬僞列王金友順僞梁王凌郭鈞僞都王周林保並僞義安福燕豫諸目獻軍前乞降皆駢誅遂克其城至是常州鎮江各屬俱告肅清寇自德清武康石門克後李侍賢及僞聽王陳炳文僞康王汪海洋等仍堅踞湖州是時浙江惟湖州長興安吉三城未下湖州寇於附城二三十里修築堅壘復於長興安吉各隘連營數十里相爲犄角高連陞擊之於湖州境寇分竄昌化分水防軍劉明珍被斬數百李侍賢繞越老竺嶺竄皖南績溪復間道走歙西竄屯溪陳文炳汪海由歙北竄浙境分犯淳化遂安遂安防軍截擊斬南小川竄寇敗還楊鵠唐義訓等進剿失利於是嶺內偏地皆寇徹休祁黟婺源竄江西後

之續至者絡繹不絕國藩調石埭青楊防軍入嶺援徽檄鮑超率全軍援江西陳坤書之踞常州四年矣自蘇軍力攻以炸礮毀城寇死守取舊棺敗船堵城闕以槍礮拒我軍時城西寇壘二十里夾河環列劉銘傳等攻破十四壘餘壘皆不戰而潰而河干寇壘二十餘又爲張樹聲等所破於是寇西道皆絕惟小南門西門附城十餘壘我軍復擊平之陳坤書塞門不納敗黨恐官軍奪入悍賊皆死城下城圍既合築長牆伏奇兵備大舉水陸軍發礮轟城風煙迷漫寇如墜霧中俄城壞數十丈寇以人塞缺口炸丸迸裂人與磚石齊起天際然旋散旋集蓋蘇省各路敗寇積年虜聚於此猶圖萬死一生計也鴻軍益揮軍迫登我軍偕旗牌噴筒直前寇傾火藥以長矛格刺軍士十墜六七翼生陽突入禽陳坤書周盛波禽爲列王費天將戰城上良久寇大潰縋城出者復爲我軍所殲我軍亦死亡千數百人常州之失以咸豐十年四月初六日越四年而復日月皆不爽亦一奇也陳坤書凌遲處死梟示東門時常州敗寇竄徽州我軍擊破之餘竄江西圍玉山副將劉明珍等陣斬珊瑚天安等斃寇二千李侍賢越

金谿犯撫州河東灣猛攻東門爲我軍擊退忽突起攻橋環呼城中內應冀亂  
我軍劉干淳礮斃多名餘遁金溪城圍立解僞列王林彩新竄江西弋陽我軍  
追抵湖西揮軍抄擊寇敗竄黃沙港對岸楊家坡寇黨從上游渡寇千餘來援  
諸軍沿河截擊屢戰逾時寇始蹙多落水死侍賢等先後由浙犯徽由徽入江  
西江陰陽舍及常州城外之寇由丹陽湖州上竄徽南其酋爲林彩新及僞麟  
王朱某僞爵潘忠義等從昌化進老竹嶺闖入歙境唐義訓伏兵鍾塘嶺後以  
五營進遇寇大戰伏起殲其前鋒時金國琛等行抵富陽隔河而屯寇衆列山  
岡上下我軍俟寇涉水將半突出奮擊唐義訓尾而至夾擊之寇不支遁向黃  
山小路我軍馳抵五弓橋再敗寇因循河埋伏兵寇正渡時伏突起寇大驚亂  
生禽林彩新等十名陣斬潘忠義等十四酋死亡者二萬餘人是月洪秀全以  
金陵危急服毒死羣酋用上帝教殮法綉緞裹屍無棺槨瘞僞宮內祕不發喪  
其子年十六襲僞位秀全生時即號其子爲幼主或曰本名天貴福其刻印稱  
洪福旁列真王二文誤台爲瑱其稱洪福瑱以此然諦觀印文實真王二字

非貞王也時湖州寇方竄湖濱楊灤大錢口潘鼎新分軍屯南潯而寇恃長興爲聲援長興在湖州西毗連宜興溧陽及廣德州宗棠貽書鴻章移嘉興之師助攻長興鴻章遣諸軍分道往取水師入夾浦口五月鼎新進紮吳灤水師破平夾浦石壘鼎新連破吳灤殷瀆鄭毀其卡壘郭松林毀長興城東上莘橋跨塘橋寇至湖州廣德四安寇率數萬分路來援依山築壘綿亘林谷松林等擊湖州援寇劉士奇擊廣德四安援寇壘悉平毀殲溺萬餘人而湖北廣德寇復添撥大股折回我軍乘賊衆喘息未定合力痛剿追殺二十餘里寇乃遠遁我軍乘夜攻城以炸礮轟踢城垣十餘丈松林等首先衝入遂復長興縣城江西貴溪盛源洞等處寇分踞小巷一帶築壘修卡我軍飭礮船馳赴黃土墩以槍礮擊之寇倉皇敗竄水陸諸軍撲卡而入禽斬多名寇大潰貴溪寇壘一律肅清浙軍進規湖州攻復孝豐縣城生禽僞威王陳榮斃千餘是月僞扶王陳得才等合捻竄擾孝感雲夢等縣上以江甯垂克而河南捻犯麻城皖城深入江西恐掣全局趙國荃迅取金陵國荃進攻鍤山龍脖子寇所稱地保城也我

軍自得僞天保城後城寇防守益嚴是城扼建要害尋爲李祥和所破國荃築礮臺其上日發巨礮轟擊居高臨下全城形勢皆在掌中六月十六日國荃飭諸軍發太平門地雷踢城垣二十餘丈前敵總兵李臣典朱洪章等九人先登諸將分門合力攻克江寧省城獲僞玉璽二方金印一方是夜寇自焚僞天王府秀成携秀全幼子從城垣缺口遁去並以己馬與之乘以行國荃令閉門封缺口搜殺三日斃寇十餘萬凡僞王以下大小曾目約三千餘最後城西北隅清涼山伏寇數千出與官軍死戰卒殲之其僞天王府婦女多自縊及溺城河而死國荃派馬隊追至純化鎮生禽僞烈王李萬才其自城破後逸出者洪秀全之兄僞巨王僞幼西王僞幼南王僞定王僞崇王僞璋王悉爲馬隊殺斃蕭孚泗搜獲李秀成及洪仁發洪仁達於江寧天印山搜掘洪秀全屍於僞宮殿而焚之國藩親訊秀成等供認成駢誅於市七月鮑超連克東鄉金谿楊岳斌等連克崇仁宜黃潘鼎新會克湖州楊昌濬等克安吉斬僞駢馬列王王徐朗寇併竄廣德長興守軍吳毓芬克四安鎮劉銘傳克廣德初秀全幼子自江寧

出亡悍黨衛至州城至是城克僞昭王黃文英等挾之走寧國八月唐義訓等敗湖州餘寇於歙縣殲曾目僞幼孝王等九人連日劉光明等大破寇於昌化淳安僞堵王黃文金僞偕王譚體文伏誅李遠繼挾秀全幼子奔江西廣信於是浙江平初秀全幼子及黃李諸酋由寧國趨昌化之白牛橋譚曾及僞樂王之子莫桂先僞首王范汝增等由寧國趨淳安威坪約同竄徽境衆尙十數萬劉光明擊白牛橋寇黃曾中礮死弟文英代領其衆踰踰西奔黃少春斬譚體元於洪橋併誅莫桂先等酋百五十餘人劉明珍率所部由淳化上趨值黃文英李遠繼來犯明珍偕魏喻義等分兵禦之創黃文英於陣李遠繼挾秀全幼子遁至徽歙之交寇由建口渡河我軍乘其半濟擊之大潰斬僞列王邱國文等收降卒六千餘餘黨向績溪而逸其已渡建口者竄至遂安黃少春等復擊走之僞列王劉得義蕭雅泗等率二萬人投誠洪氏勢益孤乃由遂安昏口遁走開化竄入江西九月鮑超擊僞康王汪海洋於寧郡大破之禽斬僞朝將王金瑞等百二十餘人席寶田追剿湖州逃寇大殲於廣昌白水嶺禽僞干王洪

仁玕僞卹王洪仁政及僞昭王黃文英皆伏誅沈葆楨克等都會昌練勇克瑞  
金寶田追寇於石城游擊周家良搜獲秀全幼子於黃谷檻致南昌省城誅之  
各路官軍截剿餘寇殆盡於是洪氏遂滅

論曰秀全以匹夫倡革命改元易服建號定都立國逾十餘年用兵至十餘省  
南北交爭隱然敵國當時竭天下之力始克平之而元氣遂已傷矣中國危亡  
實兆於此成則王敗則寇故不必以一時之是非論定焉唯初起必託言上帝  
設會傳教假天父之號應紅羊之讖名不正則言不順世多疑之而攻城略地  
殺戮太過又嚴種族之見人心不屬此其所以敗歟